


NSUNGI YA DIBUUNDU

YA LAODICEE

 Ntangu yayi, yandi ata mbala mosi ve kumanisaka yawu. Mu tubaka, “Mu kwendaka na manima ya ntangu na makwela ya munu. . . Kubutamaka fyoti na manima ya ntangu, fyoti na manima ya ntangu na makwela ya munu, kana mu lendaka vwanda kaka na manima ya ntangu na nkinzi ya luzikulu ya munu!” Ya kele na yina mu zola kieleka kuvwanda na manima ya ntangu, kieleka na manima ya ntangu.

² Ve, mu kuzwaka bakubokila na alo-alo na yinzo, na yina na mpasi, mu zolaka kwenda. Mpe na yina na manima kento ya munu mpe bayankaka kwendaka na ntangu ya mbote, mu vwandaka kaka na bima mingi ya kusala. Mpe kuna bantu ya bisika yankaka, samu na kusambila, mpe kaka na kukotaka na ntangu yina; mpe luzayikisu ya Mfumu me kwiza samu na mpangi mosi ya bakala; mpangi ya kento yina kele ya kuvwanda na manima kuna, ya kubela; beno zaba yina mu zola kutuba, ya kele kaka kukwenda, kukwenda, kukwenda, kukwenda. Mpe mu me pesana ve maboko na bayankaka ya bankundi ya munu awa ya Géorgie mpe ya bisika yankaka na kizunga nyonso, tii na Canada. Mu ke kuwa kieleka kaka yimbi samu mu me pesa beno ve mbote na diboko.

³ Mpe, na nzila mosi, wapi kisika kele Fred na nkokila yayi, Fred Sothmann? Fred, nge ke bambuka moyo kilumbu yina nge bokilaka munu na Canada, zolaka vutuka, mpe mu tubaka na nge na kukwiza ve na ditoma? Nge kwizaka, na mutindu nyonso; kuzwaka dikubu, mutindu. . . ya mwangisaka ditoma ya yandi, na mutindu zolaka kufwa kento, dikanda ya yandi, pasulaka mbombo ya yandi, mpe nataka bawu nyonso na lupitalu.

⁴ Ntama mingi ve ntangu mu vwandaka basika, kaka na manima ya midi, Mpangi Ben awa vwandaka na ngaanda kuna, me belama na munu. Mpe Rosella kwizaka kuna, yandi tubaka, “Mu ke na kwenda na yinzo.”

Mu tubaka, “Rosella!”

Yandi me tuba, “Wapi dyambu, Mpangi Branham?”

Mu tubaka, “Mu ke kuwa mutindu yankaka samu na yawu.”
Beno me mona?

Yandi me tuba, “Kima mosi ke salama?”

Mu tubaka, “Mu zaba ve. Ya ke monana na munu, Kima mosi ke longa munu na kusala keba.”

⁵ Yandi me bokila munu baminuti fyoti me luta, ti yandi vwandaka me kuzwa dikubu. Mpe na yawu, muntu ve me tala mpasi, kasi ya vwandaka diboko ya Mfumu. Mpe yandi syelumukaka (Node nyonso kele ya kifuluka na galasi.) mpe yandi syelumukaka na Indianapolis, mpe mpe bandaka na kusyelumuka na nzila kieleka na mbangu mutindu *yayi*. Mpe yandi bokaka, “O Mfumu, sadisa munu!” Ditoma me baluka na manima mutindu *yayi* dyaka, me vutuka mpe me baka nzila ya yawu ya mbote, mpe me landila mbote. Yandi me landila nzila, yandi me tuba, “Oh, oh, mutindu mu ke vutula matondo mu me basika na yawu, samu ti matoma yankaka ke na kukwiza kaka na nzila mosi, na mbangu mingi.” Na yawu yandi sabukaka nzila, mpe kuna yandi telamaka kuna na . . . Mu banza, kima mutindu, yandi telamaka samu na kubaka kafe to kima mosi. Mpe kaka ntete yandi kubasika na ditoma yina, ditoma yankaka kututaka yandi na manima, yankaka dyaka kaka na manima ya yandi yina, yankaka dyaka na manima ya yandi yina, mpe kuna bawu nyonso kututamaka na mulonga. Kasi yandi tubaka ti yandi kututamaka fyoti, kasi mingi ve, kasi yandi zolaka kuvutula matondo na Mfumu, mpe bokilaka na kutuba na dibuundu na kutonda Mfumu ti yandi talaka ve mpasi to kima mosi, mpe me lomba na dibuundu na kulandila na kusambila samu na yandi na kukuma na yinzo. Beno me mona, yandi kele kinati-ditoma ya malu-malu, yandi me kuzwa kaka mukanda ya yandi ya kunata ditoma. Na yawu, mu ke vutula mingi matondo.

⁶ Kasi ntangu nyonso ya ke futaka na kubaka malongi yango ya Mfumu. Yandi tubaka, “Mbote,” yandi tubaka, “Mu ke kondwa kilumbu mosi na kisalu.” Yinki kele kilumbu mosi na kisalu? Ya ke kudya mbongi mingi kuluta na kuyidika manima ya ditoma, beno me mona. Na yawu ya kele mbote na—na kusala beno . . . beno vwanda na Mfumu. Ya kele kieleka ve? Kana Yandi tuba kima na beto, beto ke sala mbote na kuvwanda na Yawu. Samu ti Yandi ntangu nyonso ke nungaka. Yandi mutindu yina ve? Yandi ntangu nyonso ke nungaka!

⁷ Ntangu yayi, oh, yayi kele mutindu . . . me vwanda sabala mosi ya mbote mingi. Mu zaba kaka ve mutindu ya kutuba munu mosi na Nzambi mpe na beno bantu samu na sabala yayi ya kitoko. Bayayi me vwanda mwa bilumbu nana ya kyese mingi yina mu me longaka na luzingu ya munu. Ya kele kieleka. Mu me—mu me longoka mingi na Mfumu mpe kyadi ya Yandi ya lembami, mpe nyonso yina Yandi me sala samu na beto, mpe na kumona Mpeve ya Yandi kusala dyaka na dibuundu. Mpe mu kele na kyese mingi na kumona makabu kuvutuka na kusala dyaka na dibuundu. Beno me mona?

⁸ Ntangu yayi, mbala mosi kuna, na yina beno me kwenda, ya ke monana kaka kieleka mutindu muntu ke kota na kati, ke kaka—ke bebisa kaka yawu, beno zaba, bawu ke banda kaka na kusala kima mosi. Mpe na yina beno ke zitisa ve makabu

yango, Nzambi ke zitisa beno ve. Beno me mona? Ya kele kieleka. Beno fwana kusungika kaka yawu. Mpe, mutindu kaka beto zola yawu ya kele ntangu ya kele ya kusungama, mutindu bawu ke zonzila na bandinga. Ve kaka na kutubaka Disonuku, kasi kutuba kima yina ke na kukubamaka na kusalama. Mpe kana beno ke landila kaka na kuvwanda na buzitu ya kieleka na yawu, ya ke banda . . . Kana muntu kubasika na ngaanda ya lutumu na dibuundu, Mpeve-Santu ke basisa yawu kaka mpe ke tuba na bawu nani ya kele. Mpe kuna, bawu ke—bawu ke vwanda ya kusemba mpe ke kwenda na autel. Beno me mona samu na yinki makabu yango kele.

⁹ Mpe na kumona pasteur ya beto awa, Mpangi Neville, yandi vwandaka mwana ya bakala ya swi, ya mutindu na manima. Mpe mu ke tuba na beno, yandi vwandaka . . . yandi vwandaka talana mutindu ti yandi zolaka ata mbala mosi ve kundima yawu ntangu ya kumaka na Pantekote. Kasi kumona yandi kutelama kuna mpe kutendula bandinga mpe kupesa profesi, mu ke tuba na beno, yandi me katuka nzila ya ntama. Kieleka. Ti beto sambila samu na pasteur ya beto.

¹⁰ Mpe, beno me mona, makabu me banda na kukota na dibuundu. Mpe dyaka, mwa mpangi mosi ya bakala ya kulemvuka awa, yandi kele wa, yandi kele . . . fwana vwanda awa kisika mosi. Mu banza ti yandi kele, yandi ntangu nyonso ke vwandaka. Yandi kele kieleka mwa muntu mosi ya kukikulumusa, yandi vwanda vwandaka mosi ya ba-administrateur awa na dibuundu, Mpangi Higginbotham, muntu mosi ya ntalu, ya kinzambi. Mpe na kumona yandi me kuzwa dikabu ya kuzonza na bandinga, nani zolaka banza ntete ti Mpangi Higginbotham zolaka sala yawu? Muntu mosi ya swi, ya manima, yina vwanda zolaka ve kuzabana, na kisika mosi, vwanda vwandaka na manima. Kasi, beno me mona, Nzambi lenda baka muntu ya mutindu mpe kusadila yandi, beno me mona, samu ti yandi zola ve kusala yawu, na kisika ya ntete. Kana yandi vwandaka zola kusala yawu, yandi lendaka kuma na lunangu. Kasi ntangu nyonso yina yandi ke basika kisika yandi zola ve kusala yawu, mu banza Nzambi lenda sadila yandi mutindu yina.

¹¹ Junie kele awa, yandi kele . . . oh, yandi kele na manima ya poto na lweka ya munu.

¹² Mu ke tuba yayi, mu me kuwaka bantu mingi kuzonza na bandinga. Mpe mu banza yawu nyonso me katuka na Nzambi, samu ti beno lendaka ve kusala makelele kukondwa ti yawu kuzola kutuba kima mosi samu na muntu mosi, na kisika mosi. Beno zaba, Biblia ke tuba, “Ya kele ve na makelele kukondwa nsasa,” ya zola kutuba ti ya kele ve na makelele kukondwa ya zola kutuba kima mosi. Beno lendaka ve kutuba mwa kima mosi, kana ti ya zola kutuba kima mosi. Munu ntangu mingi vwanda kumiyufulaka wapi mutindu ya zolaka salama tii ntangu mu

kwendaka na Afrika mpe kuwaka makelele nyonso yango, mpe mu talaka kuna ti ya vwandaka ndinga ya muntu. Bantangu yankaka ya kele ndinga ya wanzio, mpe nyonso yina.

¹³ Kasi Junie Jackson, mulongi na yinsi kuna na dibuundu ya ba-Méthodiste, ya swi, ya manima, ya swi, kuna—kuna na ziunga ya Elizabeth, na Indiana, kuna na bayinti. Swi, yina lendaka ve kutuba kima mosi, mutindu ya manima, yandi vwandaka talana mutindu. . . Mu ke mona bantangu yankaka, mu ke zola kubaka yandi, kuningisa yandi, kutuba, “Tuba kima mosi, Junie, beno me mona, vwanda vwanda kaka swi kuna na kutalaka munu mutindu yina.”

¹⁴ Beto zolaka vwanda na kisinza kuna na bayinti, mpe yandi zolaka vwanda kuna mpe kutuba, “Mbote, . . . mu banza. . . ya kele mbote mingi.”

¹⁵ Mu zolaka tuba, “Oh, Junie, mu—mu ke kuwa mutindu ‘ti mu tuba yawu samu na nge,’ beno me mona. Nge kele—nge kele malembe mingi samu na munu, beno me mona.” Mpe Nzambi pesaka yandi dikabu ya kuzonza na bandinga; mu me kuwaka ntete ve ndinga mosi dyaka pwelele na luzingu ya munu. Beno me mona?

¹⁶ Beno tala Yandi mbote na kati ya dibuundu. Beno monaka mwa kento yina kuzonza na suka yayi na kuzabaka ve kento yankaka yina? Mpe mosi na kuzabaka ve yankaka, mpe yandi yayi, mutindu ya ndinga yina tubaka kuna; mpe ntangu ba tendulaka yawu, na mutindu mosi, ba-voyelle, bantangulu-kidimbu; kaka mutindu mosi, kuvutukaka. Mpe nsangu vwandaka ya kulunga samu na dibuundu. Beno me mona mutindu ya kele? Ntangu yayi, beto fwana tonda Nzambi. Ntangu yayi, beno kunangula ve mapeka. Kana beno sala yawu, beno ke nika beno mosi, mpe dyabulu ke simba beno. Beno vwanda kaka ya kulemvuka; beno tuba, “O Mfumu, bumba munu, ti ata mbala mosi ve kubika munu kuzanguka na ntuala ya ntangu.”

¹⁷ Yandi ata mbala mosi ve ke bika beno na ngaanda ya lutumu. Kana beno sala, ntangu yankaka, yina ke sala ve—yina ke sala ve dyambu. Kana beno sala, oh, pasteur awa ke—ke tuba na beno. Beno me mona, makabu kele ve na kuvwanda na yina beno ke. . . na yina beto ke na kulonga. Bantangu mingi, kana makabu kukota mbote na kusalu na dibuundu, beto ke sala beno kukutana ntangu ya yinda ntete lukutakanu yankaka; ti Mfumu kusala na beno kuna, beno me mona, samu ti kuna na lweka yayi ya ke zenga ata fyoti ve ndinga. Ntangu yayi, na yina beto kele na kati ya dibuundu, bantangu yankaka beno fwana vwanda swi samu na mwa ntangu fyoti. Kasi kana Nzambi kele na nsangu, kisika mosi to yankaka Yandi ke basisa yawu, beno me mona, beno bika kaka Yandi swi, kasi beno sala yawu landila malongi ya Biblia. Mpe Mpangi Neville mu banza ke longi na zulu ya bima yango,

yina beto ke meka na kusala yawu. Mu ke meka na kusadisa ntangu nyonso beto lenda, beto zole kintwadi, kunata yawu mpe kulakisa beno mutindu ya kusadila yawu.

¹⁸ Nge ke na kuwa mbote mingi, mpangi ya munu ya bakala ya Pologne? Ya ke mbote. Oh, mutindu Mfumu sakumunaka yandi! Bamvula nana me luta, tubaka na yandi kima mosi zolaka salama. Yandi vwandaka yandi nyonso na kati ya poto-poto, muntu ya butatu ya kieleka ya kukangama. Mpe Mfumu tubaka, kilumbu yankaka yina, “Ya kele na muntu ke na kwiza, yandi kele na nsuki ya ndombe mpe na meso ya mbwaki, ya ngolo. Kuvutula yandi ve, Mu ke na kufidisa nge yandi.” Mu bakaka kaka Disonuku kisika yandi vwandaka na poto-poto, mu sonikaka yawu na kitini ya mukanda mpe tulaka yawu kuna. Mpe na manima ya mwa ntangu awa yandi me kwiza.

Kento ya munu tubaka, “Ya kele na muntu na ngaanda kuna samu na kumona nge.”

Mu tubaka, “Ya kele yandi, kotisa yandi.”

¹⁹ Mpe yandi—yandi tubaka na munu yinki kutubamaka na yandi na . . . na yisi ya lutwadusu ya Mpeve-Santu. Mutindu yandi ntangu nyonso ke kwikilaka mpe ke kangamaka na Nsangu, mpe nyonso yankaka, na kati-kati ya bantu ya yandi; ata ti kutonga, yandi me kangamaka na Yawu. Mu tubaka, kilumbu mosi me luta, na lukutakanu, ti mu zonzaka na yandi mpe bokilaka nkumbu ya yandi. Mpe mutindu mu tubaka nkumbu yango, mu zaba ve. Yandi tubaka mu zolaka ku—kutanguna yawu, to kima mosi to yankaka, na lukutakanu. Yandi tubaka ti yandi vwandaka ya kunangula bébé na diboko ya yandi yina vwandaka na breakout na kizizi ya yandi, mpe yandi tubaka ti mwana ya bébé kusukulamaka ya muvimba, kaka ya muvimba. Mpe mutindu Mfumu . . .

²⁰ Mpe mu tubaka, “Mbote, kima mosi yina nge kele na yawu nsatu ntangu yayi kele kukwenda na dibuundu mpe kuzwa mbotika na Nkumbu ya Yesu Klisto.”

²¹ Mu kutanaka na yandi mwa ntangu fyoti me luta na zulu ya mongo, samu ti yandi kulumukaka, kubotamaka na Nkumbu ya Yesu Klisto. Ntangu yayi yandi ke na kusepela, ke na kuwa mbote, na kuvutuka na yinzo. Mu banza ti yandi ke tendula samu na munu na ki-Polonais mosi ya bilumbu yayi, mpe na Allemagne, mpe kuna, kuna na bisika yina. Mfumu kusakumuna nge, mpangi ya munu ya bakala.

²² Bima mingi ya nene ya bimwama yina Mfumu ya beto ke na kusalaka! Kaka na kumona kyadi ya Yandi—ya Yandi, mutindu ke katuka esete, wesete, mpe node, mpe sude, Yandi ke na kutwadisaka bana ya Yandi ya luzolo; ke vukisa, ke basisa, ke ningisa. Kieleka mingi ya kutuba!

²³ Ntangu yayi, beno zimbana ve, na Lumingu ke kwisa na nkokila, kana Mfumu ya beto zola, Lumingu ke kwisa na

nkokila, beto ke vwanda na . . . Lumingu ke kwisa na suka, mu zola tuba, lukutakanu ya kubeluka. Ya kele samu na yina mu me tuba yawu samu na yawu, mu banza kuna kana ya kele na bantu mingi samu na Lumingu na suka mu ke vwanda na Lumingu na nokokila na kuvutuka, beno me mona. Kasi kana mu lenda basisa yawu nyonso na Lumingu na suka, mbote, mbote mingi.

24 Kilumbu ya tatu na nokokila kele lukutakanu ya bisambu ya kati-kati ya sabala. Ntangu yayi, samu na beno bantu yina kele awa na nziunga ya yinzo yayi, beno bantu beno vukana awa, beno kuzwa lukutakanu ya bisambu. Beno kondwa yawu ve, beno vwanda kaka na yawu, beno me mona. Mpe beno sambila, beno sosa na kubelama na Nzambi. Beno bika ve bufanatiki kukota na kati ya beno. Beno kangama. . . Ya kele kieleka na mingi ya kundima luvunu, beno me mona, beno kwenda ve—ve na lweka ya yimbi. Beno telama ngwi.

25 Mu me kuwa “Amen” mosi yina mu zaba mbote kuna yina mu kuwaka bamvula mingi, Mpangi Russell Creech. Ba me tuba na munu ti Patty vwandaka yandi yina zonzaka na bandinga na manima kuna na nokokila yankaka yina. Patty, wapi kisika nge kele? Nge yina, cherie? Yinga, oh, mu zolaka zaba yandi ve kana mu monaka yandi. Kasi mu ke kwikila mu simbaka mwana yango na maboko ya munu mpe byekaka yandi na Mfumu, kaka awa. “Mpe yandi kele ntwenya ya kento,” Meda tubaka, “ntwenya ya kento, ya kitoko, ntwenya ya kento,” na ngolo ya Mpeve-Santu na zulu ya yandi, na kuzonzaka na . . . Russell, nge kele muntu ya bimvwama. Yinga, nge kele.

26 Wapi kisika kele Mpangi-kento Creech? Mu me mona yandi ve. Yandi kele awa? Na manima kuna. Oh, Mpangi-kento Creech, mutindu mu ke vutula matondo ti Nzambi ve pesa nge mwana ya mutindu yina, na yina, nge ke na kubakula ve mutindu—mutindu ya kele kyese. Na mvula kisika bana ya bakento ya ntwenya kele na kuvwenza mpe ke na kuseka mpe ke na kulandila, beno zaba, na nkonga ya buzoba na bantu yayi, kuzenga nsuki ya bawu mutindu kivadangu mpe nionso, mpe mutindu yina; mpe mwa mwana yayi awa na ngolo ya Mpeve-Santu, ke na kuzonzaka na bandinga na kati awa. Oh, la la!

27 Hmm! Bantu yikwa na nokokila yayi, milongi ya Pantekote, bayina ke zola kupesa luzingu ya bawu ya muvimba kana ba lendaka mona bana ya bawu ya bakento ya ntwenya, bayina kele na ngaanda na feti ya rock-and-roll, kusala yawu.

28 Beno sepela kaka—kaka na yawu, mpangi ya bakala. Mu zaba yina beno ke na kusalaka kuna na Interstate, mu salaka kima mosi, kusalaka mingi kilumbu na mpasi, kasi, mpangi ya bakala. . . samu na kusansa bana yina. Kasi beno bambuka moyo, Nzambi kele ya kukwikama, Yandi ke pesaka musendo. Inga, tsyelika! “Mu ke pesa musendo.”

²⁹ Nzambi sakumuna nge, Patty. Cherie, mu—mu zolaka zaba nge ve kana mu monaka nge, mu banza, kasi kubika ata mbala mosi ve nzila yango ya mbote, cherie. Kubika ata mbala mosi ve ti diabulu kutula mosi—kima mosi na kati ya nge, mutindu pomme ya kitoko ya wolo, samu ti ya ke vwanda dilala ya ngayi, nge me mona. Losa kima yango mpe bika yawu mutindu yina. Telemisa kaka meso ya nge na zulu ya Klisto, kaka na Kulunsi. Mpe landila na kukwenda na ntwala, samu ti ngunga me belama. Beno me mona?

³⁰ Kieleka bima mingi ya kupusa mu lendaka tuba kaka, balusakumunu ya Nzambi. Mu me kuzwa ve lenda ya kutala bantu mingi, mpe sabala ya muvimba yayi mu me sambila ve samu na bantu kulutila makumi tanu, mu banza, mpe bakukota mpe kubasika, mpe mambu ya nswalu-nswalu mpe nyonso yina salamaka, mpe nyonso yankaka, kasi mu vwandaka ya kubakama na kutanga. Kasi ntangu yayi, Lumingu ke kwisa, beto ke vwanda na kusambila samu na bantu, mpe kulomba Mfumu na kukwisa kuna mpe kupesa beto ngolo ya nene, mpe ti kutalana Yandi mosi na beto Lumingu yina ke landa na suka, kana Mfumu kuzola.

³¹ Oh, mu ke zola kaka ve kubanda nsungi ya dibuundu yayi samu ti mu zaba ya kele yina ya nsuka ya bawu. Mpe ntangu yayi, na yayi, ya ke vwanda mupepe ya Bansungi Sambwadi ya Dibuundu. Beno me sepela na yawu? [Dibuundu me vutula, “Amen.”—Mu.] Ntangu yayi, beno bambuka moyo, mu ke tuba yayi na nsuka mutindu mu salaka na mbandukulu, ya lendaka vwanda na bima mingi, ya lendaka vwanda na mutindu ya kukangama na bima mingi yina beno ke vwanda ve ntima mosi na munu, kasi beno dasukila munu ve, beno me mona, beno zola kaka munu, na mutindu nyonso, samu ti ya ke sala ata luswaswanu ve na yina beno ke sala to yina beno ke tuba, mu ke banza kaka mutindu mosi na beno; kana kima, ya kulutila, beno me mona, kana kima mosi, mu ke banza mingi na beno. Kasi mu zola beno, Nzambi zaba yawu, ya kele ve na muntu yina lendaka bokila Nkumbu ya Yesu Klisto mpe ti mu ke zola yandi ve. Beno me mona?

³² Mpe mu ke zola ve ndudi mosi to kuswaswana, ata ti na mutindu ya kukangama beto lendaka vwanda na ntima mosi ve. Kana beto vwandaka na mesa mpe ti mosi ke na kudyaka mutindu mosi ya tarte, mpe mosi, yankaka, ya ke vwanda kaka mutindu kaka awa, beno me mona. Ntangu ya ke kumaka na kubundana na mosi na yankaka, beto ke zolaka mosi na yankaka. Mpe kana beto ke salaka yawu ve, kuna beto fwana sala yawu. Mpe kana . . . beto ke kwenda ntama mingi ve na Nzambi tii beto ke sala yawu.

³³ Beno zimbana kaka ve, beno zimbana ve ti dikabu ya kulutila nene na makabu nyonso kele zola. “Ata ti mu ke tuba bandinga ya bantu mpe ya bawanzio, kupesa nzutu ya munu mutindu

munkayulu, kubakula luzabu nyonso, mpe nyonso yankaka, mu kele kima mosi ve. Na yawu. . . Kasi ntangu ti yina kele ya kulunga, yina kele zola. . .” Kana makabu nyonso ya kimpeve me vukana ve kintwadi na zola, ya ke simba ve. Poto-poto nyonso yankaka ke tsyamuka, “Kasi zola ke landila ntangu nyonso.” Beno me mona, ya kele Ntete ya Corinthiens kapu ya 13.

³⁴ Ntangu yayi, na nkokila yayi, beto ke kota na nsungi ya dibuundu yayi ya nene. Oh, la la! Ntangu yayi, beto lendaka vwanda pene ya ngunga ya yivwa na baminuti kumi na tanu (na nkokila yayi). Mpe ntangu yayi kieleka beno lemvo kila samu ti beto kele ve na kisika mingi, kasi. . . samu na kuvwandisa muntu nyonso, kuzwa kiti samu na muntu nyonso, mu zolaka kutuba, kasi beto kele kaka na yawu ve, mpe mu banza ti kilumbu beto ke kuzwa.

³⁵ Kasi ntangu yayi mu ke zola kuyufula beno na kusala munu lemvo. Beno zaba ntelamanu ya munu mpe beno zaba yinki ya ke lomba munu kilumbu, beno me mona, mpe ngunga me belama. Beno me mona? Ntangu yayi, mu zola ti beno kusala yayi, beno sambila ntangu nyonso samu na munu. Mpe beno bambuka moyo, mu me vwanda ya kusungama mutindu mu zaba kuvwanda ya kusungama, beno me mona. Mpe mu me bakula ti mu kele dyaka ve mwana, mu me kuma na bamvula makumi tanu na mosi. Mpe mu—mu ntangu munu. . . mu lendaka kwenda ve kana ti Nzambi kubokila munu. Mpe mu ke kwenda nzila yina Yandi zola ti mu kwenda, mpe ya ke vwanda mutindu yina. Beno me mona? Kasi mu fwana vwanda ya kusungama mpe kutuba Kieleka, ata nyonso. Na yawu mu zaba ti ya kele bantangu yankaka kutambula ya muntu yandi mosi kaka, kasi ntangu nyonso yina Yandi kele na beno, wapi luswaswanu ya ke sala? Beno me mona?

³⁶ Ntangu yayi, ntete beto kota na nsungi ya dibuundu yayi ya nene, mu ke kumiyufula kana beto lendaka telema ntangu yayi samu na kisambu, kaka mwa ntangu fioti dyaka. Ya kele mutindu ya kubika beno kudibenda mpe kuwa mbote. Na lukutakanu ya nsuka yayi, ya kele. . . Bantu yikwa awa ke zola ti ba bambuka moyo na bawu na ntwala ya Nzambi? Beno telemisa kaka maboko ya beno na Nzambi, “Bambuka moyo na munu, O Mfumu, na nsuka ya nsungi. Ntangu luzingu nyonso ke mana, bambuka moyo na munu.”

³⁷ Tata ya beto ya Mazulu, beto kele na bandinga mingi ve samu na kuvutula matondo ya beto samu ti Mvwandulu ya Nzambi ya moyo yina me vwandaka na kati ya beto na sabala ya nsuka yayi, samu na bima yina beto me longoka na Nge, mutindu Nge me monana Nge mosi na beto na nzila ya ntangu, mpe mutindu Nge me kumisa Ndinga ya Nge pwelele samu na beto. Mutindu beto vwandaka vingila na Nge, mpe mutindu beto me—me meka na kulakisa zola ya beto, mpe me kondwa na kusala yawu, Mfumu, samu ti bandinga ya bantu ya kufwa lendaka ve kusala yawu. Na ku-. . . mpe samu na kuvulusa beto, mpe Nge. . . mpe

me pesa beto nsatu ya Nge. Samu ti ya kele ya kusonama na Ndinga, “Lusakumunu na bayina kele na nsatu,” (kuvwanda kaka na nsatu, ya kele lusakumunu) “nsatu mpe pwila samu na ludedomo.” Na yina Nge salaka kutuba ya nene yina, “Samu ti bawu ke vwanda ya kufuluka!” Ntangu yayi, beto ke kwikila yawu, Mfumu. Lemvokila beto bakifu ya beto.

³⁸ Mpe na yina beto ke kota na nkokila yayi na . . . na nsungi ya nsuka ya dibuundu, yina kele Laodicée, na manima beto me mona Masonuku mpe disolo kufwanana kaka ntangu nyonso kieleka. Na yawu, Tata, beto zaba ti kutuba ya profesu ya Nge ya nene awa, ya nsungi yayi ya nsuka, ya ke vwanda kaka mutindu bansungi sambanu yankaka kuvwandaka. Tata, mu ke sambila ti Nge ke bika Mpeve-Santu kukwisa na beto na nkokila yayi, ntangu yayi, mpe kusakumuna beto na yina beto ke vingila mingi na Nge. Na Nkumbu ya Yesu. Amen. Beno vwanda.

³⁹ Kana Mfumu zola, buku ke . . . ntama mingi ve mutindu beto lenda. Mpangi Leo ke na kubakaka yawu na bande manietiki, samu na kunata na . . . na kunata na sténographie, katuka kuna kubula na masini, na manima na buku.

⁴⁰ Mpe na nzila mosi, Rosella ke kuzwa buku ya yandi ntama mingi ve, *Munwi-malafu Yina Me Vuuka*. Beno nyonso ke bambuka moyo na disolo ya yandi, mutindu Mpeve-Santu kubokilaka yandi na lukutakanu. Mpe yandi vwandaka . . . ba mangaka yandi na ba-institution alcoolique ya kulutika nene, mpe ba mangaka yandi na balupitalu yina vwandaka kuna na Chicago. Mpe Mfumu Yesu, na mwa ntangu mosi fioti, kukatulaka yawu nyonso na yandi. Yandi ke katuka kaka na boloko na bisika yankaka, na kutubaka na bantu na mutindu ti Nzambi lendaka vulusa, yandi vwandaka tuba na binwa-malafu mpe nyonso yankaka. Yandi vwandaka . . . na nzila ya kimbangi ya yandi, nungaka bantu mingi samu na Klisto.

⁴¹ Ntangu yayi, nsungi ya dibuundu ya ntete, beno lenda tuba na munu yinki ya vwandaka? Éphèse. Ya zole? Smyrne. Ya tatu? Pergame. Ya yiya? Thyatire. Ya tanu? Sardes. Ya sambanu? Philadelphie. Ya Sambwadi? Laodicée.

⁴² Ya ntete vwandaka na kati-kati ya mvula 55 mpe mvula 170 ya ntangu ya beto, Éphèse. Smyrne, na mvula 170 na mvula 312. Pergame, na mvula 312 tii mvula 606. Thyatire, na mvula 606 tii mvula 520. Sardes, na mvula 520 na mvula 1750. Philadelphie, na mvula 1750 tii sambanu . . . 06; ntangu yayi, ya bandaka nsungi ya Laodicée, na kulutaka na yayi na yankaka, mpe mazono na nkokila beto kotaka na mwa kuluta na yayi na yankaka yina. Ntangu yayi, beto na nkokila yayi, beto ke baka nsuka ya Laodicée.

⁴³ Beto ke kwikila ti dibuundu ya Laodicée kubandaka na mvula 1906 ya ntangu ya beto. Mu ke samuna . . . Ntangu yayi, beno bambuka moyo, “kusamuna,” kulutika beno bayina ke

kuwa bande yayi. Mu ke tuba ve ti ya ke vwanda mutindu yina, kasi mu ke samuna ti ya ke suka na mvula 1977, ti dibuundu ke kota ya muvimba na apositazi mpe yinwa ya Nzambi ke losa yandi. Mpe Kwizulu ya Zole, to Enlevement ya Klisto, lendaka kwisa na ntangu nyonso. Ntangu yayi, mu lendaka kondwa yawu na mvula mosi, mu lendaka kondwa yawu na bamvula makumi zole, mu lendaka kondwa yawu na bamvula nkama. Mu zaba ve wapi ntangu ya . . . Kasi mu me samuna yawu kaka landila vision Yandi lakisaka munu, mpe na kubakaka ntangu, mutindu yawu ke kwendaka, mu ke tuba ti ya ke vwanda na ntangu mosi na kati-kati ya mvula 1933 na mvula 1977. Na—na mutindu nyonso, yinsi ya nene yayi ke kota na mvita mosi yina ke tsyamuna yawu na bombi, beno me mona. Ntangu yayi yina kele kieleka pene-pene, ya me belama mingi. Mpe mu lendaka zimbana, mu ke na kusamunaka. Muntu nyonso ke bakula? Beno tuba, “Amen,” kana beno me bakula. [Dibuundu me tuba, “Amen.”—Mu.] Beno me mona?

44 Kasi Mfumu me talisa munu vision ya kento ya nene ya ngolo, na mvula 1933, na mvula 1933, ya kele ya kusonika na mukanda. Na mutindu ti “Roosevelt ke sala . . . yandi sadisaka yinza na kukota na mvita.” Mutindu ti “Mussolini ke sala kubaka ya yandi ya ntete ya Ethiopie mpe yandi ke baka yawu, kasi yandi ke kuma na nsuka ya nsoni.” Mpe mutindu ti “Kuna ba-isme tatu: Nazisme, Fascisme, mpe Communisme, ke suka nyonso na kati ya Communisme.” Mpe bantu yikwa awa ke bambuka moyo ti mu landilaka kaka, beno telamaka, mpe ti beno tubaka na kuvutukilaka yawu, mu ke tuba na beno, “Beno tala mbote Russie! Beno tala mbote Russie, ntinu ya Node! Beno tala mbote Russie, ntinu ya Node! Beno tala mbote Russie, ntinu ya Node!”? Bantu yikwa kuwaka munu kutuba kaka, kuvutukila kaka yawu, kuvutukila na kutuba? Bantu ya ntama, beno me mona, kuna na kisika ya ntete ya dibuundu. Kutelama kaka kuna mpe kuvutukila na kutubaka yawu mpe kuvutukila na kutubaka, “Beno tala mbote Russie, ntinu ya Node! Beno mona, yina yandi ke sala, samu ti ba-isme nyonso yango ke vukana na Russie.”

45 Na yina mu tubaka, ti “Yinsi yayi na nsuka ke kota na mvita na Allemagne. Mpe ti Allemagne ke vwanda ya kutunga na kibaka ya sima.” Mpe yina vwandaka Ndilu ya Maginot, bamvula kumi na mosi ntete ba banda na kutunga yawu, bamvula kumi na mosi na ntwala. Mpe mu tubaka, “Ba-Américain ke kuzwa kubwa mosi ya mpasi mingi na ndilu yango.” Bayankaka ya bampangi awa vwandaka na ndilu yango, Mpangi Roy Roberson mpe bayankaka; beno yufula bawu yina kusalamaka. Kieleka bawu kuzwaka. Mbote mingi. “Kasi na nsuka,” mu tubaka, “beto ke nunga mpe ke vwanda mosi ya bayina ke nunga mvita na kati-kati ya beto mpe Allemagne.”

46 Ntangu yayi, mu tubaka, “Na yina na manima ya ntangu yina, ti science ke kwenda kieleka na ntwala.” Bawu kwendaka

na ntuala, bawu salaka bombe atomique mpe nyonso. Mu tubaka, “Na kati ya kukwenda ya bawu na ntuala, bawu ke sala . . . matoma ke banda ntangu nyonso na kukuma mutindu diki.” Mpe beno ke bambuka moyo na ba-capot ya nene ya ntama na mvula 1933, lweka ya nene ya manima vwanda wandaka mutindu yayi, pine na manima ya yawu? Beno tala mutindu ya kele ntangu yayi, beno me mona: nsobolo, beno me mona, mutindu diki. Mpe mu tubaka, “Na nsuka bawu ke sala ditoma yina bawu ke zola ve kuzwa volant na kati ya yawu. Mu monaka dibuta mosi kukulumuka . . . Mu ke bokila yawu ‘nzila,’ na kati ya ditoma yango zulu wandaka ya tala-tala, banzila na kutala wandaka ya nene ya mbote mpe matoma ya mbote. Mpe bawu wandaka ya kuvwanda, wandaka tala mosi na yankaka, mpe ditoma wandaka tambula na yawu mosi, kubaka bakubaluka mpe nyonso.” Mpe bawu kele na ditoma yango ntangu kaka yayi, ba me sala yawu yimeni. Ba me kuzwa ditoma yango. Mpe mu tubaka kuna, “Oh, mutindu science ke kwenda na ntuala na kilumbu yango!”

⁴⁷ Mu tubaka, “Na manima mu monaka . . . Bawu ke pesa muswa na bakento mpe ke na kupesaka bakento muswa ya kuvote. Mpe na kuvoteke, bawu ke soola muntu ya yimbi mosi ya bilumbu yayi.” Mpe beno salaka yawu na bavote me luta. Ya wandaka bavote ya bakento yina soolaka Kennedy. Beto zaba yawu, beno me mona, na kati-kati ya bamasini ya luvunu yina mpe bima yina ba yidikaka, yina FBI kulakisaka. Mpe wapi mutindu muntu lendaka . . . Samu na yinki bawu lenda ve kusala kima samu na yawu? Samu na yinki kima ke tubama ve? Ah! Bawu kele na boma samu ti bantu lendaka zimbisa bisalu ya bawu. Beno me mona, ya kele kaka nkonga ya bantu ya politiki, ya kubola tii na kati ya mukwa. Kaka yina. Kieleka!

⁴⁸ Ya kele ve—ve . . . ya kele ve, beno lemvokila munu. Ya kele ve na mpulusu na yinsi yayi, ya kele ve na mpulusu na yinsi mosi. Mpulusu kele na kati ya Yesu Klisto mpe kaka na Yandi! Uh-huh! Ya kele tsyelika. Ntangu yayi, mu ke vutula matondo na Amerika. Mu ke zola mingi kuzinga awa kulutila na kisika nyonso na yinza, samu . . . na ngaanda ya Canada. Canada mpe Etats-Unis kele mapasa, beto zaba yawu, bamfinangani yinsi, bisika ya kitoko, kasi mu—mu ke kwikila mu ke zola mingi kuzinga awa kulutila na kisika nyonso mu zaba, samu ti ya kele yinzo ya munu. Mu kele na kyese ti mu ke Americain, mpe mu ke vutula matondo samu na yawu. Kasi mu ke tuba na beno, kieleka ya kele na nsatu ya reveil yina ke telemina, kieleka ya kele na nsatu ya yawu. Mpe ya ke kuzwa yawu ve! Ve, tata. Yandi ke telama dyaka ata mbala mosi ve! Ve, tata. Yandi me kwenda! Beno ke bambuka moyo, pene ya bamvula tanu me luta na Chicago, ya kele na bande. Nge kele na yawu, Gene. Mu tubaka, “Bawu ke ndima Yawu mvula yayi, to bawu ke kulumuka ntangu nyonso.” Mpe bawu me sala yawu, beno

me mona, mpe bawu ke sala yawu tii yandi ke kutana na nsuka ya yandi.

⁴⁹ Kasi ya ke vwanda na kento mosi ya ngolo! Ntangu yayi, beno bambuka moyo! Yayi kele na bande, mpe. Kento mosi ya ngolo, kento ya nene, yandi ke vwanda Ntwadisi ya yinsi, to ya ke vwanda kento yina ke talisa dibuundu ya Catholika (yina mu banza ya kele) ke baka awa kilumbu mosi mpe yandi ke yala yinsi yayi. Yinsi yayi kele yinsi ya kento. Kento kusalaka dalapo ya yawu, ya kele lutangu ya kumi na tatu. Yandi bandaka, na bambwetete kumi na tatu, na banzila kumi na tatu, na bakoloni kumi na tatu. Nyonso kele kumi na tatu, kumi na tatu, kumi na tatu, ya ke landila. Bambwetete kumi na tatu na zulu ya dollar ya yandi ntangu yayi. Nyonso kele kumi na tatu. Ya kele lutangu kumi na tatu, mpe ke monika na kapu ya 13 ya Apocalypse. Ya muvimba kumi na tatu! Nyonso kele “kento, kento, kento, kento, kento” ya ke landila mutindu yina. Mpe yandi me baka bisalu nyonso. Yandi me baka Hollywood. Yandi me baka luyalu na zulu ya bayinsi. Yandi me baka luyalu na zulu ya bisalu. Yandi me baka kuyala na zulu ya nyonso yina kele; miswa mosi na babakala, ke sala bavote na babakala, ke finga mutindu babakala, ke kunwa mutindu babakala, nyonso yankaka. Mpe kele kaka mutambu samu na dibuundu ya Katolika, samu na nsambulu ya kento! Bawu ke na nsambulu yimeni kento, na mutindu nyonso.

⁵⁰ Yandi kele ya kulutula mbote. . . Kento ya kukondwa buzitu kele mutambu ya kulutula mbote yina dyabulu me kuzwaka ntete ve. Yandi kele yimbi kulutula banganda nyonso yina me vwandaka ntete. Yandi lenda fidisa myoyo mingi na difelo kulutula na banganda nyonso na yinsi. Ya ke kieleka.

⁵¹ “Kento ya mbote kele musanga ya ntalu na yimpu ya bakala,” kutubaka bakala ya kulutula ndwenga na zulu ya ntoto. Bakala fwana zitisa kento ya mbote, beno me mona. “Kasi ya yimbi yina kele maza na kati ya menga ya yandi,” mpe menga ya yandi kele luzingu ya yandi. Beno babakala yina kele na bakento ya mbote, beno zaba ve mutindu beno fwana tonda Nzambi samu na kento ya mbote! Samu ti kana Nzambi zolaka pesa kima ya kulutula mbote mutindu kisadisi, Yandi zolaka sala yawu. Kasi kento kele kisadisi ya kulutula mbote yina Nzambi lendaka pesa bakala. Kasi ntangu bawu ke balukaka. . .

⁵² Yandi vwandaka yandi yina na nsaba ya Eden yina Satana soolaka mutindu kisadilu ya yandi. Yandi bakaka ve bakala, yandi bakaka kento. Samu na yinki yandi kwendaka ve na Adam samu na kupesa yandi bansatu? Yandi kwizaka na kento mpe pesaka yandi, beno me mona, samu ti ya vwandaka yina yandi soolaka. Nzambi bakaka bakala, mpe Satana bakaka kento.

⁵³ Mpe beno tala nzila nyonso, mpe na nsuka. . . Ntangu ba tulaka Babylone na mbandukulu, *ba-Babylone Zole* ya Hislop,

kento! Ntangu ya ke kuma na nsungi; ntangu yayi ya ke na suka nsungi ya Bantu ya makanda. Babyлоне kubandaka mutindu yina, mpe ya sukaka na nsambulu ya kento (Marie) na dibuundu. Wapi kilumbu beto ke na kuzingila!

⁵⁴ Ntangu yayi, *Laodicée*, nsungi ya Laodicée, mpova zola kutuba “madidi ve tiya ve.” Ya me kuma mingi na bimvwama, mpe ke banza ti yandi ke na nsatu ya kima mosi ve. Kasi Biblia ke tuba ti yandi kele “mawa, mpofu, ya mpasi, mpe kimpene.” Wapi mutindu ya mvwandulu!

⁵⁵ Musendo na bayina ke nunga na nsungi ya dibuundu yayi, kele “kuvwanda na kiti ya kimfumu na Mfumu.”

⁵⁶ Ntangu yayi, mbwetete, to wanzio, to munati-nsangu ya nsungi ya dibuundu yayi, kele ya kuzabana ve.

⁵⁷ Ntangu yayi, munati-nsangu ya nsungi ya dibuundu ya ntete, nani ya vwandaka? Paul, Ephèse. Ya Smyrne? Irénée. Ya Pergame? Santu Martin. Ya Thyatire? Colomba. Ya Sardes? Luther. Ya Philadelphie? Wesley. Mpe na . . . ya Laodicée yayi, beto zaba ntete ve, mpe kukondwa ntembe beto ke zaba ve tii yawu ke suka.

⁵⁸ Kasi mu ke zola kaka kupesa kutuba ya munu na yina wanzio yayi ke vwanda, yina beto ke vingila. Ya ke vwanda mbote? [Dibuundu me tuba, “Amen.”—Mu.] Na yina beto kele na mwa ntangu, mu vwandaka me sonika mwa masonuku awa yina mu banzaka.

⁵⁹ Wanzio ya dibuundu ya Laodicée yayi, samu na kusukisa yawu. Ntangu yayi, yandi ke vwanda na nsuka ya nsungi, mutindu bawu nyonso yankaka, mutindu Biblia. Yandi ke vwanda na nsuka ya nsungi. Ve na ntonono ya yawu, na nsuka ya yawu, samu ti wanzio ntangu nyonso ke kwizaka samu na kusemba samu. . . bawu samu na yina bawu me sala. “Na—na wanzio ya dibuundu ya Laodicée sonika bima yayi.”

⁶⁰ Beno me mona, “Na wanzio ya dibuundu ya Smyrne sonika bima yayi.” Beno me mona, mosi na mosi kele na wanzio na nsuka ya wanzio. Paul, na nsuka ya wanzio. Mpe ke landila, na nsuka ya wanzio. Kuluta na yayi na yankaka, na nsuka ya nsungi. Nsuka ya nsungi, ya kele yina ke salaka yawu kuluta. Beno me mona, “Na wanzio,” na kuzonzaka yina vwandaka. Kuluta yayi na yayi na yankaka awa, “Na wanzio,” na nsuka ya nsungi yango. Beno me mona, na kubandaka kaka awa, kusalaka kuluta mutindu bimatinu na kumataka, Bansungi Sambwadi ya Dibuundu.

⁶¹ Ntangu yayi, wanzio yayi yina ke kwiza na kilumbu yayi, mu zola . . . Mu kele na kima ya kusonama awa, mu ke zola kaka kutanga yawu. Kasi yandi ke zabana na kitini ya nsuka ya nsungi. Mpe samu ti beto kele kieleka pene na yawu—kieleka pene na Nsemo ya nsungi yango, ti kukondwa ntembe yandi kele na zulu ya ntoto ntangu yayi. Beno me mona, beto zaba ve yandi. Yandi ke vwanda profete ya nene yina dibuundu ya yinza ke losa,

samu ti bawu ke landila kaka na masumu ya bawu mpe na nsuka ba ke losa bawu na yinwa ya Nzambi, na yinwa ya Mvwandulu ya Nzambi.

⁶² Mu ke kwikila ti yandi ke vwanda mosi mutindu Elie. Mu ke pesa ba-raison ya munu samu na yinki mu me tuba yawu. Ntangu yayi, beto luta awa na Buku ya Malachie, na mwa ntangu fioti, Mu ke tuba na beno samu na yinki mu banza ti yandi ke vwanda mosi yina ke vwanda ya kupakula na Mpeve ya Elie. Ntangu yayi, mu zola beno tula yimpu ya beno—ya beno ya lemvo ntangu yayi. Malachie, kapu ya 4. Ntangu yayi, beno kuwa na yina mu ke tanga, mpe beno na Biblia ya beno. Ntangu yayi, beno banza mbote-mbote ntangu yayi samu na mwa baminuti ke landa, ntangu yayi, ntete beto kota na nsungi ya dibuundu.

Samu ti, beno tala, kilumbu ke na kwiza, yina ke kuzika mutindu dibulu ya tiya; mpe bantu nyonso ya lunangu, yinga, . . . bayina nyonso ke salaka yimbi, ke vwanda mutindu matiti: mpe kilumbu yina ke na kwiza yina ke zikisa bawu, me tuba MFUMU ya basoda, mpe ti ya ke bikana na bawu ata musisa to kintala.

⁶³ Yinki Yandi ke na kutubaka? Yandi ke na kuzonzilaka na kilumbu yina ke na kwiza. Beno ke wisana na yawu? Na kilumbu ya nkwezulu ya Mfumu.

Kasi na beno . . .

⁶⁴ Ntangu yayi beno tala mbote, ntangu yayi Yandi ke na kuzonzaka na Israël. Ntangu yayi, yinki Yandi tubaka? “Samu ti, beno tala kilumbu ke na kwiza (na ntwala) yina ke yokama na tiya.”

Kasi na beno bayina ke zitisaka nkumbu ya munu ke telama . . . Mwini ya ludedomo na kubeluka na mapapu ya yandi; mpe beno ke basika, mpe ke kula mutindu bana ya bangombe na kidikilu.

Mpe beno ke tambula na zulu ya bantu ya yimbi; samu ti bawu ke vwanda mbombi na yisi ya makulu ya beno na ya- . . . na kilumbu yina mu ke sala yayi, me tuba MFUMU ya basoda. (Ve . . . Kilumbu yina Yandi ke yoka ntoto na tiya, beto ke tambula na zulu ya mbombi ya bawu. Yina kele Millenium, kieleka, beno me mona.)

Bambuka moyo . . . na misiku ya Moïse kisadi ya munu, yina mu tumaka . . . yandi na Horeb samu na ya Israël nyonso, na misiku mpe lusambusu.

Beno tala, mu ke fidisa beno Elie profete na ntwala ya nkwezulu . . . nene mpe ya boma ya kilumbu ya MFUMU:

Mpe yandi ke vutula bantima ya batata na bana, mpe bantima ya bana na batata ya bawu, na boma ti mu kwiza mpe kusemba ntoto na nsingulu.

Nsuka ya Ngwisani ya Ntama.

⁶⁵ Ntangu yayi, Yesu tubaka...na Matthieu 17:10, ke na kuzonzila na yayi. Ba-Juif nyonso ke na kuvingilaka na nkwezulu ya Elie yango. Ntangu yayi, beno tala mbote yina Yesu tubaka samu na yawu, na Matthieu 17:10. Beto ke banda na nzila ya 9, Matthieu 17:9:

Mpe na yina bawu kulumukaka na mongo, Yesu lombaka bawu, na kutubaka, Beno tuba na muntu ve... Beno tuba vision na muntu ve, (Beno me mona, "Beno tuba yayi ve. Beno zaba yawu, kasi beno bumba yawu samu na beno mosi.")...Beno tuba na muntu ve vision, tii Mwana ya muntu ke vumbuka...na lufwa. Beno tuba yawu ve.

Mpe bilandi ya yandi kuyifulaka yandi, na kutubaka, Samu na yinki kuna ke tubaka misoniki-misiku ti Elie fwana kwiza ntete? Samu na yinki ya kele Elie fwana kwiza ntete Klisto yayi ke kukwisa, Mwini ya ludedomo? Samu na yinki bawu tubaka mutindu yayi? Awa, Nge kele yimeni awa, mpe misoniki-misiku ke tubaka ti—ti Elie ke kwiza ntete.

Ntangu yayi, beno tala mbote:

Mpe Yesu vutulaka mpe tubaka na bawu, kieleka Elie fwana kwiza, ke kwiza ntete, mpe kuvutula mambu nyonso.

Kasi mu ke tuba na beno, Ti Elie me kwiza yimeni, mpe beno zabaka yandi ve, (Beno me mona, Yandi tubaka ve nani yandi vwandaka, beno me mona.) kasi me sala na yandi nyonso yina beno zolaka. Mutindu mosi ke vwanda mpe Mwana ya muntu ke tala mpasi na bawu.

Mpe bilandi bakulaka ti yandi vwandaka zonzila na bawu na Jean Mubotiki. (Ntangu yayi—ntangu yayi, Jean Mubotiki vwandaka Elie yina zolaka kwiza.)

⁶⁶ Ntangu yayi beno tala mbote, mu ke vutuka dyaka, na Malachie kapu ya 4. Ntangu yayi beno bambuka moyo, Yandi tubaka awa ti "Na ntuala ya Kilumbu ya nene mpe ya kutuba ve, ya boma ya Mfumu kukwiza, Mu ke fidisa beno profete Elie." Nzila ya 5:

Kasi mu ke fidisa na beno...profete...mu ke fidisa na beno profete Elie na ntuala ya nkwezulu ya nene mpe ya boma ya kilumbu ya...[Dibuundu me tuba, "MFUMU."—Mu.]

⁶⁷ Yinki beto ke tala "na Kilumbu ya Mfumu"? Na nsuka ya nsungi! Ya kele ntangu yinza ke yokama na tiya. Beno ke bambuka moyo mutindu beto talaka Yandi ya kulwata pelike ya mpembe, beno zaba, mpe—mpe ntulu ya Yandi, mpe ya mukangaka singa na ntulu. Beno ke bambuka moyo na yawu? Mpe beto lakisaka na nzila ya Biblia, ti ya vwandaka ve kilumbu

ya *saba* to *Lumingu*, ya vwandaka Kilumbu ya Mfumu. Ya kele kieleka? Mpe ya kele kilumbu yina Yandi ke kwiza mutindu Zuzi, “Mpe ke semba ntoto na nsingulu.” Ya kele kieleka?

Mpe mu ke fidisa na beno Elie profete na ntuala ya nkwezulu ya nene mpe ya boma ya kilumbu ya MFUMU:

⁶⁸ Ntangu yayi, beno tala mbote kuvukana ya Elie. Ntangu yayi, kana beno tala, Masonuku nyonso kele na bantendulu zolezole, “Kasi Yawu kele ya kubumbama na meso ya bantu ya ndwenga mpe ya mayele, mpe me monika na bana ya fioti yina zola kulonguka.” Beno ke kwikila na yawu ve? Ntangu yayi, beno vwanda kaka kuna na Malachie ya 4.

⁶⁹ Mpe ntangu yayi beto vutuka na Matthieu 2 kaka minuti, kaka lweka yankaka ya page, Matthieu 2. Mu banza ti mu zolaka tuba Luc 2 na kisika ya Matthieu 2. Mu kele na yawu ya kusunama awa, kasi mu vwandaka sala mbangu kaka mwa ntangu fyoti me luta, mpe Mpeve-Santu vwandaka na zulu ya munu na kati ya kivinga mpe mu vwanda kuzwa kaka samu na munu ntangu mosi ya nene. Na yawu mu zola kutuba . . . 2, beto tala kana yayi ke vwanda yawu. Ntangu yayi, beno bika munu kutala yawu mbote awa kaka minuti fyoti. Matthieu 2? Ya kele ve kisika mu ke na kusosaka, mutindu yina ve? Ntangu yayi, na mwa ntangu fioti, mu ke kota kaka na yawu . . . Beno bika kaka munu kuzwa mwa ntangu fioti awa samu ti kieleka mu zola beno kumona yawu, ti Disonuku kele na nsasa ya kulutula mosi na Yawu. *Kusambila ya Anne; Kuvutuka na Nazareth; Paki; Ministere ya Jean*. Ntangu yayi, beno bika munu kumona kana mu zolaka tuba Luc, mu vwandaka tanga kisika mosi mpe . . . Mu—mu zolaka tuba Marc na kisika ya Luc, ya lendaka vwanda Marc. Kasi mu zola beno kuzwa Disonuku yayi samu ti—ti beno kuzaba ti ya kele kisalu ya Mfumu, ti Yandi ke sala yayi na mutindu yayi. Ntangu yayi, mu ke tuba na beno kisika mu ke na kusosaka, kisika, “Mu me bokila mwana ya Munu na kubasika na Egypte.” Muntu kele na banote na lweka yina lenda kuzwa yawu na nswalu to kumona yawu? “Mu me bokila mwana ya Munu, na kubasika na Egypte, Mu me bokila mwana ya Munu.” Ntangu yayi, mwa ntangu fyoti.

⁷⁰ [Mpangi mosi ya bakala me tuba, “Luc 1:17.”—Mu.] Luc 1:17. Matondo na nge, mpangi ya bakala. Ya kieleka, Luc 1. Marc . . . Luc 1:17, na kisika ya 2. Mu zola kubaka nzila ya 14, ya kele kisika . . . Ya kele yawu, mpangi ya bakala. Ya kele kaka kieleka, Luc 1:17. Mbote mingi. Ntangu yayi, ntangu yayi beno lenda sonika yawu. Ntangu yayi, yinki ya kele, ya kele balusakumunu ya Mfumu, ti ya vwandaka ya kusakumuna.

Mpe nge ke vwanda na kyese mpe na nsayi ya kulutula; mpe mingi ke sepela na mbutukulu ya yandi.

Samu ti yandi ke vwanda nene na meso ya Mfumu, mpe ke kunwa ve vinu to malafu ya ngolo;

71 Muntu yayi yina ke na kwiza ba ke tuba na yandi tuka mbutukulu ya yandi na kunwa ve to na kuzwa kima mosi ve ya kusala na disumu mutindu yina. Benome kuwa yawu?

. . . mpe yandi ke vwanda ya kifuluka na Mpeve-Santu, kubanda na kati ya kivumu ya mama ya yandi.

Mpe mingi ya bana ya Israël yandi ke vutula na Mfumu Nzambi ya bawu.

Mpe yandi ke tambula na ntuala ya yandi na mpeve mpe ngolo ya Elie, samu na kuvutula bantima ya batata na bana, mpe bayina ke tumamaka ve na ndwenga ya kudedama; mpe samu na kukubika bantu na kukubama samu na Mfumu.

72 Ntangu yayi, ntangu yayi beto ke bakula ti yandi pesaka profesi, mpe Jean vwandaka muntu yango! Ya kele kieleka? Jean vwandaka Elie, ya kilumbu yina, yina zolaka kwiza.

73 Ntangu yayi, beto zaba diaka ti Disonuku bantangu yankaka ke pesaka bansasa zole. Ya ke tuba kima mosi, mutindu kuna na Matthieu kisika Yawu kutubaka, “Mu ke bokila mwana ya Munu na kubasika na Egypte.” Mbote mingi, mu banza ti ya vwandaka yina mu vwandaka sosa, “Mu me bokila mwana ya Munu na kubasika na Egypte.” Mpe kuna kana beno tala yawu “mwana” na banote kuna, Yandi vwandaka . . . ve . . . Ya vutukaka na Osée, yina zola kutuba ve Yesu, Mwana ya Yandi; ya vwandaka—vwandaka Israël, mwana ya Yandi, “Mu bokilaka Israël na kubasika na Egypte.” Kasi ya kele na bansasa mingi mpe luzabusu ya nene mingi na yawu na yina ya zola kutuba mpe kuzonzila samu—samu na nkwizulu ya Yesu, yina vwandaka nene mingi kulutula—kulutula na Israël, ntangu Yandi bokilaka Israël na kubasika. Mbote mingi.

74 Ntangu yayi, beto me tala mpe ti ya kele . . . na nkwizulu ya Yandi ya ntete vwandaka ve na Kilumbu ya Mfumu. Ya kele kieleka? Ntangu yayi, beto vutuka na Malachie, beto sungika yayi ntete, “Ke kwiza na Kilumbu ya Mfumu.” Ntangu yayi, beno tala mbote bambala ya nkwizulu ya Yandi, nkwizulu ya Yandi ya ntete mpe ya Yandi ya zole. Benome kubama na mabanza ya beno ya kimpeve? Na nzila ya 6 ntangu yayi, “Yandi ke . . .”

. . . Yandi ke fidisa . . . Elie . . . na ntuala . . . kilumbu ya nene mpe ya boma ya MFUMU: (Ya kele kieleka?)

75 Ntangu yayi, beto ke bakula ti ya vwandaka ve Jean, samu ti ya vwandaka ve Kilumbu ya Mfumu ya boma (ya vwandaka yawu?), mpe Yandi . . . to dyaka ti Yandi kuyokaka ntoto. Na yawu ya zolaka tuba ya ntete, to—to nkwizulu yankaka ya Jean na bilumbu na ntuala . . . to ya—ya Élie. Ya kele kieleka? Samu ti Yandi tubaka, “Mu ke fidisa Elie, mpe mu ke kuyoka yinza ya movimba na tiya, mpe mu ke sukula kaka yawu, mpe beno ke tambula na zulu ya mbombi ya bawu.” Yina kele Millenium, beto zaba yawu. Na manima bombe atomique ke mwangisa yawu

na bitini-bitini, kuna ya ke vwanda . . . ntoto ke sungama. Mpe ya ke vwanda na Kilumbu ya nene awa na zulu ya ntoto, mpe Dibuundu ke yala na Yesu na zulu ya ntoto bamvula funda mosi. Ya kele kieleka? “Kasi na ntuala ya Kilumbu yango ya nene mpe ya boma ya Mfumu, ntangu ba ke mwangisa yawu, Mu ke fidisa beno profete Elie.” Ya kele kieleka? Na yawu ya zolaka tuba ve Jean Mubotiki na kitezo yina, samu ti Kilumbu ya boma ya Mfumu wandaka ve kuna, mafunda zole ya bamvula na mantwala. Ya kele kieleka?

⁷⁶ Ntangu yayi, beno tala mbote nzila yina ke landa. Mpe kana beno ke vwanda kieleka ya kimpeve ntangu yayi; ntangu yayi, yayi kele mukanda ya zola, mpe beno fwana tanga na katikati ya banzila mpe kuna ya ke kuma ya kusungama. Beno zaba yina mu zola kutuba. Beno bambuka moyo mutindu mu tubaka, Disonuku yina, “Yesu tondaka Nzambi samu ti Yandi bumbaka Yawu na bantu ya ndwenga (na meso) mpe ya mayele, mpe monisaka Yawu na bana ya fioti.” Ntangu yayi, mu ke fwanikisaka yawu bambala mingi na kento ya munu ntangu yandi ke sonikaka munu mukanda; Mu lendaka mona yina yandi ke tuba na mukanda, kasi mu ke tanga na kati-kati ya banzila na kuzaba yina yandi ke zola kutuba, beno me mona, samu ti mu zola yandi mpe mu—mu zaba nkadulu ya yandi. Mpe beno fwana zaba nkadulu ya Nzambi mpe kuzola Yandi, kuna Masonuku ke zibuka kaka na beno. Yandi ke monikisa Yawu.

⁷⁷ Ntangu yayi, beno tala mbote nzila yina ke landa:

Mpe yandi ke vutula bantima ya batata na bana,
(Ntangu yayi, beno tala mbote.) *mpe bantima ya bana*
na batata, . . . (Beno me mona?)

⁷⁸ Ntangu yayi, ntangu Jean kwisaka mutindu Elie, yandi vutulaka bantima ya ba-Israélite, bantima ya bana yina vwandaka ndima kuna nsangu ya yandi, bantima ya batata na bana. Kasi ntangu yandi ke kwisa ntangu yayi, yandi ke vutula bantima ya Dibuundu na batata ya Pantekote. Beno me mona, ya kele yina me fwanana na yina me fwanana na yina. Beno me bakula yawu? Ntangu yayi, beno tanga Yawu!

⁷⁹ Ntangu yayi, beno kuwa mbote ntangu yayi:

Mpe yandi ke vutula bantima ya batata na bana, . . .

⁸⁰ Na nganga-Nzambi ya ntama ya orthodox; yandi ke tuba na bawu ti, “Kasi, Nzambi kele na kiyeka na matadi yayi awa na kusansa bana na Abraham. Beno ke banza ve ti beno lenda . . .” Beno me mona? Ntangu yayi, yandi ke baka bantima ya kukangama ya nganga-Nzambi ya ntama ya orthodox mpe kuvutula bantima ya bawu na Lukwikilu yina bana vwandaka na yawu awa. Beno me mona, “Ntangu yayi, bayina nyonso kuzwaka mbotika mpe ke na kuingilaka na nkwezulu ya Mesiya. Nani me pesa beno malongi, beno nsungi ya banyoka, na kukima

nganzi yina ke na kwiza?” Oh, la la! Beno me mona, “Yandi vwandaka vutula bantima ya batata na bana.”

81 “Mpe bantima ya bana na batata.” Ntangu yayi, ntangu Elie ya nene *yayi* ke kwiza na nsuka ya nsungi yayi, yandi ke baka Nsangu ya Pantekote samu na kuvutula bana na Lukwikilu ya batata, samu ti yandi ke vwanda na kusemba bawu samu ti bawu bumbaka ve Lukwikilu mosi yayi yina vwandaka ntama kuna na mbandukulu. Amen! Ntangu yayi, mu ke kwikila ti beto ke bakula mbote ti ya ke vwanda Elie. Ve? Ntangu yayi beto zaba yawu.

82 Mpe ya kele. . . Ntangu yayi beno me mona, Kilumbu ya boma ya Mfumu me kwiza ntete ve. Mu vwanda kumiyufulaka, “Muntu yayi ke vwanda kaka mulongi, kuna?” Elie kusalaka mutindu nyonso ya bimangu, kulongaka ve. Kasi ntangu Mpeve ya yandi vwandaka na zulu ya Jean, Yawu salaka nyonso kulonga mpe ata bimangu ve. Samu na yinki? Yesu zolaka landa yandi, Yandi zolaka sala bimangu, “Samu ti Mwini ya ludedomo ke telama,” yandi tubaka, “na kubeluka na mapapu ya yandi.” Na yawu Jean vwandaka ve na nsatu ya kusala bimangu, yandi samunaka kaka nkwizulu ya Klisto. Mpe bawu. . .

83 Ntangu yayi, beno bambuka moyo, mpe Jean yayi. . . to na Elie yayi yina ke kwiza, ba ke bakula yandi mbote ve, yandi ke vwanda muntu ya nene mingi na ntwala ya Mfumu ti bantu ke banza ti yandi kele kieleka Mesiya.

84 Samu ti bankundi ya yandi ya kieleka tubaka na yandi, “Nge kele Mesiya.”

85 Yandi tubaka, “Mu kele ve ya kulunga na kuzibula basapatu ya Yandi, kasi Yandi ke na kwiza na manima ya munu!”

86 Samu ti bawu vwandaka vingila, kuna, samu na kumona Mesiya, bawu banzaka ti Mesiya vwandaka kwiza. . . Ntangu bawu monaka muntu yayi ya mutindu yankaka kutelema na kati ya bawu, bawu tubaka, “Yandi kele Mesiya.”

87 Jean tubaka, “Mu kele ve Yandi! Kasi Yandi ke na kwiza na manima ya munu!”

88 Oh, la la! Beno me bakula yawu? Na yawu bankundi ya yandi ke banza ti yandi kele Mesiya.

89 Ntangu yayi, beno tala kima yankaka yina ke salama, nkadulu ya yayi, yandi ke kwiza kaka na ntwala ya Kilumbu ya Mfumu. Ntangu yayi, ntoto kunyengaka ata mbala mosi ve na bilumbu ya Jean, na yawu ya kele na bilumbu na ntwala. Ntangu yandi kwizaka na mbala ya ntete, yandi longaka kaka; na mbala ya zole, yandi—yandi ke sala nyonso zole kulonga mpe bidimbu yina silaka Yesu Klisto. Mbote mingi, ntangu yayi, beto tala na nkadulu, yinki ya ke vwanda, nkadulu ya profete yayi yina ke kwiza.

⁹⁰ Ntangu yayi, beto ke sepela ti wanzio ya nsungi yayi ya dibuundu ya nsuka, yina Ngwisani ya Ntama kuzonzilaka na ntete; ntangu yayi, bayankaka ya bawu vwandaka ve. Paul, Irénée, ba zonzilaka ve na ntete na bawu. Kasi nsungi yayi ya nsuka, na nsuka ya nyonso, na nsuka ya yinza, ya ke vwanda ntangu mosi ya mutindu yankaka yina kele kaka na ntuala ya beto, na yawu wanzio yayi ya nsungi yayi ba kuzonzilaka na ntete na yandi nzila nyonso na Masonuku, Masonuku ya Ntama, na nsuka ya nsungi yayi. Ya kele Elie, muntu ya nene ya kukusa.

⁹¹ Ntangu yayi, beno tala mbote! Wapi mutindu ya nkadulu Elie ke vwanda na yawu? Na ntete, yandi ke vwanda profete ya ngolo ya kieleka na Ndinga ya Nzambi, samu ti Elie vwandaka ya kieleka, mpe Jean vwandaka ya kieleka. Ya kele kieleka. Na kusalaka bidimbu mpe mambu ya ngitukulu, ke vutula bantima ya bana na Lukwikilu ya batata ya Pantekote. Yandi ke yina ba-denomination mutindu Elie salaka. Ya kele kieleka, yandi ke sala yawu! Mu banza ti kima yango samu na yandi me banda kaka ntangu yayi; ya me kuma ntangu ti ya banda. Yandi ke yina ba-denomination! Elie kuyinaka yawu, mpe mutindu mosi Jean kuyinaka denomination.

⁹² Jean tubaka, “Beno kwiza ve, na kubanzaka, ‘Ntangu yayi beto kele na Abraham mutindu tata ya beto.’ Beno ba-Pharisien mpe ba-Sadducéen, beno nkonga ya banyoka! Banyoka na matiti,” na nzonzolo yankaka. “Samu ti mu ke tuba na beno, Nzambi kele na kiyeka na matadi yayi na kutelemisa bana samu na Abraham.”

⁹³ Elie tubaka, “Bawu nyonso me zimbana, bawu nyonso! Muntu mosi ve me bikana kasi munu kaka.” Oh, la la!

⁹⁴ Yandi ke yina mpe bakento kele malala! Elie salaka yawu: Jézabel. Ya kele kieleka? Jean salaka yawu: Hérode. Bawu zole bapofete, Mpeve, Mpeve mosi. Bawu yinaka yinza ya ba-dénomination, dibuundu ya yinza. Bawu kuyinaka, mpe, malala, bakento ya mbote ve. Bawu . . . Kima mosi na kati ya bawu vwandaka boka na kuteleminaka kima yango! Jézabel vwandaka na manima ya yintu ya Elie mpe zolaka zenga yawu; mpe yandi kuzwaka mpe mpe zengaka yintu ya yango ya Jean, Hérode salaka yawu. Bawu zole!

⁹⁵ Profete yayi ke vwanda muntu ke zola ntoto ya kuyuma! Mutindu Elie, Yandi vwanda vwandaka na ntoto ya kuyuma, yandi mosi. Jean, na ntoto ya kuyuma, yandi mosi. Na yina beto ke zaba ti ya ke vwanda Elie. Mbote mingi.

⁹⁶ Mpe profete yayi ke vwanda mosi yina ke vwanda na Ndinga ya kieleka ya Nzambi. Yinga, yandi ke vwanda na Yawu, na Ndinga nyonso. Samu na yinki? Samu na kuvutula Lukwikilu (na dibuundu ya Ephèse) yina kuzimbanaka ntangu nyonso yayi, Lukwikilu, na dibuundu yina vwandaka na “Kyelo ya kuzibuka” ya kutula na ntuala ya yawu mpe mangaka Yawu.

⁹⁷ Ve muntu yina longokaka. Elie vwandaka ve muntu yina longokaka, muntu ya Thischibite yayi. Jean vwandaka ve muntu yina longokaka. Luc 1:67, Biblia ke tuba ti yandi vwandaka. . . “Ti mwana vwandaka na kati. . . ntangu kaka yandi zolaka butuka, yandi kwendaka na ntoto ya kuyuma, yandi vwandaka na ntoto ya kuyuma tii kilumbu ba zolaka lakisaka yandi na Israël.” Ya kele kieleka. 1: . . . Luc 1:67 tii na nzila ya 80, kana beno zola kusonika yawu.

⁹⁸ Profete yayi ke vwanda mpe mutindu mosi ya muntu yina nkadulu ke sobaka. Elie, na manima yandi me kuzwa lukutakanu ya nene, muntu mosi zolaka kutambula na yandi. Elie vwanda dasukaka. Ntangu yandi kwendaka kuna mpe bokilaka tiya na mazulu mpe tulaka tiya ba-autel ya Baal mpe nyonso, yandi kimaka na ntoto ya kuyuma mpe tubaka, “Mfumu, mu kele ve mbote mingi kulutila na batata ya munu, ti mu kufwa.” Ya kele kieleka? (Mpe Jean. . .) Yandi—yandi vwandaka na yisi ya yinti ya genêt, mpe na manima ya reveil ya nene, ntangu yayi yandi zolaka kufwa.

⁹⁹ Mpe Jean, ntangu ba losaka yandi na boloko (kento ya yimbi yayi) yandi vwandaka na manima kuna mpe bandaka na kudasuka. Mu ke banza ti Pember to mosi ya bawu tubaka, “Disu ya yandi ya ngononi kumaka ya kufuka, na boloko.” Yandi fidisaka ndambu ya bilandi ya yandi.

¹⁰⁰ Mpe, mbote, yandi zabisaka, na kutubaka, “Beno tala Mwana-dimeme ya Nzambi yina ke katulaka disumu ya yinza.” Jean monaka Dikunzi ya Tiya na zulu ya Yandi, mutindu Yembe, mpe kulumuka, kutelama na zulu ya Yandi. Yandi pesaka kimbangi ya nyonso, mpe tubaka, “Yina kele Mwana-dimeme ya Nzambi!” Mpe yandi tubaka, “Mu zolaka vwanda ya kubotama na Nge, mpe samu na yinki Nge ke na kwiza na munu?”

Yesu tubaka, “Bika ti ya vwanda mutindu yina ntangu yayi.”

¹⁰¹ Kasi ntangu ba tulaka yandi na boloko, yandi kotaka kieleka na mawa. Beno me mona, na mwa mpasi, na mpasi yandi lendaka na kuvutuka na yandi mosi. Mpe na yina ba salaka, yandi tubaka, “Beno kwenda yufula Yandi kana Yandi kele kieleka Yandi yina, to beto fwana vingila na yankaka yina ke kwiza?” Kaka mutindu Elie kusalaka, beno me mona, kaka mutindu mosi.

¹⁰² Yandi, kele mutindu ya muntu yina nkadulu ke sobaka, na yawu beto ke kuwa kyadi samu na yandi samu ti beto zaba yinki ya kele. Mbote mingi.

¹⁰³ Ntangu yayi, ntangu yayi na. . . Dibuundu, na kotalana ya yandi. . . Mu ke sala mbote na kubika yawu. Na kotalana ya yandi, Dibuundu. . . Ntangu yandi ke sala yandi mosi kuzabana, Elie ya ngolo yayi yina Nzambi fidisa beto, ntangu yandi ke sala yandi mosi kuzabana mutindu Elie kusalaka, Dibuundu vwandaka ya kukubama samu na kuvuluswa, kuvuluswaka na maboko ya bumpani. Ya kele kieleka? Kaka ntangu yandi mataka

kuna mpe tubaka, “Beto ke lakisa nani kele Nzambi,” Elie vulusaka Dibuundu. Mpe Jean, kaka mutindu Jean kusalaka, yandi tubaka ntangu yandi monaka Yesu, yandi tubaka, “Mu fwana kuluka mpe Yandi fwana zanguka.” Jean bandaka na kulonga, kusalaka yandi mosi kuzabana kaka na ntuala ya nkwezulu ya Mfumu. Kaka na nsuka, kumonisama. Mbote mingi.

¹⁰⁴ Ntangu yayi, beto me tala ti Elie zolaka tuba nsungi yayi na Dibuundu yayi. Samu na kulakisa ti ya vwandaka Elie: Elie na manima yandi pesaka profesi ya yandi, Elie zolaka kufwa ve, ba zangulaka yandi mpe ba nataka yandi na Mazulu; kifwanukusu ya Dibuundu (na nsuka ya Elie yayi yina ke kwiza, na nsuka ya ntangu *ya yandi*), Dibuundu ke kwenda na Enlevement, kukondwa kulutula na bivudi ya lufwa. Ya ke vwanda Enlevement! Mu ke kwikila ti Elie ya nene, muntu ya nene yina ke kwiza, ke vwanda Elie ya kupakula yina pesaka profesi ya bilumbu ya nsuka. Amen! Mu banza ti yandi ke vwanda, ntangu yandi ke kwiza, wanzio, to munati-nsangu na dibuundu na bilumbu ya nsuka (bantu yina ba me losa, ya kubeba, mutindu dibuundu yayi ke kuma, mpe yandi ke yimeni). Mu banza ti Elie kele ya kusila na kati ya Biblia. Mu banza ti beto lenda bakula yawu, ti Elie vwandaka yandi yina ba silaka na kati ya Biblia ke kwiza na kilumbu yayi. Beno ke kwikila yawu?

¹⁰⁵ Ntangu yayi, beto baka Laodicée mpe beto ke mona yina Mfumu ya beto ke tuba na beto na nkokila yayi samu na Laodicée, na Laodicée. Mbote mingi, mbote na dibuundu:

. . . na wanzio ya Mfumu . . .

¹⁰⁶ Na nzila ya 14 ya kapu ya 3 ya Apocalypse:

*. . . na wanzio ya dibuundu ya Mfumu . . . ya . . .
Laodicée sonika; Bima yayi yina ke tuba Amen, mbandi
ya kukwikama mpe ya kieleka, mpe mbandukulu ya
ngidikulu ya Nzambi;*

¹⁰⁷ Oh, la la! Beto kele na nyonso . . . Kana beto vwandaka na mpimpa nyonso kaka kuna, mutindu Mfumu zolaka monisa yawu na beto! Beno tala mbote!

¹⁰⁸ “Amen” kele “ya Nsuka.” Yandi kumonikaka nzila nyonso, mpe na mitindu yankaka, kasi awa kele nsungi ya dibuundu ya nsuka kisika ya ke tuba, “Mu kele . . . Yayi kele nsuka, mu kele Nsuka.”

¹⁰⁹ Ntangu yayi, samu na kulakisa ti Yandi vwandaka “ya Ntete” mpe, mutindu Yandi vwandaka, Yandi kele “mbandukulu ya ngidikulu ya Nzambi.” Oh! Beno ke na kubakula Yawu? Beno me mona? Wapi mutindu Nzambi zolaka vwanda ya kuvanga kana ti Yandi kele Mpeve? Wapi mutindu Yandi zolaka vwanda? Yandi kele—Yandi kele Seko! Yandi ata mbala mosi ve kuvwandaka ya kuvanga, Yandi ke vwanda ata mbala mosi ve ya kuvanga, samu ti Yandi vwandaka Nzambi na mbandukulu. Kasi

Yandi kele yina kele “mbandukulu ya ngidikulu ya Nzambi” vwandaka Yesu Klisto ntangu Yandi salaka kutalana, ntangu Nzambi vwandaka zinga na kati ya Yandi. Yandi kele *kivangu* ya Nzambi! Oh, la la! Beno me mona, “Ya Ntete mpe ya Nsuka; Amen, mbandukulu ya ngidikulu ya Nzambi.” Ntangu Nzambi vangaka samu na Yandi mosi nzutu, Yandi kulumukaka mpe zingaka na kati ya yawu, yina kele mbandukulu ya ngidikulu ya Nzambi. Beno me mona? Oh, Yandi kele ve mbote?

¹¹⁰ Ntangu yayi, beto talaka na ntete, Yandi lakisaka Buzambi ya Yandi kaka *awa*, “Mu kele ya Ngolo nyonso! Mu kele Yandi yina Vwandaka, Yina Kele, mpe Ke Kwiza. Ya Ngolo nyonso!” Na dibuundu ya Ephèse, tubaka yawu bambala tatu. Ya kele kieleka? Me landila kaka tii na Laodicée mpe me tuba, “Mu kele Amen. Mu vwandaka ya Ntete *awa*, mu kele ya Nsuka na lweka *awa*. Mpe mu kele mbandukulu ya ngidikulu ya Nzambi. Na nzila nyonso ya bansungi ya dibuundu yina beto ke kuzwa, beno ke longuka ti Mu kele Nzambi, Nzambi ya kuvangama na kati ya nzutu ya muntu. Mu kele mbandukulu ya ngidikulu ya Nzambi!” Amen.

¹¹¹ Yina ke sala Presbytérien kuboka. Beno banza kaka na yawu! “Mbandukulu ya ngidikulu ya Nzambi.” Ntangu yayi, mu . . . Oh, mutindu mu zola yawu, “ngidikulu ya Nzambi,” ntangu Nzambi vangaka, ntangu Nzambi kumaka nsuni na kati ya Yesu Klisto mpe zingaka na kati-kati ya beto.

¹¹² Ntangu yayi—ntangu yayi, nzila yina ke landa ke vwanda (samu na mabuundu yankaka) kutuma, kasi Yandi tumaka ve dibuundu yayi. Yandi vwandaka na dyambu ya kutelemina yawu, kutuma ve. Yandi pesaka muswa yayi ve samu na kima ve, nsungi ya Laodicée yayi. Na Nsemo yina nyonso bawu kuzwaka, mpe ba vutukaka na Yawu, bawu vwandaka na nsatu ya kutuma ve. Uh-huh. Bawu vwandaka na nsatu ya kusemba, mpe bawu kuzwaka yawu! Yandi vwandaka na dyambu na dibuundu yayi, kutuma ve.

¹¹³ Ntangu yayi mu zola kutanga nzila ya 15 mpe nzila ya 16 awa ntangu yayi:

Mu zaba bisalu ya nge, . . . nge kele to madidi to tiya ve: mu ke zola ti nge kuvwanda madidi to tiya. (Na nzonzolo yankaka, “Kuvwanda kaka ve—ve madidi ve tiya ve.”)

Na yawu na yina samu ti nge kele mwa-tiya ve, mpe to madidi to tiya ve, mu ke luka nge na yinwa ya munu. (Hmm!)

¹¹⁴ Ba longaka . . . Yina kele kutuma? Yina kele kusemba na nsungi ya yimbi yayi ya Laodicée, nkonga ya muvimba ya kulutila yimbi. Bayankaka ya bawu nyonso na yisi ya kukwamisa mpe nyonso bawu kuzwaka; bawu vwandaka na kima ve, bawu vwandaka kieleka na kati ya mpasi, vwandaka yenga-yenga bisika nyonso na bampusu ya mameme mpe bampusu

ya bankombo, mpe ya kukondwa na nyonso, mpe ya kuzenga na scie mpe kufwaka ya kuzika, pesamaka madia na bankosi, mpe nyonso yankaka, mpe dyaka kangamaka na Lukwikilu. Mpe nkonga yayi kele na “bimvwama mpe kele na nsatu ya kima ve,” mpe nyonso yankaka, mpe kele ndumba! Ya kele kieleka.

115 Ntangu yayi, beto kele na dilongi mosi ya nene, mu banza ti Mfumu ke sadisa beto. Yandi—Yandi tubaka, “Samu ti nge kele to tiya to madidi ve, mwa-tiya.”

116 Mutindu miliki, beno me mona. Miliki ya mbote ya madidi kele mbote. Mutindu yina ve? Miliki ya tiya kele mbote samu na beno. Kasi miliki ya mwa-tiya ke sala beno kuluka.

117 Mu ke bambuka moyo na nkokila mosi mu belaka, kuna na nzadi, pene ya bamvula makumi zole na tanu me luta. Mu vwanda zingaka na mwa masuwa mosi ya kifwede ya fioti, kuna. Mu belaka, mpe bawu mataka, bokilo ya munu ya bakala nataka munu na Docteur Isler. Yandi tubaka, “Wapi dyambu?”

Mu tubaka, “Mu ke na mpasi mingi na kifundu ya munu!”

118 Yandi tubaka, “Kunwa kopo ya tiya ya miliki.” Oh, mpangi! Miliki ya mwa-tiya, ya belusaka munu, na yawu mu sukulaka kaka yawu nyonso na kubasisaka yina vwandaka na kati.

119 Ntangu yayi, Nzambi tubaka, “Mu ke zola mingi ti nge vwanda tiya, kieleka tiya ya mbwaki, to galasi, kuvwanda mosi to yankaka. Kuvwanda ve mwa-tiya, samu ti nge ke kumisa Munu ya kubela.”

120 Ya kele yina nsungi ya dibuundu yayi ke na kusalaka na Nzambi, ke kumisa Yandi ya kubela! Beno me mona? “To vwanda . . . Ve . . . To . . . kuvwanda ve mbwaki . . . To vwanda tiya ya mbwaki to . . . Kuvwanda madidi ve tiya ve! Yina me toka to ya tiya; samu ti nge ke sala Munu kuluka.”

121 Madidi ya dibuundu ya ba-Anglicane na bilumbu ya John Wesley nataka yandi na kuzwa balukutakanu bisika yankaka, samu ti yandi vwandaka madidi, madidi mingi.

122 Madidi ya dibuundu ya ba-Méthodiste salaka ti William Booth kukuma malisali ya tiya ya mbwaki. Beno me mona, Nzambi tubaka, “Kana nge kwiza ve mpe nge balula ntima ve, mu ke katula mwinda. Mu ke basisa yawu, mu ke pesa yawu na muntu yankaka.” Na yawu ntangu dibuundu ya ba-Méthodiste kuzolaka ve kuyamba kusantisama ya John Wesley, William Booth me kwiza mbala mosi na Armée du Salut mpe me landila kaka. Ya kele kieleka. Samu na yinki? Bawu kubongisaka yawu! Ya kele kieleka. Me sala organisation na yawu, mpe Nzambi tubaka, “Mu yina kima mosi yina!”

123 Na yawu . . . William Booth me kwiza mpe me telemisa yawu, mpe Armée du Salut, na manima yinki yandi salaka? Kima kaka mosi, me baluka mpe me bongisa dyaka yawu. Na manima ya yandi me kwiza ba-Campbellite, mpe bawu zingaka mwa ntangu

fyoti; mpe na manima John Smith na ba-Baptiste; mpe kuna na manima ya yawu me kwiza ba-Nazaréen; mpe kuna na manima ya ba-Nazaréen me kwiza Pantekote.

¹²⁴ Ba-Nazaréen, yinki bawu salaka? Bawu bongisaka ya bawu mutindu kaka mosi, na kusalaka dénomination na yawu.

¹²⁵ Yinki salamaka na ntangu yina? Mwa bintala zole, Dibuundu ya Nzambi mpe nyonso yankaka, me basika kuna. Yinki bawu salaka? Kubongisaka; kubikaka kaka bawu kukwenda.

¹²⁶ Na manima kwizaka ba-Pentecotiste na lusakumunu ya mvula ya nsuka, yinki bawu salaka? Kubongisaka, na yawu Yandi bikaka kaka bawu kukwenda. Ya kele kieleka.

¹²⁷ Ntangu yayi beto ke kuma awa na nsuka, beno ke kuzwa kima mosi ya ngolo mingi na baminuti fyoti. Mbote mingi.

¹²⁸ Mbote mingi, Yandi zola nge ya tiya ya mbwaki to—to ya galasi, mosi to yankaka. Kuvwanda ve mwa-tiya! Kufwanikisa ve kima yina nge kele ve, to kuvwanda ya tiya samu na Nzambi to kuvutuka na—na organisation. Kuvwanda mwa-tiya ve—ve!

¹²⁹ Ya kele kima mosi ntangu yayi! Ya kele kima mutindu mosi yina kusalamaka na . . . na mabuundu yayi awa. Yandi ke zola nge to tiya to madidi. Yandi zola ve “madidi ve tiya ve.” Ya kele kisika yina Pantekote me kuma, na mvwandulu ya mwa-tiya. Bawu ke baka piano mwa bantangu yankaka, mpe mwa bangoma, mpe ke bula kuna mwa fyoti; mpe ke kuzwa mwa muziki ya kulunga, muntu ke mata mpe mutindu ya . . . beno zaba, na kutubaka mutindu, “Lukumu na Mfumu! Alleluia!” Uh-huh. Mpe muziki ke kulumuka, “UH, Uh, uh, *uh*,” yawu yina. Oh, la la, ya ke sala kaka Nzambi kubela na kifundu ya Yandi! Beno me mona? Uh-huh. Mbote mingi.

¹³⁰ Ya kele ve na kima ya nene kuna yina ke na kusalamaka, mutindu—mutindu réveil ya tiya ya mbwaki kulandila na kati ya bawu, kasi bawu kele na mingi ya sysiteme ya mekaniki na dibuundu yayi, beno me mona, samu ti bawu vwandaka na bimvwama mpe, oh, la la, bawu vwandaka vukana mpe vwandaka sala balukutakanu ya nene mpe nyonso. Bawu vwanda kuzwa ntangu mosi ya mbote na dibuundu yayi, ya kele nyonso kieleka, kasi ya kele nyonso sysiteme ya mekaniki. Kasi ya kele ve na tiya ya Mpeve-Santu. Beno me mona?

¹³¹ Beno tala awa yina Yandi tubaka awa, beno me mona:

Mu zaba bisalu ya nge, . . . nge kele to madidi to tiya ve: mu ke zola ti nge kuvwanda madidi to tiya.

Mpe samu ti nge kele mwa-tiya, . . . to madidi to tiya ve, mu ke luka nge na yinwa ya munu. (Benno me mona?)

¹³² Ntangu yayi, Yandi tubaka, “Mu ke zola ti nge vwanda madidi to tiya. Mpe samu ti nge kele ve, Mu—Mu fwana katula nge, kaka yina, kubasisa kaka nge na yinwa ya Munu.”

133 Ntangu yayi, bawu vwandaka na mbongo mingi, bawu vwandaka na bayinzo ya nene, bawu vwandaka na bima ya nene yina vwandaka baluka, kasi bawu vwandaka ve na tiya ya Mpeve-Santu. Oh, bawu vwandaka na sysi- . . . kita. Oh, la la! Bawu kele na dibuundu ya kintwadi ya kuvukana, bakala, bawu kuzwaka bayinzo ya kulutila nene na yina bawu kuzwaka ntete, mpe bima yango ke na kulandila, kasi kukondwa Mpeve-Santu. Beno me mona? Ya kele yina Nzambi fidisaka samu na Dibundu, Mpeve-Santu.

Ntangu yayi, na yina beto ke landila na nzila ya 16 yayi.

134 Bawu kele na mitindu nyonso ya bakomite. “Oh, beto kele na kita ya nene ya yawu. Kimvuka ya lusalusu ya bamama ya kununa, mpe nsaka ya bakalati ya bantwenya, mpe—mpe nsaka ya mbongo na Kilumbu ya tanu na nkokila, mpe nsaka ya basketball na Lumingu na manima ya midi, mpe, oh, nsaka ya baseball na *yayi-mpe-yayi*. Mpe, oh, beto kele kaka na kimvuka ya kusolola ya bantu. Mpe, oh, beto kele na mitindu nyonso ya bima.”

135 Mu ke tuba na beno, yandi kele ya kufuluka, na bimvuka, mpe ba-club, mpe balukutakanu, mpe nyonso dyaka yankaka, kasi ata tiya ya Mpeve-Santu. Beno me mona, beno kele na kita mosi ya nene, kasi beno kele na kima mosi ve kuna samu na kupesa tiya. Beno ke na kupesaka tiya na yinza kasi na Nzambi ve, ya kele samu na yina beno kele mwa-tiya.

136 Oh, beno kele na bamambeke kulutila na yina beno me kuzwaka ntete. “Kieleka, bakala! Oh, beto kuzwaka ya kulutila fuku na mvula 1944,” ke tuba Baptiste. Kasi—kasi yinki kele na beno? Masini ya nene!

137 Kaka na dibuundu mosi kisika mu kuzwaka kidimbu yango, ba zolaka kuzwa baminuti kumi na tanu samu na kusukisa, samu na kupesa pasteur siansi ya kukwenda na nganda, mpe badiakre nyonso mpe bawu nyonso, samu na kunwa tabaka, mpe kuvutuka dyaka na kati. Beno me mona? Yawu yina. Biblia na mutindu ya pwelele kufundisaka kima yango! “Kana beno sumuna nzutu yayi. . . .”

138 Badokotolo ke fundisa yawu mpe ke tuba, “Ya kele ya kufuluka na cancer.” Na manima bawu ke luta na ladyo mpe ke tuba, “Kiyungulu ya muntu yina ke banzaka.”

139 Mutindu Billy Graham tubaka, “Yandi kele kilawu na kubanza mutindu yina na kubanda.”

140 “Kiyungulu ya muntu yina ke banzaka,” muntu yina ke *banzaka* ke kunwa yawu ata fyoti ve, ya kele kieleka, beno ke baka dibanza ya zole. Kasi yandi ke tuba na bakento ti yawu ke kumisa bawu kieleka fyoti, beno zaba, samu ti bawu kulwata mosi ya mutindu ya mwa ba-robe yayi ya malu-malu yina kele na bawu. Bakala, ya ke tekama! Bakento mingi ke kunwaka tabaka kulutila ya kele babakala ntangu yayi, mpe kento ke kunwa tatu

to mosi, ya tabaka, na bakala. Ya kele kaka kieleka, samu ti yandi ke zola kukonda. Yandi ke bakula ve ti ya kele Tuberculose mpe cancer mpe kima yina ke na kusalaka yandi mutindu yina, kaka na nzutu ya bébé, na kukotaka na yandi, ke kudya yandi mutindu yina, ke kufwa yandi. Kima ve lenda basika na yawu kasi dyabulu! Ya kele kieleka. Beno me mona? Kasi ya kele, “Ya—ya kele kiyungulu ya muntu yina ke banzaka.” Hah! Oh, la la!

141 “Ve! Ve! Oh,” bawu ke tuba, “kasi beto kele. . . Mpangi Branham, mu ke telemina yawu! Beto kele na balukutakanu ya nene! Beno tala yina Billy Graham me sala na yinsi.” Oh, kieleka, kita ya nene, ba-evangeliste yina ba me baka na kisalumu, bantwadisi-minkunga yina ba ke futa.

142 Yinga, bawu ke baka na kisalumu ba-evanzeliste ya bawu. “Mbote, beno ke futa munu yikwa kana mu kwiza simba réveil yina? Mbote, kana beno lenda ve kubasisa *mingi* ya funda ya ba-dollar mu ke kwiza ata fyoti ve. Ya kele kieleka. Mpe nani beno ke bika kutwadisa minkunga? Mbote, beno kwenda mpe beno baka na kisalumu *Kingandi*, yandi kele soliste ya nene. Beno baka yandi na kisalumu na . . . Yandi ke benda na yandi mosi nkonga ya munu, yandi ke sala yandi mosi.”

143 Ba-soliste yiba ba ke futa! Ba-evanzeliste yina ba ke futa! Mbote, ya me kuma na kisika ti mpulusu ya moyo kele business. Mpulusu ya moyo kele ve business ya dibuundu, ya kele ngolo ya Mpeve-Santu na kati ya dibuundu. Mpulusu ya moyo kele ve . . . beno ke sumba yawu ve na mbongo. Ve, tata! Ve! Nyonso ya yawu kele, kele bisalu, bisalu, bisalu, kufuta ba-evanzeliste, kufuta bantwadisi-minkunga, kufuta miyimbidi, na nyonso yankaka. Nzambi zola yawu ve, ya kele nyonso bisalu! Nzambi kele na nsatu ya bisalu ve, Yandi zola Mpeve-Santu kusala na kati ya beno. Ya kele kieleka.

144 Nzila ya 17 ke tuba:

Samu ti nge ke tuba, mu kele mvwama, . . . kele ya kifuluka na bima, mpe kele na nsatu samu na kima ve; mpe na kuzabaka ve ti nge kele na mawa, (Oh!) . . . na kuzabaka ve ti nge kele na mawa, . . . na mpasi, . . . mputu, . . . mpofo, mpe kinkonga: (Hmm! Hmm!)

145 Bawu vwandaka banza ti bawu vwandaka “mvwama,” Pantekote yayi na nsungi yayi ya nsuka ya mabuundu. Bawu banzaka . . . Mpe na ngaanda bawu vwandaka. Yinga, tata. Bawu kele na bimvwama. Beno banza kaka na dibuundu, vwanda vwandaka bamvula fyoti me luta, vwanda basikaka na nsongi, vwanda tambula kisika na kisika, kuzwaka ntangu mosi ya mpasi. Kasi ntangu yayi bawu kele na mosi ya bayinzo ya nene yina kele.

146 Beno me mona kisika ba-Assemblée de Dieu awa, bayina vwanda kuzwa kisika ya bawu na yinzo ya mpamba ya mabaya, kima mutindu yayi awa, mpe ntangu yayi ba ke na kutunga

yinzo ya nene ya sambanu ya ba-dollar, mpe bawu ke tuba, “Yesu ke kwiza kaka.” Bisalu ya beno ke lakisa ti beno ke kwikila yawu ve. Yawu kele luvunu! Ke tunga yinzo ya nene ya fuku ya ba-dollar mpe bima ya mutindu yina, mpe ke tuba, “Yesu ke na kwiza kaka.” Mpe ba-missionnaire na bilanga ya kulonga, ke kondwa mapapa ya kulwata na makulu ya bawu, ba-missionnaire ya kieleka yina ke zitisaka Nzambi, ata mapapa ya kulwata na makulu ya bawu, mpe ke zinga na ba-ration zole ya loso na sabala; ke kudya bambala zole na lumingu samu na kunata Nsangu ya mbote na bamfinda mpe nyonso ya mutindu yina, samu na kunata Yawu na bankundi ya bawu. Mpe beto ke na tunga mafuku sambanu ya ba-dollar ya yinzo ya nene, mpe dibuundu na bitala-tala ya nene na banela, mpe nyonso yankaka, mpe na kutulaka yawu na zulu ya yawu. Oh, beno kele mpe na mbongo mingi tii bantangu yankaka bawu kele na bimvuka ke defisaka mbongo kaka na mabuundu ya bawu. Ya kele kieleka!

¹⁴⁷ Bawu kele na dokotolo na kati kuna samu na kufyongonina ba-evangeliste ya bawu to ba-missionnaire ya bawu. Mpe muntu mosi ke zola kwenda na bilanga ya kulonga, ba ke pesa yandi kizame ya dokotolo samu na kumona kana yandi... to psychiatre, samu na kumona kana yandi kele...oh, kana yandi kele landila mayele kele na quotient intellectuel, beno me mona. Mpeve-Santu fyongoninaka yawu, beno kele na nsatu ya psychiatre ve.

¹⁴⁸ “Kasi, mvwama mpe kele na nsatu ya kima mosi ve.” Oh, kieleka. Beno kele na mbongo mingi. Na ngaanda, beno kele na bimvwama mingi; kele na bayinzo ya nene ya nene, bitala-tala ya banela.

¹⁴⁹ Mpe milongi yina zaba kuzonza! Oh, la la. Oh, mu ke tuba na beno, hmm, kieleka bawu zaba kuzonza. Bawu lenda telama mpe kuzonza mpimpa nyonso, mpe kutuba kima mosi ve. Beno me mona? Ntangu bawu ke mata...mu ke zola kutuba na bima yina bawu zolaka tuba ve, beno me mona. Bawu ke telama, mpe mosi ya dyambu yayi, mpe ke zonzila na mwa ya yayi ya *yayi-mpe-yayi* mpe *yayi-mpe-yayi*. Mpe beno zaba mutindu ya kele. Kufuta miyimbisi. Ya kele tsyelika. Mbote mingi. Kasi, ke kwiza na chaire, milongi yina zaba kuzonza. Kana bawu kele ve ya kulwata smoking na nkingu ya kubaluka, mpe mosi ya kazaka ya redingote ya kulwata, mbote, dibuundu ya bawu ke kuwa kieleka nsoni.

¹⁵⁰ Mpe miyimbidi yango ke basika kuna, bankento yango, na nsuki ya kuzenga nkufi mutindu Jézabel, mpemba ya kulunga na kizizi ya bawu na kulenga grange. Kaka na ntangu bawu ke katula robe yina, bawu ke lwata bakupe mpe bilele ya babakala, mpe Biblia ke tuba, “Kana kento lwata bilele ya bakala, ya kele ya kulutula yimbi na meso ya Yandi.” Bawu ke tambula na balabala na mbombo ya bawu na zulu, ya ke dyamisira bawu. Bakento ya mwa mayele, ya lunangu, ba-Jézabel ya kisayi! Ya kele samu

na yina beto kele na ata réveil, ya kele kitini ya nene ya kisalu ya sysiteme.

151 Oh, beno lendaka vwanda na ndinga mutindu archange, mpe Nzambi ke lomba beno na kupesa beno mvutu samu na yawu! Ba-Elvis Presley yayi mpe nyonso yankaka, mpe ba-Ernie Ford, to nyonso yina ba ke bokilaka bawu na ngaanda awa na bandinga yayi ya mbote mpe na kusadilaka yawu samu na dyabulu, Nzambi tubaka, “Mu ke lomba yawu na maboko ya bawu.”

152 Ya kele samu na yina mu ke zitisaka kento ya kufwa meso Fanny Crosby; yandi ata mbala mosi ve tekisaka dikabu ya yandi na yinza. Yandi bumbaka yawu na Nzambi.

153 Mingi ya bantu yayi kele miyimbidi yina zaba kuzonza, bantu yina zaba kuzonza, bantu ya nene, mpe nyonso yankaka, na kisika ya kusadilaka talent ya bawu samu na Nzambi, dyabulu me balula yawu mpe bawu kele kuna na kusalaka samu na yandi. Ba-vedette, ba-vedette ya ladyo mpe ya televizyo, ke tekisa bawu mosi, kuna samu na yinza na kisika ya kupesa yawu na Nzambi. Bayankaka ya bawu ke kwizaka na dibuundu, ke kwendaka na dibuundu, ke lwata robe mosi ya nene ya kitoko, ke basika kuna mpe ke yimba mutindu yina, mpe ke vutuka mpe ke yimba rock-and-roll na nkokila yina ke landa. Mutindu ya miyimbidi yina beto zaba, bayina kele ya mabuundu mosi, bawu ke basika kuna mpe ke sala bafilme yayi, bafilme yayi ya sinema, bawu ke basika kuna mpe ke yimba rock-and-roll. Bantinu ya rock-and-roll, mpe ke tuba ti bawu kele misambidi! Ya kele mutambu ya dyabulu!

154 Muntu mosi vwandaka na ba-sens mingi—mingi ya mbote awa. Ti tubaka ti yandi zolaka vwanda mulongi, yandi ke kwenda Lumingu na suka mpe ke longi, mpe na manima yandi kwendaka kuna . . . mpe kumaka na nsamununu na ladyo mpe yimbaka minkunga ya rock-and-roll mpe nyonso mutindu yina, na yawu na nsuka yandi bakaka munduki mpe mwangisaka yintu ya yandi. Mu ke zitisa muntu yayi na kusalaka yawu. Ya kele kieleka. Ya kele kieleka. Yandi—yandi vwandaka na ya kulutila . . . Yandi vwandaka na sens ya kulutila na yina bangulu yina kusalaka, na mutindu nyonso, ntangu bawu kuzwaka dyabulu na kati ya bawu bawu kimaka na maza mpe dyamaka. Bantu mingi kele mpe ve na mingi ya yina.

155 Mu zaba beno . . . Mu—mu ke zolaka ve kuvwanda ngolo mutindu yayi, kasi, mpangi ya bakala, mpangi ya kento, beno fwana—beno fwana kotisa kima awa samu na kusala yawu—na kusala yawu kusimba! Yayi kele kilumbu yina beto ke na kuzinga. Mu banza kana Yesu bokilaka Hérode “mbulu ya ntama,” mpe Jean kubokilaka bawu “nsungi ya banyoka,” mbote mingi.

¹⁵⁶ Bawu kele na bayinzo ya nene ya nene, bintala-tala ya banela ya nene, milongi yina zaba kuzonza, ba ke futaka miyimbidi. Yinga, tata. Yinki bawu kele na yawu na kati? Yinki kele na kati ya yawu? Ata kima mosi ya Mpeve-Santu. Bawu ke telama kuna mpe ke basika mpe ke lwata bakupe, mpe ke kwiza mpe ke yimba na chorale. Beno bantu ya mpasi ya luvunu! Yinga, tata. Ya kele kieleka.

¹⁵⁷ Mpe beno, mulongi, yina ke kwendaka na lukutakanu samu ti bawu ke pesaka beno mbongo ya kulutila na yina bawu ke salaka na kisika yankaka! Nge muntu ya kukondwa buzitu, nge kele ya kulunga ve na kuvwanda na chaire. Ya kele kieleka. Mbongo! “Kana beno lenda kulungisa ve mafunda *mingi* ya ba-dollar, mbote, beto ke kwiza ve. Bantwadisi ya beto—ya beto—ya beto mpe bayankaka ke kwiza kuna, kana beno lenda kuvukisa mbongo beto ke kwiza. Kana mu lenda kuzwa ve lusalusu nyonso ya muntu nyonso, mu ke kwiza ve. Kana mu kuzwa ve lusalusu nyonso (ya mabuundu nyonso) samu mu kuzwa mbongo mingi samu na kufuta bamfuka ya munu, mu ke kwiza ve.”

¹⁵⁸ Mpangi ya bakala, muntu ya Nzambi ya kieleka ke kwenda kana Mpeve-Santu twadisa yandi, ata nyonso yina ke vwanda na munkayulu. Kana yandi fwana kudya dimpa ya kuyuma mpe kunwa maza ya mpamba. Ya kele kieleka, yandi kele kisadi ya Nzambi ya kieleka.

¹⁵⁹ Kasi bantu ke kanga bawu mosi na bansamununu mpe ladyo mpe televizyo, mpe mitindu nyonso ya bima ya yinza, tii bawu ke kuzwa mbongo ya mutindu yina. Ya kele kaka kieleka. Beno me mona? Yina kele Nzambi ve.

¹⁶⁰ Yandi tubaka, “Oh, nge kele mvwama, nge kele na nsatu ya kima mosi ve.” Kieleka, kasi kima ya kieleka yina beno kuzwaka nsatu, beno me kuzwa yawu ve. Ya kele kieleka. Kasi beno me zaba yawu ve. Beno me mona, “Mvwama, kele na nsatu ya kima ve.” Ba ke futa bawu na bima yina bawu ke na kusalaka, kubula bakalati. “Oh,” beno ke tuba, “beto kele na mabuundu ya nene.” Oh, kieleka. Yinga, tata. “Dibuundu ya kulutila nene! Samu na yinki—samu na yinki, beno zaba, mfumu ya mbanza ke kwizaka na dibuundu ya beto.” Um-hum. Ya kele kieleka. “Mbote, beno zaba, *Kingandi*, ntangu bawu ke kwizaka na mbanza, bawu ke kwizaka na dibuundu ya beto.” Um-hum. “Beto kele na bantu nyonso yina kele ya kuzabana na dibuundu ya beto.”

¹⁶¹ Yinga, mpe ti muntu ya santu ya mputu, ya nsatu kukota na dibuundu, mpe bawu kele kusemba samu na beno. Beno zola kaka bawu kuna ve. Beno kele na boma ti muntu mosi ke tuba “Amen!” na yina beno ke na kulongaka.

¹⁶² Mutindu mwa mama mosi mu tangaka kilumbu mosi na buku mosi ya fyoti awa, yandi kwendaka na dibundu mosi. Bana ya yandi, yandi sansaka bawu na mutindu ya dibuundu ya ntama kuna na bayinti kisika bawu vwandaka kieleka ya kinzambi.

Na yawu. . . Ntwenya ya bakala mosi kwizaka kilumbu mosi mpe kwelaka mwana ya yandi ya kento. Yandi tubaka ti yandi vwandaka ya dibuundu *yankaka*, beno zaba, mosi ya mabuundu ya nene ya denomination mosi kuna na mbanza. Na yawu yandi tubaka na mama yango ti yandi vwandaka Muklisto. Na yawu yandi kwelaka mwana ya kento mpe kwendaka na yandi.

¹⁶³ Mbote, na nsuka yandi katulaka yandi na mwa dibuundu ya ntama kuna na myongo, na awa, na dibuundu yayi ya nene ya mbote, ya nkumbu mosi; kasi kuna na manima ba vwandaka na Mpeve-Santu, awa ba vwandaka na kima ve. Na yawu kuna ntangu bawu kwizaka, na dibuundu yayi ya nene ya mbote.

¹⁶⁴ Na yawu Mama tubaka, kilumbu mosi, yandi zolaka kwenda kuna samu na—samu na kutala mwana ya yandi ya kento. Mbote, bawu vwandaka ya kukiufufula yinki na yinza bawu ke sala na yandi. Na yawu ntangu yandi kwendaka yandi talanaka mutindu kima ba me basisa na buku ya ntama, ya kulwata mosi mwa ba-robe yango, ya nkingu ya kutelama, beno zaba, mpe na maboko ya yinda, mpe nsuki ya yandi ya kuvutuka na manima kuna, kizizi mutindu ditungulu ya kulengula, mutindu yina (ba me katula matiti, beno zaba). Mpe yandi kwizaka, mpe yandi tubaka, “Mbote, Alleluia, cherie! Wapi mutindu beno nyonso kele awa?” Mbote, yandi tubaka, “Ntangu yayi, na suka ke vwanda Lumingu.” Yandi tubaka, “Benoni ke kwenda na lukutakanu, mutindu yina ve?”

¹⁶⁵ (Bakala vwandaka tuba, “Yinki beto ke sala na yandi?” Yandi tubaka, “Beto lenda nata yandi kuna ve mutindu yina!” Mpe yandi tubaka, “Mbote, mu zaba ve yinki ya kusala.”) Mbote, yandi tubaka, “Mama, mu ke tuba na nge, beto. . .”

¹⁶⁶ “Oh,” yandi tubaka, “kasi, cheri, mu lendaka kondwa ve na dibuundu. Ya kieleka ya kele na dibuundu *yayi-yayi* awa.” “Oh,” kento. . . bakala tubaka. . . Yandi tubaka, “Mu monaka mosi kuna na nsongi, mu ke kwenda kuna.”

(Mpe yandi tubaka, “Oh, mbote, beto fwana sala kaka yawu.”)

¹⁶⁷ Na yawu ntangu bawu kotaka, ba bikaka yandi kukota ntete, (Beno me mona?) samu na nsoni ya yandi. Awa yandi ke sabuka bala-bala na mwa robe yango, beno zaba, mpe Biblia ya yandi na yisi ya dipeka ya yandi. Mbote, mpangi, yandi zolaka vwanda ve na nkumbu ya yandi na kati ya *Bottin Mondain*, kasi mu banza ti yandi vwandaka na nkumbu ya yandi na zulu ya Buku ya Luzingu ya Mwana ya dimeme. Yina vwandaka kima ya mfunu.

¹⁶⁸ Ntangu yandi kotaka na dibuundu yandi vwandaka kuna na manima, yandi bakaka kiti, beno zaba, mpe zibulaka Biblia mpe yandi bandaka na kutanga. Mpe muntu nyonso bandaka na kubaluka, na kubanzaka ti mutindu mosi ya muntu ya ntama me kubwa na kisika mosi. Na kutalaka na ziunga mutindu yina, “Oh, la la!” Ya kulwata bilele ya bawu ya mbote, beno zaba,

kifwani ya Laodicée, mpe na ba-robe ya bawu yambote mpe nyonso. Bawu vwandaka tala na manima mpe vwandaka mona mwa mama yayi ya kuvwanda kuna, na mwa kuseka mosi ya nene na kizizi ya yandi, beno zaba, na kutangaka Biblia. Yinga.

¹⁶⁹ Mpe pasteur, na manima ya mwa ntangu fyoti, na manima bawu me luta na bima nyonso yankaka, yandi na nsuka, yandi vwandaka na baminuti kumi na tanu samu na kuzonza. Na yawu yandi telemaka mpe yandi tubaka, “Mfumu kele mbote.”

¹⁷⁰ Yandi tubaka, “Lukumu na Nzambi! Ya kele kieleka! Alleluia!” Mpe muntu nyonso balulaka laka mutindu na kulangidila, na kubalukaka, “Nani ya vwandaka?”

¹⁷¹ Mpe kuna na manima ya mwa ntangu fyoti, yandi tubaka, “Uhm! Uhm! Uhm!” Yandi tubaka, “Miklisto na ntangu nyonso zolaka vwanda, Miklisto ya nene ya mbote, ya kikesa,” to kima mosi ya mutindu yina.

¹⁷² Yandi tubaka, “Lukumu na Nzambi! Ya kele kieleka!” Mpe bawu nyonso kubalukaka na kutala.

¹⁷³ Mpe yandi, “Uhm!” yandi talaka kuna kimvuka ya yandi ya badiakre.

¹⁷⁴ Mpe kimvuka ya badiakre kuzwaka dibanza. Bawu kwendaka na manima mpe bakaka mwa kento yayi na diboko mpe basisaka yandi na ngaanda, na kutubaka, “Nge ke na kuzengaka pasteur ndinga.”

¹⁷⁵ Beno kele ya kufwa mpe zaba yawu ve! Yinga. Oh, wapi luvalu kele na bintala-tala ya beno ya banela ya nene? Yinki kele bakiti ya beno ya mbongo mingi? Mpe yinki kele dibuundu ya beno ya nene? Beno ke na kwenda kaka mbala mosi na difelo, mutindu ndeke na yinzo ya yandi. Samu ti kana beno kele ve na Mpeve ya Nzambi, beno kele ya kuzimbana! Kana ti beno butuka dyaka beno lenda ve kumona Kimfumu ya Nzambi.

¹⁷⁶ Ya kele ndudi. Ya kele mutindu ntangu mu vwanda bakaka mafuta ya ricin, mu vwanda tubaka, “Mama, mu ke lenda kaka yawu ve.”

¹⁷⁷ Yandi tubaka, “Kana ya ke pesa nge kimbevo ve, ya ke sala nge mbote ve.” Na yawu mu banza ya kele mutindu mosi na Yayi, mpe.

¹⁷⁸ Oh, kana beno lendaka tuba na bawu! Oh, bayinzo ya nene, ya mbote, mpe nyonso yankaka. Oh, bawu—bawu—bawu... Beno kwenda na dibuundu ya bawu, beno meka na kutuba... Beno kwenda na dibuundu ya bawu mpe beno tuba, “Mbote, mu ke tuba na beno, beno kele bantu ya Pantekote?”

“Oh, yinga. Uh-huh. Kieleka, beto kele ya Pantekote.”

“Beno ke kwikilaka na kuvwanda ya kubutuka dyaka?”

“Yinga.”

“Mbote, mu ke zola kulakisa beno kima mosi . . .”

179 “Oh, beno tala yinzo ya nene yayi! Beno zaba ntalu yikwa kivinga . . . yikwa kivinga yayi kele na ntalu yikwa? Ya ke lomba ba-dollar tatu na zulu ya yiya ya mafuku samu na kutelemisa yayi. Beno zaba, beto vwandaka na yawu mutindu yina ve. Beto—beto vwanda vwandaka na yisi kuna na bala-bala.” Um-hum, mpe beno tala bisika nyonso, beno ke tala bima nyonso yayi ya nene yina kele na bawu. Yinga, tata. Mpe kuna bawu ke tuba, “Oh, beto—beto kele na bima nyonso yayi ya nene!” Kasi bawu kele na ata kizitu ve samu na myoyo ya kuzimbana! Bawu ntangu nyonso ke zola kulakisa beno lutangu ya bayinzo ya nene kele na bawu. “Beno tala buku ya beto ya lukolo ya Lumingu, mutindu nene ya kele!” Wapi mbote ya ke sala kana bawu kele ve na Mpeve-Santu? “Mvwama, ya kifuluka na bima, kele na nsatu ya kima ve.”

180 Ya kele yina Yandi tubaka, “Nge ke banza yawu, kasi nge zaba ve ti nge kele mputu, na mawa, ya mpasi, mpofu, kinkonga. Mpe zaba yawu ve!” Beno me mona? Kaka yina.

181 Oh, kieleka, bawu ke tuba, “Nge zaba yinki? Beto vwanda vwandaka . . . Dibuundu ya fyoti yina beto vwanda sadilaka kele kuna na manima, yayi kele mosi ya nene ntangu yayi!” Mpe mu ke tuba na beno, ata kizitu ve samu na myoyo, kasi bawu fwana mona ti bima nyonso yayi ke na kukebama mbote. Lusalusu ya bamama, mpe bima nyonso yankaka yayi, nyonso fwana kebama, kasi ata kizitu samu na myoyo ya kuzimbana. Oh, bakala, yinki—yinki dibuundu yayi kele na yawu na kati!

182 Bawu vwandaka ve na kizitu samu na myoyo, kasi bawu vwandaka na kizitu na bimvwama. Ya kele kieleka. Bawu vwandaka na kizitu ya yimbi. Bawu vwandaka na kizitu samu na bimvwama ya bawu kasi kizitu ve samu na myoyo ya kuzimbana. Masonuku ke tuba, “Bawu zabaka ve ti bawu vwandaka na mawa,” (Oh!) “na mpasi, mpofu.”

183 Bawu banzaka ti bawu zolaka baka mbongo mpe kundimisa yinza. “Oh, kana beto lendaka sala manaka, ti beto lendaka kuzwa mbongo mingi awa, mu banza ti beto lenda ndimisa yinza. Kana bayankaka ya bantu ya mvwama na dibuundu ya beto, Mpangi Branham, kana beto lendaka kaka kubasisa bawu, mpe mu banza ti beto lendaka banda kimvuka yina ke—yina ke kwenda bisika nyonso mpe—mpe ke ndimisa yinza. Beto lendaka baka bampepo mpe kufidisa mikanda na Afrika nyonso, mpe bima ya mutindu yina. Kana beto vwandaka kaka na mwa mbongo!”

184 Mpangi, yinza ke ndima ve na nzila ya mbongo. Yinza ke ndima na nzila ya Mpeve-Santu; kulonga na mutindu ya ngolo ya Mpeve-Santu mpe Kulunsi ke vwanda kima kaka yina ke ndimisa yinza. Manaka ya Nzambi kele mbongo ve. Ya kele Mpeve-Santu, ya kele yina kele manaka ya Nzambi samu na

Nsungi ya Dibuundu ya Laodicée to nsungi nyonso yankaka ya dibuundu. Yinga, tata.

¹⁸⁵ Bawu zola Mpeve-Santu. Oh, bawu ke tuba, “Beto kele . . . kele na wolo.” Ya vwandaka wolo, mbote mingi, kasi ya mutindu ya mbote ve. Bawu vwandaka na wolo mingi kasi ya mutindu ya mbote ve. Ntangu yayi, na yawu ba tumaka bawu na Yesu, “Mu zaba ti nge kele mvwama, mpe kele na wolo, mpe kele na nsatu ya kima ve,” kasi:

*Mu ke longa nge na kwiza kusumba na munu wolo yina
ba me meka na tiya, . . .*

¹⁸⁶ Wolo ya mutindu yankaka, inga, wolo yina ba me meka na dibulu ya tiya, yina me lutila na tiya ya lufwa, yina lutilaka na Calvaire, basikaka.

¹⁸⁷ Mingi ya wolo yayi yina kele na beno ntangu yayi kele ya kubeba, ya ke bola, ya ke vwanda na mbungi. Kana beno lendaka sonika yawu, Jacques . . . Santu Jacques 5:1 tii na 4, mpe beno ke kuzwa yina ya me, tuba, “Beni kwenda, beno bantu ya bimvwama, ntangu yayi na nkwezulu ya Mfumu, beno dila mpe beno yawula samu na mawa yina ke kwiza na beno, wolo ya beno kele ya kubola na kati ya beno.” Beni me mona, ya kele mutindu ya wolo yina ke bola.

¹⁸⁸ Kasi wolo yina Yesu pesaka kele Mpeve-Santu, Mafuta ya wolo ya Mpeve, ba me mwangisa na kati ya ntima ya beno. Mpe—mpe, oh, la la, “Mu ke longa nge, na kwiza sumba wolo na munu, kana nge zola kuma mvwama.” Oh, yinga.

¹⁸⁹ Mpe, bawu vwandaka “mpofo.” Ntangu yayi, ya kele mutindu ya yimbi na kuvwanda. Mu banza ve ti Miklisto yayi vwandaka kieleka mpofo mutindu bawu vwandaka “tala mbote ve.” Mu banza bawu vwandaka tala mbote ve. Kima kaka yina bawu lendaka kutala vwandaka bayinzo ya bawu ya nene. Kima kaka bawu lendaka kutala vwandaka dibuundu ya bawu ya nene. Kima kaka bawu vwandaka tala vwandaka chorale ya mbote na ba-robe ya yawu nyonso mpe nyonso. Mu banza ti bawu vwandaka tala kaka mbote ve, na mpasi bawu zolaka mona na mbombo ya bawu. Mu banza ve ti bawu vwandaka mpofo, bawu vwandaka tala kaka mbote ve. Nyonso yina bawu zolaka mona vwandaka ya bawu. . . “Mbote, nge zaba yinki? Beto kele ya *Yayi-mpe-yayi!*” Ba-dénomination ya bawu ya nene, bantu mingi ya bawu ya nene, bamambele mingi, lukolo ya bawu ya Lumingu, bayinzo ya bawu ya nene ya mbote.

¹⁹⁰ “Kasi bawu vwandaka na nsatu ya Mpeve-Santu,” Yesu tubaka. Bawu vwandaka na nsatu ya Mpeve-Santu! Na yawu Mfumu tubaka na bawu, “Disu . . . Kana nge kele . . . meso kele yimbi mingi, mpe ti kieleka nge ke tala mbote ve ti nge lenda kumona kima ve kasi yinzo ya beno ya nene awa mpe dibuundu ya beno ya nene ya mbote, mpe ya beno. . . mfumu ya mbanza mpe bawu nyonso ke kwizaka na dibuundu ya beno, mpe beno

kele na muntu ya kuzabana. Mpe beno me zimbana Munu. Kasi kana nge kele mpofo, mpe ti meso ya nge kele kieleka na mutindu ya yimbi, mu ke tekisa nge mwa nkisi ya meso ya meso.” Yinga.

¹⁹¹ Beno me mona, ya kele ngitukulu ti ba-docteur yango ya théologie kuzwaka yawu ve, mutindu yina ve? Ba vwandaka na mananasi mingi, ba vwandaka na théologie mingi. Kasi bawu vwandaka na nsatu ya nkisi ya meso, Mpeve-Santu ya Nzambi, samu na kunika meso ya bawu mpe kubika bawu kutala na nkwezulu ya Mfumu, ti bawu tala na Biblia, ti bawu tala na Ndinga. Bawu zaba mutindu ya kutuba “ah-muntu” kaka kieleka. Bawu vwandaka na mananasi, bawu vwandaka na mafuta nyonso. Kasi, “Bawu vwandaka na nsatu ya nkisi ya meso,” Mfumu tubaka. Yandi tubaka, “Nge kele na nsatu ya collyre samu na kutula na meso ya nge, mpe ya ke zibula yawu.”

¹⁹² Ya vwanda vwandaka, ntangu mu vwandaka mwa mwana ya bakala . . . mu me tubaka yayi, mu banza, ya lendaka vwanda ti mu tubaka yawu na dibuundu. Yayi me kwiza na dibanza ya munu ntangu yayi. Mu kulaka na myongo ya Kentucky, na mwa ntangu, mpe beto vwanda zingaka na yinzo mosi ya ntama ya mabaya. Mama, awa . . . Mpe beto vwandaka—vwandaka na mwa kisika mosi ya ntama na zulu, mpe beto vwandaka na matela ya—ya matiti. Mpe na zulu ya matela yango ya matiti ya vwandaka na kuse ya mansala. Mu zaba ve kana beno zaba yinki kuse ya mansala kele to ve, to mbeto ya matiti; mbeto ya ntama, beto vwandaka mputu mingi. Papa mpe mama vwandaka na mbeto ya bawu na yinsi. Mpe na yawu beto vwanda mataka kikalu mpe kukwenda na zulu, mpe mama zolaka tula, bantangu—bantangu—bantangu yankaka, kitini ya lele na zulu ya mavunga mpe nyonso, samu na kubumba . . . Beno zaba, beno ke telama . . . ya kulala kuna mpe beno ke tanga bambwetete na kati-kati ya mabaya yango ya ntama na mwinda ya ngonda, beno zaba, mpe ya vwandaka na mabulu ya nene na muludi mutindu yina.

¹⁹³ Mpe na yawu ntangu mvula ya mpembe to kima mosi, to mvula ke kwiza, beto bana ya fyoti zolaka kangama na yisi ya kitini ya lele yayi, beno zaba, na kukima yango . . . na kukima na pola. Mpe bantangu yankaka na yina mupepe vwandaka sala na nzila ya mabulu yango, beto—beto—beto zolaka kuzwa madidi mpe meso ya beto zolaka kangama. Beno zaba, beno telama nyonso na madidi, madidi na meso ya beto. Mpe na yawu mama vwandaka bokila beto na suka, “Na kukulumuka.” Mu vwanda tuba, “Mu lenda kwiza ve, mama, samu ti meso ya munu me kangama.” Mu vwandaka—mu vwandaka na kima na kati kuna, beno zaba, madidi na meso. Mu vwanda lenda ve kuzibula yawu, beno zaba. Mwana ya fyoti vwandaka ya kulala kuna, mpe munu mpe Humpy mpe bayankaka vwandaka meka na kuzibula meso mpe beto vwandaka lenda ve na kusala yawu, beto vwandaka tala ve.

194 Nkooko ya munu ya bakala vwandaka muzombi ya mitambu ya nene, yandi vwanda simbaka ba-raton, ba-raton laveur. Mpe nkisi na yinzo ya beto, vwandaka mafuta ya raton-laveur. Beto vwandaka pakula mapapa na mafuta ya raton laveur. Mpe kana beno vwandaka na kimbevo ya croup, ba vwanda tula mwa térébenthine na zulu ya yawu mpe kaka, inga, beno zolaka mina yawu, yina, samu na kimbevo ya croup.

195 Mpe kuna ntangu meso ya beto nyonso vwandaka kangama, mama zolaka baka kima yayi. . . “Mbote mingi, kaka minuti, cheri.” Yandi vwandaka kima na kikuku mpe vwandaka baka kopo ya ntama ya raton laveur mpe kutula yawu kuna, mpe kukumisa yawu kieleka tiya. Mpe yandi vwandaka mata mpe vwandaka nika meso ya beto, beno me mona, tii kuna ya ke sala. Mpe na manima ya mwa ntangu fyoti mu vwandaka kuma mbote mu zolaka mona, kuzibula meso ya munu. Kubaka. . . Mafuta ya raton laveur vwandaka zibula yawu.

196 Mpe mu ke tuba na beno, beto kuzwaka mipepe ya nene! Beno me mona? Ya me vwanda mipepe mosi ya yimbi yina me bula yinsi. Ba-Baptiste kutubaka, “Bilumbu ya bimangu me luta. Ya kele ve na kima mutindu Mpeve-Santu, mpe ata kuzonza na bandinga. Ya kele ve na mbotika na Nkumbu ya Mfumu Yesu.” Mpe, oh, mitindu nyonso ya mipepe, mpe ya me kangisa meso ya mingi na mutindu mosi ya madidi ya kimpeve. Ya ke lomba kulutula mafuta ya raton laveur na kuzibula meso ya bawu, mpangi. Ya ke lomba mbotika ya malu-malu ya Mpeve-Santu. . . ?. . . samu na kunika meso ya beno mpe beno lenda mona, kukatula kutala mbote ve na meso ya beno samu beno lenda kumona Ndinga ya Nzambi kele kieleka. Ya kele kieleka. Oh, “Mu ke longa nge na kwiza kuzwa nkisi ya meso na Munu, mutindu ya kupakula meso ya beno.” Na yawu beno. . . Na yawu. . .

197 Ba-docteur ya théologie kele na ya bawu. . . théologie nyonso, mpe mananasi ya bawu mpe nyonso, kasi ya ke lomba ya kulutula yawu. Ya ke lomba Mpeve-Santu na kupesa vision ya kimpeve samu na kumona bangolo yakisalu ys Mazulu. Mpeve-Santu, collyre ya Mpeve-Santu! Collyre kele mafuta ya tiya, beto zaba yawu, mpe kuna Mpeve-Santu kele Mafuta ya Nzambi.

198 Mpe théologie nyonso mpe mananasi, “Oh, mpangi, ya luzolo, nge kele na raison. Ya kele ve na kima ya yimbi na. . . Nyonso kele mbote. Mbote, beto kele na dibuundu ya kulutula nene yina kele na mbanza.” Mananasi ke simba ve! Ve, tata! Ya ke sala beno kumona kaka *awa* (kutala mbote ve) mpe kutuba, “Yinga, beto kele na dibuundu ya kulutula nene.” Kasi wapi mutindu samu na Lusambusu ke na kwiza ntangu Nzambi ke lomba beno mvutu, beno bamambeke ya dibuundu ya Laodicée?

199 Mu ke na kuzonzila mingi ve na awa, kasi mu kele na bande mpe ya ke kwenda na yinza ya muvimba, beno me mona, na yawu

mu ke na kuzonzila na pene ya mafuku mingi ya bantu na ntangu yayi, beno me mona.

²⁰⁰ Na yawu kuna ya kele yawu. Laodicée! Madidi ve tiya ve! Retrograde! Yina ke na kutala mbote ve! Mpe nyonso yankaka. Ba-mulet! Mulet kele kibulu ba me vukisa, yandi kele ve na sens ya mbote samu na kubanda. Mpe beno ke solula na yandi, yandi ke telemisa makutu ya yandi ya nene, ke kwenda, “Hone! Hone! Hone! Hone!” Yandi kele na ata lembami na yandi. Yandi kele kibulu ba me vukisa, yandi kele na kati-kati ya mpunda mpe mbuluku. Ya kele yina kele dyambu bubu yayi, beno ke vukisa ba-Nicolaïte mpe ba-Laodicéen kintwadi, mpe beno kele dyaka na mbuluku. Yina beto kele na yawu nsatu. . . Ya kele kieleka. Bawu zaba ve. Beno tubila bawu na kubeluka ya Kinzambi, mbotika na Nkumbu ya Yesu. Yandi ke tuba, “Hone! Hone! Pasteur ya munu ve. . . Hone! Hone! Beto ke kwikila na yawu ve mutindu ba Presbyterien.” Bayina zaba kima ve! Ya kele mutindu yina ba zolaka bokila yawu. . . ? . . .

²⁰¹ Mu ke zolaka ve mulet. Kasi mu ke tuba na beno, mu ke zolaka mpunda ya mbote, ya lembami ya menga ya kieleka, bakala, beno lenda longa yandi kima mosi. Beno lenda longa yandi na kufukama, mpe kukota na cirque, mpe kusala fyoti mutindu muntu lenda sala, samu ti yandi kele. . . yandi zaba kima mosi. Yandi kele ya menga ya kieleka. Mulet zaba ve nani vwandaka papa ya yandi to nani vwandaka mama ya yandi, mpe yandi lenda ve kubutana yandi mosi. Ya kele mutindu na ba-dénomination yankaka yayi ya ntama, ya madidi, ya misiku, bawu lenda ata mbala mosi dyaka ve kutelama. Ntangu dibuundu ke kota na dénomination, ya me kufwa! Ya ke telama ata mbala mosi dyaka ve. Yinki ya kele? Ya kele kima ba me vukisa!

²⁰² Martin Luther vwandaka mbote, kasi ntangu yandi salaka organisation yinki yandi salaka? Ba-Méthodiste vwandaka mbote, na ntangu yandi salaka organisation yinki yandi salaka? Pantekote vwandaka mbote, kasi ntangu beno bongisaka yawu yinki beno salaka? Beno vukisaka yawu, beno vukisaka yawu na kati ya dibuundu ya Katolika ya ba-Nicolaïte. Kieleka yina beno salaka! Beno bakaka mutindu ya yandi ya mbotika, beno bakaka banzila ya yandi mpe bisalu, mpe Biblia ke tuba, “Nge kele mwana ya kento ya kento ya kindumba, kento ya kindumba. Mwana ya kento ya kindumba!” Ya kele kaka kieleka!

²⁰³ Mpunda ya mbote ya menga ya kieleka, yinga, yandi kele mbote. Oh, yandi kele mbote, mu zola yandi. Beno tula yintu ya yandi na zulu ya mapeka ya beno, yandi kele na luzolo, kele na lembami. Samu na yinki? Yandi zaba nani papa ya yandi kele, yandi zaba nani nkooko ya yandi ya bakala kele, yandi zaba nani nkooko ya papa ya yandi vwandaka. Yandi lenda vutuka manima, yandi kele na menga ya kieleka.

204 Mpe mu ke zolaka kumona Muklisto ya kieleka ya menga ya kieleka! Ve na kunataka mukanda ya yandi: yandi kele Méthodiste sabala me luta, mpe Baptiste sabala yayi, mpe Pentecotiste sabala yayi, mpe Pèlerin de la Sainteté sabala ke landa. Yandi zaba ve nani papa ya yandi kele to nani mama ya yandi kele. Kasi beno bika mu tuba na beno, muntu yina me butuka na Mpeve ya Nzambi lenda vutula beno na Kilumbu ya Pantekote; lenda tuba na beno yandi kele ya menga ya kieleka, ya pantekote! Amen! Mu ke zola kuvwanda pentecotiste kubanda zulu ya yintu ya munu ti yisi ya makulu ya munu. Mu ke zola ve kutuba Pantekote ya dénomination. Mu ke zola kutuba ngolo ya kieleka ya mvumbukulu ya Klisto, Lusakumunu ya kieleka ya Pantekote.

205 Nkisi, samu beno zibula meso ya beno samu beto tala na manima mpe kumona kisika ya me katuka. Beno ke tala kaka yina dibuundu kele bubu yayi; beno tala na manima mpe beno mona kisika yandi me katuka, na yina beno landila na kukwenda na ntswala na Nzambi, beno ke katukila yandi. Yinga, tata.

206 Mbote mingi, mu talaka kima yankaka, me tuba, “Bawu kele kinkonga; mpe kimpene mpe zaba yawu ve.” Kieleka.

207 Oh, kinkonga mpe zaba yawu ve. Ntangu yayi, muntu yina kele na mvwandulu ya mpasi, kana muntu kele na mawa, mpofo, na mpasi, kinkonga. Ntangu yayi, kana yandi—kana yandi zaba yawu, yandi ke sadisa yandi mosi; kasi kana yandi zaba yawu ve, muntu ya mawa yayi yandi kele ya kufwa na mpeve. Ya kele kieleka? Fiu! Yina vwandaka mwa ngolo. Na mpeve yandi kele ya kufwa, yandi zaba mingi ve samu na kusadisa yandi mosi.

208 Beno me monaka kukulumuka na bala-bala, muntu ya mputu, ya mpasi, ya mpofo, ya mawa, mpe ya kinkonga, mpe beno ke tuba, “Mpangi ya bakala, nge kele kinkonga.” “Oh, mu kele? Oh, Oh, mpangi ya bakala, sadisa munu na kubumbama, sadisa munu na kulwata bilele.”

209 Kasi beno ke belama na bawu mpe ke tuba, “Beno tuba, beno kuzwaka Mpeve-Santu tuka beno kwikilaka?”

210 “Yinki nge kele, exalté? Mbote, tuba, yinki nge zola kutuba? Kuzonza ve mutindu yina na munu, mu kele Presbytérien, mu kele Baptiste, mu kele ya *yayi-mpe-yayi* mpe *yayi-mpe-yayi*.”

211 Kele kinkonga mpe zaba yawu ve! Mu me tubaka yawu ata mbala mosi ve, Biblia ke tuba yawu na nsungi yayi, “Kele kinkonga mpe zaba yawu ve. Kwiza sumba mwa bilele na Munu,” Yandi tubaka.

. . . *bilele ya mpembe* . . .

Bilele ya mpembe kele samu na Basantu; ya kele ludedomo ya Basantu. Beno me mona? . . .

212 Kinkonga? Oh, kieleka! Yinga, tata! Oh, beno ke tuba, “Mpangi Branham, dibuundu ya beto ve, ya kele dibuundu yina

me lutila kulwata mbote na mbanza!” Mu ke sala ve ntembe na yawu; mode ya nsuka, kuzenga bilele na bilele ya mbote, na mutindu ya kulwata ya nsuka ya ba-star ya Hollywood, ya sexy mingi ti beno ke benda atasyo ya konso bakala na bala-bala. Uh-hum. Kieleka.

213 Mama mosi tubaka na munu, yandi tubaka, “Mpangi Branham, nge zola tuba na munu? Ntangu yayi, beto ke sumbaka ba-robe yayi na magazini mpe ya kele kaka yina beno lenda sumba.”

214 Mu tubaka, “Ba ke tekisaka dyaka balele mpe ba ke salaka dyaka bamasini ya kutunga bilele. Yina kele ve mutindu ya kuzwa mulemvo samu na yawu.”

215 Biblia ke tuba, “Muntu nyonso yina ke tala kento samu na kulula yandi me sala pité na yandi.” Ya kele kieleka? Mbote, na yina, kana kento kulwata yandi mosi sexy mpe ti yandi mosi kutelama na ntuala ya bakala, nani ba ke semba samu na yawu? Ya kele kento, yandi me sala yawu. Ya kele kaka kieleka.

216 Ntangu yayi, beno lendaka vwanda ya kuvedila mutindu lis na bakala ya beno. Beno lendaka vwanda ntwenya ya kento yina me salaka ntete ve kima ya yimbi na luzingu ya beno, kele mwense ntangu beno ke kwelana na bakala ya beno. Kasi kana beno lwata mutindu yina mpe nata babakala na kutala beno mutindu yina, yandi me sala yimeni pité na *beno* na kati ya ntima ya yandi. Musumuki yina talaka beno. Mutindu Muklisto beno lendaka lwata bilele ya kulutila mbote na mbanza, mika ya kulutila mbote, kasi ya me lunga ve na Santu ya Nzambi na kulwata mutindu yina.

217 [Kisika ya mpamba na bande—Mu.] Oh, yinga, ya kele ve ya kulunga samu na mwana ya Nzambi.

218 “Oh, ve,” bawu ke tuba. Mbote, bawu ke tuba, “Dibuundu ya beto. . .” Beno kele ya kulwata mbote? Bawu ke tuba yinga. Ba kele “mwama, kele na nsatu ya kima mosi ve.” Kieleka. Mbote, bawu ke tuba, “Ata mpe pasteur ya beto ke basikaka ya kulwata robe ya nene. Chorale nyonso ke basikaka ya kulwata robe ya nene.” Dyabulu ke bumbamaka na yisi ya yawu. Uh-hum. Uh-hum, ya kele kieleka. Oh! Hmm, hmm! Mbote, mu ke sala mbote na kutuba yawu ve. Na yawu, mu lendaka bika yawu kukwenda. Mbote mingi.

219 Oh, bima nyonso yayi ya nene! Miyimbu ya kulwata robe, kufuta ba-chorale, fwana kufuta bawu samu na kuyimba. Hmm. Beto fwana pesa mingi na mulongi kana ve yandi ke kuzwa kizitu yankaka kisika ba ke futa yandi mwa mbote mingi. Yandi ke bokila kimvuka ya ba-administrateur kintwadi mpe ke tuba, “Ntangu yayi, bankundi, mu—mu. . .beno me vwanda mbote na munu awa, beno me pesa munu bankama *mingi* na sabala mosi,” to kima yankaka ya mutindu. “Kasi Dibuundu yankaka ya ba-Presbyterien ya. . .” (Beni bokila yawu ya “Pantekote” to

nyonso yina ya kele.) “na lweka yankaka awa, ba me—ba me sala munu nsilulu ti ba ke pesa munu ya kulutula *mingi*.” Oh, la la!

220 Na yina yinki ke kuzwa santu ya mputu? Wapi siansi kele na bawu? Yinki mwa dibuundu ya mputu ya kufuluka na Mpeve-Santu, wapi mutindu ya siansi bawu ke kuzwa? Bawu ke lenda ve kima ya mutindu yina. Na yawu Mfumu ke telemisa beno kaka kuna kima mosi, amen, yina me bakamaka na Yandi mosi, ke fulusa yandi na Mpeve-Santu mpe ke tula yandi mutindu mukengi ya nene na zulu ya yawu. Ke fidisa. . . Yandi ke tuba, “Mu ke longisila nge na kwiza mpe kusumba lele ya mpembe na Yandi.” Biblia ke tuba, “Ba-robe ya mpembe kele ludedo- . . . ya basantu.”

221 Ntangu yayi, mu ke kwikila ti beto. . . Beto baka—baka nzila ya 19 ntangu yayi. Mu banza ti ya kele pene na nzila ya 20 ti beto kele, landila mutindu ya mbote mu lenda mona. Yinga, yinga, mpe mu ke sukisa na yayi. Ntangu yayi, beno vwanda kieleka swi ntangu yayi na yina beto ke sala yayi. Beno kuwa:

Tala, mu me telama na kyelo, mpe ke na kukonkotaka: kana muntu mosi kuwa ndinga ya munu, mpe zibuula kyelo, mu ke kota na . . . mpe ke kudya na yandi, mpe yandi na munu.

Na yandi yina ke nunga mu ke pesa yandi muswa ya kuvwanda na munu na kiti ya munu ya kimfumu, mpe mutindu munu mpe kununga, mpe kele ya kuvwanda na Tata ya munu na kiti ya yandi ya kimfumu.

Yandi yina kele na dikutu, ti yandi kuwa yina Mpeve me tuba na mabuundu.

222 Yayi kele mosi ya bansamunu ya kulutula nene yina mu me monaka ntete ve na Ngwisani ya Malu-malu. Mu zola beno kutala, “Mu me telama na kyelo mpe ke na konkotaka.” Beto ke sadilaka yayi na bunene, mutindu masonuku samu na mbokolo ya misumuki. Ya kele kieleka? Beto ke tubaka na misumuki, “Yesu kele na kyelo, ke na kukonkota.” Kasi awa Yandi ke na kukonkotaka na kyelo ya *dibuundu* samu ti Yandi mbala mosi tambulaka na bawu, kasi bawu (na organisation ya bawu mpe mutindu ya bawu ya yinza mpe madidi ya bawu) me losa Yandi na ngaanda. Yandi kele na ngaanda ya dibuundu.

223 Ntangu yayi, beno bambuka moyo, na bansungi ya dibuundu ya ntete, na yina beto ke na kusukisa, Yandi vwandaka tambula na kati-kati ya minda sambwadi ya wolo (Ya kele kieleka?), bansungi sambwadi ya dibuundu. Mpe na nsuka awa, beto ke mona Yandi na ngaanda ya wapi dibuundu? Ya Laodicée, dibuundu ya Laodicée. Na ngaanda, ba me lo- . . . me losa Yandi na ngaanda. Mbote, Yandi vwandaka na ngaanda na kumekaka na kuvutuka na kati. Wapi dyambu ya kyadi! Mvulusi ya yinza, ya kutelama na ngaanda ya dibuundu yina Yandi sumbaka na Menga ya Yandi Mosi. Nsoni na bawu!

224 “Mu me telama na kyelo mpe ke na kukonkota.” Na manima ba me losa Yandi na ngaanda to ba me tula Yandi na ngaanda, kuna ke na kumekaka na kuvutuka na kati, na kubondilaka mpe kukonkota na kyelo. Yayi kele kisika ya kulutula kubula na Ngwisani ya Malu-malu. Mu banza ti ya kele ve na kima mosi ya mawa kulutula yayi, samu na kumona Mvulusi ya yinza ba losa na ngaanda ya dibuundu ya Yandi Mosi, na nsungi ya Laodicée. Na manima Yandi me tuba na bawu yina bawu me sala, bima ya bawu ya mvwama mpe nyonso, mpe yina bawu vwandaka, mpe mutindu bawu vwandaka mwa-tiya mpe nyonso yankaka, mpe bawu—bawu vwandaka. . . bawu. . . Yandi zolaka basisa bawu ve na yinwa, bawu losaka *Yandi* na ngaanda. Mpe awa vwandaka nyonso yina, ke na kukonkotaka dyaka na kyelo, na kumekaka na kuvutuka na kati. Samu na yinki? Samu na kupesa bawu Luzingu ya Kukonda nsuka. Bayina kieleka kufwaka Yandi na Calvaire, Yandi vwandaka meka na kuvulusa moyo ya bawu. Ya kele dyambu mosi ya kyadi mu me monaka ntete na luzingu ya munu, mu me banzaka ntete.

225 Ba mangaka Yandi! Na wapi kisika ba mangaka Yandi? Ntangu yayi, beno kuwa, bankundi. Kana yayi ke bula ve! Beno kuzwa dibanza ya yawu, ti ya kota na ntima ya beno. Mvulusi ya beto, ntangu Yandi wandaka na zulu ya ntoto, ba mangaka Yandi na yinsi ya Yandi Mosi. Ba losaka Yandi, Ba mangaka Yandi. Yinza mangaka Yandi mpe komaka Yandi na kulunsi. Mpe ntangu yayi, na dibuundu ya Yandi Mosi, ba me manga Yandi. Na ata kisika ba vwandaka zola Yandi, vwandaka ve na nsatu ya Yandi. Bawu kuzwaka dénomination, bawu vwandaka ve na nsatu ya Yandi. Bawu kuzwaka pape, na yinki bawu zolaka vwanda dyaka na nsatu ya Yandi? Bawu vwandaka na archevêque, surveillant général, bawu vwandaka dyaka ve na nsatu ya Mpeve-Santu. Bawu vwandaka dyaka ve na nsatu ya Yawu. Klisto, Mpeve-Santu, bawu vwandaka ve na nsatu ya Yandi. Na yawu bawu kele. . .

226 Mu ke kwikila ve ti bawu kutelamaka mpe losaka Yandi na ngaanda, samu ti bawu kondwaka Yandi ve. Bawu kondwaka Yandi ve, samu ti bawu vwandaka yimba dyaka minkunga samu na Yandi. Mulongi vwandaka zonzila dyaka na Yandi, na yawu bawu kondwaka Yandi ve. Kasi mutindu ya bawu mosi ya yinza mpe organisation ya bawu, na kubongisaka, na kutubaka, “Bilumbu ya bimangu me luta mpe ya kele ve na kima mutindu *yayi* mpe *yina*.”

227 Mu ke lomba beno. Konso réveil yina kwizaka (konso, beno bantu ya masolo), ntangu yayi, nzila nyonso awa, mabuundu yayi, konso réveil yina kwizaka, . . . yandi vwandaka ntangu nyonso ya kunatama na ngaanda ya organisation. Muntu nyonso yina bandaka ntete réveil, vwandaka na ngaanda ya ba-organisation. Mpe ntangu nyonso réveil mosi—mosi vwandaka banda, bawu vwandaka na bidimbu mpe bimangu ya kutuba

na bandinga mpe bakubeluka, mpe nyonso ya mutindu yina, vwandaka salama. Na ntangu kaka fondateur vwanda kufwa, na manima bawu vwandaka bongisa yawu mpe vwandaka basisa organisation na yawu, mpe vwandaka kwenda kaka na “lufwa” mpe Nzambi vwandaka lutisa dyaka ve ntangu ya yawu. Ya kele kaka kieleka.

228 Mpe awa Yandi kele na nsungi ya nsuka ya dibuundu, me telama na ngaanda ya kyelo, Nzambi ya Ngolo nyonso. Yawu—yawu ke pasula ntima ya munu na kubanza na yawu. Mfumu ya munu ya kutelama na nganda ya kyelo ya dibuundu ya Yandi Mosi, na manima ya kuvwanda ya kupusa na ngaanda na mutindu ya yinza mpe na madidi mpe na denomination mpe kisayi, me telama na ngaanda ya kyelo, ke na kukonkotaka, samu na kumeka na kuvutuka na kati. Ntangu mu banzaka yawu, ntangu fyoti me luta, mu me yinama na mesa mpe me banda na kudila. Mu banzaka . . .

229 Mu ke banzaka ntangu yankaka, ntangu Yesu vwandaka ya kuvwanda na yinzo yango ya ntama ya ba-Pharisien kuna, muntu ve vwanda kipe Yandi, ntangu Yandi vwandaka na makulu ya mvindu. Ba kutanaka na Yandi ve na kyelo mpe ba sukulaka Yandi ve makulu mpe kupakulaka Yandi, na kukatulaka matiti mpe bima kisika Yandi tambulaka; lele ya Yandi yina kombaka ntoto, kunata nsunga yango ya nzila kisika bampunda mpe nyonso vwandaka zyeta, mpe—mpe kuzwaka nsunga yango na zulu ya Yandi.

230 Bawu vwandaka sukula ntangu nyonso makulu, ya vwandaka kinkulu. Mpe boyi mosi vwanda vwandaka na kyelo samu na kusukula makulu. Mpe ntangu muntu vwandaka kwiza, ba zolaka sukula makulu ya yandi, mpe vwandaka kwenda sosa kuna mpe kuzwa mwa sandali yina zolaka lunga yandi, kulwatisa yandi yawu. Mpe bawu vwandaka kusa yintu ya yandi mpe ya yandi . . . mpe vwandaka sala yandi kubasika nsunga ya mbote, mpe kuzika na laka ya yandi yina salaka minzenzi ya mwini, vwandaka komba nsuki na yandi. Yandi vwandaka kota.

231 Mpe ba vwandaka yamba nzenza, ntangu yayi awa kele mutindu bawu . . . Telema fyoti awa, Pat, mu zola kulakisa beno kima mosi. Beno tala mutindu bawu vwanda salaka, bawu vwanda yambaka yandi mutindu yayi. Ntangu yayi, mu banza . . . Ve, mutindu awa, mu banza ti ya kele kima mosi na mutindu yayi awa, na kuyamba mutindu *yayi*, beno me mona, mpe vwandaka bumbasana mosi na yankaka. Mpe kuna yandi vwandaka ya kuyamba.

232 Kasi ntangu Yesu kwizaka na feti yayi, kaka mutindu Yandi kwizaka na feti ya Pantekote awa, muntu mosi kondwaka Yandi. Ba vwandaka sepela mingi na yina me tala mambu ya bawu, ba-bishop mpe nyonso yina vwandaka kuna. Ba bokilaka Yesu kasi muntu mosi ve sukulaka makulu ya Yandi. Mpe kuna Yandi

vwandaka ya kuvwanda na nsongi, na mpasi bawu zabaka ti Yandi vwandaka kuna, na makulu ya Yandi yina vwandaka basika nsunga, mvindu na zulu ya Yandi nyonso, fundu-fundu.

²³³ Mpe na manima ya kele na kento ya ndumba ya mawa kuna na bala-bala yina me kwiza kuna, yandi vwandaka kaka na mwa ndambu ya mbongo na saki. Mpe yandi talaka kuna mpe yandi monaka Yesu ya kuvwanda kuna na makulu ya mvindu. Ya pasulaka ntima ya yandi. Yandi tubaka, “Yina kele bakala yina lemvokilaka kento yango masumu ya yandi. Ya kele muntu yina mu kuwaka ti belusaka. Samu na yinki bawu ke sala keba na Yandi ve?”

²³⁴ Samu ti ba-bishop mpe bawu nyonso vwandaka kuna, bawu losaka Yandi. Kuna Yandi . . . Bawu bokilaka Yandi na kukwiza.

²³⁵ Ya kele mutindu beto ke salaka. Beto ke bokilaka Yandi na kukwiza na balukutakanu ya beto, kasi na yina ntangu beto ke kwiza beto kele na nsoni ya Yandi. “Oh, mu ke telama ve kuna mpe ke tuba ‘Lukumu na Mfumu.’ Oh, ve, kuna kele ya kuvwanda ba-Jones, ba ke banza ti mu kele exalté.” Beno bantu ya luvunu! Ya kele kieleka. “Mu kele na boma ti mu zonga na bandinga mpe ba ke bokila munu ‘muntu ya bandinga.’” Beno kele muntu ya mawa ya mpasi!

²³⁶ Ntangu yayi, beno bambuka moyo, yayi ke na kulandila, beno me mona. Nge kele muntu ya mpasi, ya mawa, ya mputu, ya kinkonga, mpe ya mpofu, mpe zaba yawu ve.

²³⁷ Yesu vwandaka ya kuvwanda kuna na makulu ya kusukula ve. Mpe ndumba ya kento ya bala-bala, mu lendaka mona yandi kukwenda kuna, beto—beto zonzila . . . beto baka yandi minuti mosi. Mu lendaka mona yandi kukwenda na magazini, mpe yandi ke tuba, “Mu . . .” Mpe masa ya meso ke na kubwa na kizizi ya yandi, mpe yandi me tuba, “Mu—mu lenda sala yawu ve. Kana—kana—kana mu nata kima yayi kuna, Yandi ke zaba kisika mu me kuzwa mbongo yayi. Yandi zaba mutindu mu me kuzwa yawu, kasi ya kele kaka kima yina kele na munu.”

²³⁸ Ya kele kaka yina Yandi zola. Ya kele kaka yina Yandi zola. Beno me mona? Yandi ke kipe ve. Beno kwiza kaka, “Mu ke na kunata kima ve na maboko ya munu.”

²³⁹ Na yawu yandi bakaka mananasi mosi mpe yandi nataka yawu. Mpe yandi mataka kuna mpe yandi banzaka, “Oh, kana mu lendaka kaka kumona Yandi!” Mpe kuna yandi kotaka na malembe mpe belamaka kisika mosi na kyelo.

²⁴⁰ Mpe, ve, ba yambaka Yandi ve. Na yawu yandi bakaka vase ya albâtre mpe tulaka yawu na zulu ya yandi . . . na makulu ya Yandi, mpe bandaka na kusukula makulu ya Yandi. Mpe yandi bandaka na kudila, “Oh, ya fwana vwanda Yandi. Ya kele Yandi yina mu vwanda tangaka ntangu nyonso na Biblia. Mu zaba ti Yandi ke zaba yawu.” Mpe kima ya ntete beno zaba . . . Wapi mutindu ya maza ya kitoko samu na makulu ya Yandi, masa

ya meso ya kubalula ntima na kubwaka na makulu ya Yandi. Yandi vwandaka ve na kinuka samu na kukusuna makulu ya Yandi na yawu, na yawu kuzwaka mpe bakaka nsuki ya yandi. Makolo ya yandi nyonso ya kitoko kunyangukaka, masa ya meso na kubwaka na kizizi ya yandi mutindu yina. Yandi sukulaka makulu ya Yandi, mpe ntangu mosi na yankaka yandi lendaka, “bézé,” kubézé makulu ya Yandi, kusukula makulu ya Yandi mutindu yina.

²⁴¹ Yesu na makulu ya mvindu, mpe muntu ve ke sala keba na yawu. Mpe bubu yayi Yandi ke na kunata nkumbu mosi ya mvindu mutindu exalté, *kima mosi to yankaka* ya mutindu yina, mpe muntu ve kele na lenda ya kutelama samu na Yandi!

Kulunsi yayi ya busantu mu ke baka,
Tii lufwa ke vwanda na munu na kimpwanza,
Mu ke baka nzila na mwa bantu ya kiadi ya
Mfumu,
Mu bandaka na Yesu, O Mfumu, twadisa munu
tii nsuka.

²⁴² Twadisa munu, Mfumu, ata yina ya ke lomba, mu kele, mutindu Jacob, na kuse, ditadi. Wapi luswaswanu ya ke sala? Yina Yandi salaka samu na munu!

²⁴³ Mpe ndumba ya mawa yayi kuna, vwandaka dila, vwandaka boka. Mpe kima ya ntete beno zaba, awa telamaka Simon, muntu ya nene yina salaka Yandi kukwiza kuna, yandi tubaka, “Uhm, uhm, uhm! Yina ke lakisa kana Yandi kele profete to ve, Yandi zolaka zaba wapi mutindu ya kento ya kele.” Muntu ya luvunu yina!

²⁴⁴ Na yawu na manima kento yango me manisa. . . Mpe Yesu ningisaka ve makulu ya Yandi, Yandi vwandaka kaka mpe vwandaka tala yandi mpe vwandaka tala yandi mbote. Oh, mu zola yawu. Ya kele ve bima ya nene yina beto ke salaka, ya kele bima ya fyoti beto ke bikaka na kusala ve bantangu yankaka. Yandi vwandaka tala yandi mbote, yandi vwandaka tala kaka yandi kuvwanda kuna mbote. Muntu ve vwandaka sala keba na Yandi; na nsuka, kento yina na kati kuna na kudilaka mpe na kusukulaka makulu ya Yandi, mutindu kusala keba na yawu, bendaka atasyo ya bantu. Mpe Yandi vwandaka tala kaka yandi, kutubaka ata dyambu ve.

²⁴⁵ Kiboba Simon ya kutelama na manima kuna, tubaka, “Uhm! Beno ke mona kana Yandi kele profete to ve, mutindu yina ve? Mu tubilaka beno! Mu tubilaka beno! Kana Yandi vwandaka profete, Yandi zolaka zaba nani kento yina kele. Beno me mona, beto vwandaka dibuundu ya nene awa, beno me mona, beto zaba, yawu. Beto zaba ti Yandi kele ve profete, Yandi zolaka zaba yawu.”

²⁴⁶ Na manima yandi. . . Na manima yandi me manisa, masa ya meso ya kubalula ntima vwanda kubwa na kizizi ya yandi,

kusukulaka makulu ya Yesu. Yandi . . . mu banza Yandi kumaka fyoti ya madidi.

²⁴⁷ O Nzambi, mu wandaka zola kuvwanda kuna! Mu zolaka sukula dyaka yawu. Yinga, tata.

²⁴⁸ Bakala, kento ke kuzwa ve mpasi mingi na kukusuna makulu na nsuki ya yandi bubu yayi? Yandi fwana telama na zulu ya yintu ya yandi samu na kusala yawu, samu na kuzwa nsuki mingi samu na kukusuna yawu. Yinga, tata, bawu m zenga yawu nyonso.

²⁴⁹ Kasi kuna, makulu ya Yesu, muntu mosi ve wandaka kipe . . . (bantu ke tonga), na kuvwandaka na nsoni, na nsunga yina na makulu ya Yandi. Kento sukulaka Yandi. Na manima Yandi me—na manima Yandi me manisa, Yandi talaka yandi mutindu ya kutuba, “Mbote mingi.”

²⁵⁰ Yandi talaka kuna, kutubaka, “Simon, mu ke na kima mosi ya kutuba na nge. Nge bokilaka Munu awa, mpe nge me kutanaka Munu ve na kyelo. Nge pesaka Munu ata maza samu na kusukula makulu ya Munu. Nge ata mbala mosi ve kusaka yintu ya Munu ntangu Mu kotaka, samu na kubomba kunyengisa ya mwini na Munu. Nge ata mbala mosi ve kuyambaka Munu na kupesaka bézé ntangu Mu kotaka. Kasi kento ya mawa yayi,” (Oh, la la.) “nzenza, ya ndumba ya bala-bala yayi, yandi wandaka ve na maza samu na kusukula makulu ya Munu mpe yandi me sukula yawu na masa ya meso ya yandi. Yandi wandaka ve na kima ya kukusana yawu, na yawu yandi me baka nsuki ya yandi, yandi me kusuna na yawu. Yandi me landila na kupesa bézé na makulu ya Munu. Ntangu yayi Mu zola kutuba na nge: masumu ya yandi, yina wandaka mingi, ba me lemvokila yandi yawu.” Ya kele kieleka, ata mbala mosi ve kutubaka kima na zulu ya yandi. “Ba me lemvokila masumu ya nge, yina kele mingi.”

²⁵¹ Mpe bubu yayi na yina Yesu, kele ya kutelama na ngaanda ya kyelo ya ba-organisation ya ba-Pentecotiste, ya ba-organisation ya ba-Baptiste, Ba-organisation ya ba-Méthodiste, na kumeka na kuvutuka dyaka na pantekote, mpe bantu ke na kulutaka Yandi. Na manima beno . . . mutindu ya beno ya yinza mpe nyonso me pusa Yandi na ngaanda ya dibuundu, Yandi me telema, ke na kumeka, na kudilaka samu na kuvutuka dyaka na kati. Mpe, oh, ya kele kima ya mawa mingi yina mu me monaka ntete ve na luzingu ya munu. Bawu wandaka ve na nsatu ya Yandi! Yandi, na ngaanda, ke na kukonkotaka, na kumekaka na kukota na kati. Ya kele kima mutindu mosi Yandi ke na kumekaka na kusala. Samu na yinki? Samu na yinki? Yandi wandaka na ngaanda.

²⁵² Bawu ata mbala mosi ve kulosaka Yandi na ngaanda. Bawu ke yimbila dyaka Yandi, ke longa samu na Yandi, kasi bawu ata mbala mosi ve kondwaka Yandi na mvwandulu ya

bawu. Ya kele kieleka. Bawu vwandaka landila kaka. Samu na yinki? Bawu vwandaka tala mbote ve. Bawu vwandaka tala na yinzo ya bawu ya nene. Bawu vwandaka mvwama. Bawu vwandaka tala na organisation ya nene na yina na kati bawu vwandaka, na kumekaka na kutunga yawu, na kuzwaka bamambeke mingi samu na kukota, mpe bawu kondwaka Yandi ve. Ve, ve. Bawu kondwaka ve kuzonza na bandinga. Bawu kondwaka ve bansangu ya ngolo Nzambi, ya nene Yina ke pasulaka tii na ntima mpe ke zengaka ntima, ke pasulaka bima ya yinza mpe ke katulaka mutindu kitini ya disangu. Oh, bawu . . .

²⁵³ Kana nge longa mutindu yina na dibuundu ya bawu, bawu ke losa nge na ngaanda. Mpe ya kele mutindu Mpeve-Santu ke longaka. Yesu tubaka, “Beno nsungi ya bampidi! Beno—beno banyoka na matiti!” Mpe Jean salaka yawu, mpe, mpe bantu ya nene ya kupakula, ntangu nyonso ke katukaka na kubumbama ya bawu. Ya kele kieleka.

²⁵⁴ Kasi bawu kondwaka Yandi ve, samu ti bawu vwandaka na Yawu ve. Beno me mona? Na yawu bawu vwandaka na mwa fololo yina vwandaka bomba bawu na mukongo, mpe vwandaka tuba, “Beno ke kota kaka, beno tula nkumbu ya beno kaka awa, mpe—mpe beto ke nata beno na bumambeke ya beno. Mpe beno kwenda baka mukanda ya beno na dibuundu yankaka yina mpe beto ke yamba beno, mpe—mpe nyonso yina. Ntangu yayi, nge ke sila kupesa yikwa konso mvula?” Beno me mona, yawu yina, “Mvwama, kele na nsatu ya kima ve.” Oh! Kasi beno kele na nsatu ya kima ya kulutila nene mpe beno me kuzwa Yawu ve, Yesu ya kutelama na ngaanda ke na kumeka na kuvutuka na kati na pantekote.

²⁵⁵ Yinki beno ke banza ti ke salama na nkokila yayi na dibuundu ya ba-Méthodiste kana ti Mpeve-Santu kulumukaka na zulu ya dibuundu mpe ti bawu kubanda na kuboka, kudumuka, kuzonza na bandinga mpe kusala mutindu ya kukola . . . nkonga ya bantu ya kulawuka malafu? Mbote, Kimoko ke losa dibuundu yango ya ba-Méthodiste na ngaanda ya Kimoko. Beno zaba yawu. Yinki ke salama na dibuundu ya ba ba-Baptiste kana ya kusalama? Kima mutindu mosi. Na ba-Pentecotiste? Mbote, ya kele na mingi ya bawu, ya me salamaka kima mosi. Kieleka. Yinga, tata, bawu ke lenda ve na buzoba yina. Bawu ke tuba, “Mbote, bawu me bebisa tapis ya beto ya malu-malu.” Uh-hum, kieleka. Oh! Oh! Wapi nkonga ya bantu ya mawa bawu kele. Ya kele kieleka.

²⁵⁶ Mbote, mbote mingi, Yandi vwandaka mbala mosi na bawu, Yandi tambulaka na bawu na kati-kati ya minda sambwadi ya wolo. Mpe awa kele mvutu: ba-dénomination mpe bima ya bawu ya yinza, ba-bishop, ba-cardinal ya bawu, mpe mutindu nyonso ya bawu ya yinza, me losa Yandi na ngaanda mpe bawu ata mbala mosi ve kondwaka Yandi. Mpe dibuundu . . .

257 Ntangu yayi, yinki beto ke sala samu na kuvutula Yandi na kati? Kana Yandi kele na ngaanda ya dibuundu ya Pantekote ntangu yayi, yinki beto ke sala samu na kuvutula Yandi na kati? Ya ke lomba bantu nyonso na kuvote na kuvutula Yandi? Ya ke lomba kusola ya pape ya malu-malu, ya cardinal ya malu-malu? To mu banza ti ya ke lomba—ya ke—ya ke lomba na kutelemisa denomination ya malu-malu. Yina ata mbala mosi ve ke sala yawu! Yina ata mbala mosi ve ke sala yawu. Denomination ya malu-malu ke sala yawu ve, cardinal ya malu-malu—ya malu-malu ke sala yawu ve, pasteur ya malu-malu ke sala yawu ve, evangéliste yina ba ke futa mbote ke sala yawu ve. Ya kele na kima ve na yinza yina lendaka salama kasi beno beno mosi. Wapi mutindu beto ke kotisa Yandi? Na nzila ya vote ve. Ve, tata. Beto ke vote ve samu na Yesu na kuvutuka na kati, samu ti Yandi ke kota ve.

258 Yawu yayi—yawu yayi, “Kana muntu nyonso kuwa Ndinga ya Munu mpe zibula kyelo.” Ntangu yayi, beto zaba yinki kyelo kele kuna. “Kana muntu nyonso ke zibula kyelo, kuwa Ndinga ya Munu.”

259 Ve—ve “Kana dibuundu mosi...Kana organisation mosi...” Ve, tata. Yandi ke salaka ve na bawu, bawu kele ya kufwa mpe kele ya kusuka na kubanda. Yandi ke yinaka yawu, Yandi ntangu nyonso ke yinaka yawu. Yandi tubaka ti Yandi ke yinaka yawu! Mpe Yandi ke yinaka dyaka yawu na nkokila yayi!

260 “Kasi kana muntu nyonso,” muntu nyonso ya Méthodiste, muntu nyonso ya Baptiste, muntu nyonso ya Presbytérien, to muntu nyonso ya Katolika, muntu nyonso ya Dibuundu ya Nzambi, muntu ya Nazaréen, muntu ya Pantekote. “Muntu nyonso yina ke kuwa Ndinga ya Munu mpe ke zibula kyelo, Mu ke kota mpe ke dya na yandi mpe yandi ke na Munu.” Yina kele nsangu samu na dibuundu ya Pantekote. Kumeka ve na kuvumbula organisation ya Pantekote, kasi kuvumbula Lusakumunu ya Pantekote na kati ya ntima ya muntu yandi mosi. Yina kele kaka nzila. “Mpe Mu ke kudya na yandi, mpe yandi, na Munu.”

261 Yinki ke sala muzabisi na dibuundu... nsangu na dibuundu ke longa beto kuna, ke longa—ke longa beto? Ve kukula na Mpeve. Ve, tata. Kubwa na Mpeve, beto kele na kubwa ntangu nyonso. Mutindu ya kusala... Minati-nsangu na dibuundu mpe nsangu na konso nsungi ya dibuundu ke fundisa mutindu ya dénomination. Konso nsangu samu na dibuundu, dibuundu vwandaka ntangu nyonso na kubwa mpe vwandaka kuwa Yawu ve. Nsangu samu na dibuundu vwandaka tala ve na ba-dénomination. Mpe yawu ke sala Miklisto ya kuvukisa, ya kifwani, ya kele kieleka, yina zaba ve kima na yina me tala Nzambi to Mpeve-Santu. Ya kele kieleka mutindu mu kele ya

kutelama na estrade yayi na nkokila yayi. Bamambele ya mbote ya mwa-tiya, ba ke losa kaka bawu na yinwa ya Yandi.

²⁶² Paul kukebisaka, Bantu ya makanda vwandaka kintala. Ntangu yayi, mu ke zola ti bayankaka ya beno, kana beno zola, kubaka Romains, kapu ya 11, na nzila ya 15 tii na 27, kaka samu beno sonika yawu, beno nyonso. Mpe kuna, ngunga na kuvwandaka me luta, mu ke tanga yayi samu na beno ntangu yayi kaka ntete beto kwenda, samu ti ya kele. . . Ntangu yayi, Romains, kana beno ke zola kusonika yawu, 11:15 tii na makumi zole na. . . na 27. Paul tubaka na bawu, tubaka, na kuzonzaka na Bantu ya makanda kuna, Romains, yandi ke tuba, “Kana Nzambi. . .” Ntangu yayi, beno kuwa na yina beto ke na kusukisa na bansungi ya dibuundu! Paul ke tuba, “Kana. . . Nzambi kima ve na kuzenga yinti ya olive ya ntete, kasi zengaka yawu samu na kukondwa lukwikilu.”

²⁶³ Ya kele kieleka? Yinki salaka ti ba zenga yawu? Samu ti bawu kumangaka Pentecote. Ya kele kieleka? Na Kilumbu ya Pantekote ba vwanda seka mpe vwandaka vweza Mpeve-Santu.

²⁶⁴ Ntangu Yesu vwandaka awa na zulu ya ntoto, Yandi tubaka. . . Bawu bokilaka—bokilaka Yandi, “Béelzébul,” bawu tubaka “Yandi vwandaka dyabulu,” mpe “Yandi kele ngangankisi,” nyonso yankaka.

²⁶⁵ Yandi tubaka, “Mu ke lemvočila beno samu na yawu, kasi ntangu Mpeve-Santu ke kwiza beno zonga ve na kuteleminaka Yawu; samu ti kana beno zonga na kuteleminaka Yawu, ata mbala mosi ve ti ya ke vwanda ya kulemvokila na beno.”

²⁶⁶ Mpe beno bambuka moyo ntangu Yesu tumaka bilandi ya Yandi, “Ve na kukwenda na Bantu ya makanda.” Ya kele kieleka? “Kasi beno kwenda na mameme ya kuzimbana ya Israël.”

²⁶⁷ Wapi mutindu bawu kufundisaka bawu mosi? Na kuvwenzaka Mpeve-Santu, na kubokilaka Mpeve ya Nzambi “kima ya mvindu.” Ba vwandaka seka Yandi ntangu ba vwandaka bina na Kimpeve, mpe nyonso yina, na Kilumbu ya Pantekote. Mbanza yina mosi, ba vwandaka seka Yawu, Titus kufwaka bawu na kati kuna mpe menga ya bawu kubasikaka tii na mwelo. Bawu kudyaka bana ya bawu mosi, mpe nyonso, na kati ya mvula nkama mosi. Mpe ya kele kieleka. Mosi ya bayinsi ya kulutila nene ya yinza kumaka ya kulutila yisi, mpe mwanganaka na. . . na mipepe yiya ya ntoto. Samu na yinki? Kukondwa lukwikilu! Mpe yina vwandaka nzutu ya yinti, ya yinti ya ntete, Israël.

²⁶⁸ Mpe Paul ke tuba ve yawu kuna? Nani kele na Masonuku kaka kuna? Nge me kuzwa yawu, Pat? Telema mpe tanga kubanda nzila ya 15 tii nzila ya 27. [Mpangi Pat ke na kutanga ba-Romain 11:15—Mu.]

[Samu ti kana kumanga ya bawu kele kuwisana ya yinza, yinki kuvutuka ya bawu—ya bawu ke vwanda, kasi luzingu na lufwa?]

[Samu ti kana mbuma ya ntete kele ya santu, muvimba kele mpe ya santu: mpe kana musisa kele ya santu, mutindu mosi kele bintala.]

[Mpe kana ndambu ya bintala ba me zenga, mpe nge, na kuvwandaka yinti ya olive ya mfinda, yina ba me namika na kati ya bawu, mpe na bawu ke zinga na musisa mpe na mafuta ya yinti ya olive;]

[Kusala ve nge mosi lunangu na kutelemina bintala. Kasi kana nge sala lunangu, nge ve ke nata musisa, kasi musisa nge.]

[Nge ke tuba kuna, Ba me zenga bintala, ti samu ba namika munu.]

[Mbote; samu na kukondwa lukwikilu ba zengaka bawu, . . .]

Beno kuwa, “Kukondwa lukwikilu.” Mbote mingi, landila.

[. . .mpe nge ke vwanda na nzila ya lukwikilu. Kuvwanda ve na lunangu, kasi zitisa:]

[Samu ti kana Nzambi bikaka ve bintala ya kieleka, yandi ke bika mpe nge ve.]

[Na yawu tala bumbote mpe nganzi ya Nzambi: na bawu yina kubwaka, nganzi; kasi na nge, bumbote, kana nge landila na bumbote ya yandi: na mutindu yankaka nge mpe ba ke zenga yandi.]

[Mpe bawu mpe, kana na kulandilaka dyaka kukondwa lukwikilu, ba ke namika bawu: samu ti Nzambi kele na kiyeka ya kunamika dyaka bawu.]

[Samu ti kana ba zengaka nge na yinti ya olive yina kele na mfinda ya yinza, mpe ba namikaka nge na mutindu yankaka na yinza na yinti ya olive ya mbote: wapi mutindu dyaka samu na bayayi, bayina vwandaka bintala ya kieleka, ba namika na yinti ya bawu mosi ya olive?]

Hmm!

[Samu ti mu ke zola ve, bampangi, ti beno kuvwanda ya kukondwa na kuzaba dinsweki yayi, ti beno vwanda ve ndwenga na mabanza ya beno mosi; ti bumpofo yina na ndambu kusalamaka na Israël, kele tii muvimba ya Bantu ya makanda ke kota.]

[Mpe kuna Israël ke kuzwa mpulusu: mutindu ya kele ya kusonama, Ya ke basika na Sion Kivuukisi, mpe ke katula ntima ya Jacob ya kumanga kinzambi:]

[Samu ti yayi kele ngwisani ya munu na bawu, ntangu mu ke katula masumu ya bawu.]

269 Beno me bakula Yawu? Paul ke tubaka, “Kana Israël kumataka mpe kumonaka bidimbu awa ya Mpeve-Santu, mpe ba zengaka . . .” Beno bambuka moyo, samu ti bawu kumangaka nsangu ya Paul (mbotika na Nkumbu ya Yesu, kufungula masumu mpe mbotika na Nkumbu ya Yesu, bidimbu mpe mambu ya ngitukulu kulanda mukwikidi), mpe bawu kumangaka Yawu. Mpe bawu tubaka: “Tala, beto ke kwendaka na Bantu ya makanda.” Ya kele kieleka?

270 Beto mona, mu banza ti ya vwandaka na . . . kisika ya ntete ba bokilaka bawu Baklisto, ya vwandaka na Ephèse, to, na Antioche.

271 Ntangu yayi—ntangu yayi, kana—kana ya ntete vwandaka ya santu, bintala ya santu, ya yinti ya ntete, mpe samu ti bawu kwikilaka ve Nsangu ya Pantekote yina Paul vwandaka longa (Ya kele mutindu yina?), Nzambi zengaka bawu mpe bakaka yinti ya olive ya mfinda (yina vwandaka Bantu ya makanda, beto) mpe namikaka beto samu ti beto lendaka zinga na ki- . . . na kima ya yinti yina.

272 Ntangu yayi, wapi mutindu dyaka na kilumbu yayi na yina beto ke na kumanga Nsangu ya Pantekote yina kwizaka na kulutaka bansungi ya dibuundu, wapi mutindu dyaka Nzambi kele na lenda na kukatula yinti yango ya mfinda na yawu, na mutindu nyonso, mpe kubika yankaka yina kukota? Samu ti yandi ke manga Yawu, samu na kukondwa ntembe. Ntangu yayi beto vukisa yawu na lesu ya suka yayi. Beno zamba kisika beto me telema ntangu yayi, mutindu yina ve? Beto me kuma na ntangu ya nsuka na ngtangu ba ke nata Dibundu ya Bantu ya makanda, Enlevement ya Yawu; mpe ntangu yina Mpeve-Santu ke kwiza na zulu ya ba-Juif, mpe Yesu na kusala Yandi mosi kuzabana, samu na kutula kidimbu na nkama na makumi yiya na yiya ya mafunda. Yawu yina. Samu na kuvutula yinti ya ntete (kuna na Lusakumunu) na Israel dyaka.

273 Yesu ke telama ve na ngaanda ya kyelo ya beno mpe ke konkota ntangu nyonso. Ya kele na ntangu Yandi ke lenda dyaka ve mpe ke kwenda, kuna beno ke sala kukonkota kasi ata mbala mosi ve beno ke tala Yandi. Beno kwiza na yina ya kele ntangu. Beno kwiza na yina ya kele na kukonkota. Beno bebisa yawu ve na kima ya kulutula yisi na mbotika ya Mpeve-Santu mutindu bawu kuzwaka na Pantekote, na mutindu mosi ya mbotika ya maza, bima mosi yina bawu salaka kuna. Beno bika ve kima mosi kukota na kati ya ntima ya beno ya yisi kulutula yawu.

274 Ntangu yayi, samu na beno bankundi ya munu ya Katolika, beno bika mu tuba na beno kima, beno ke kwikila na mwense Marie. Mwense Marie, yina vwandaka mama ya Yesu Klisto, yandi zolaka kwenda na Pantekote mpe kuzwa kifuluka na

Mpeve-Santu, mpe yandi salaka mutindu muntu ya kulawuka malafu. Yandi vwandaka na kati-kati ya nkama na makumi zole, kuzwaka mbotika ya Mpeve-Santu, zonzaka na bandinga mpe salaka mutindu kento ya kukola kuna, na yisi ya Mpeve ya Nzambi. Mpe kana mwense Marie zolaka sala yawu samu na kukota na Nkembo, wapi mutindu beno ke kota na kati ya Yawu, na kima mosi ya yisi kulutila yawu? Beno banza na yawu. Ya kele kieleka.

²⁷⁵ Ba-Baptiste...Mulongi ya Baptiste yina kele awa na manima zola vwanda ya kundima ti ya kele ya kutuba mpe na ba-Baptiste. Ya kele samu na muntu nyonso, beno tala ve nani ya kele.

²⁷⁶ Na yawu kuvwanda kaka ya dibuundu mpe kutuba credo, mpe kukwenda na dibuundu konso Lumingu na suka, ya ke sala beno ata mbuma mosi ya mbote ve. Beno ke na kusekaka kaka Nzambi. To beno ke vwanda Muklisto ya kieleka to beno ke vwanda ata kima mosi ve. Beno vwanda to tiya to madidi. To beno vwanda na ngaanda...Samu ti beno lenda vwanda ve... Beno me monaka ata mbala mosi ve ndeke ya ndombe mpembe, beno me monaka ata mbala mosi ve muntu ya kukola ya kukola ve, beno me monaka ata mbala mosi ve musumuki-santu. Ve, beno me monaka ve, ya kele ve. Beno kele to ya kufuluka na Mpeve-Santu mpe Nzambi ke zinga na kati ya beno, to beno kele kima ve. Beno—beno kele to beno kele ve.

²⁷⁷ Kuna na yawu beno fwana—beno fwana bambuka moyo ti Yesu kele ya kutelama na kyelo ya beno, mpe beno bambuka moyo ti Nzambi silaka awa ti Yandi ke vwanda na bilumbu yayi, samu na yinki? Kumanga. Yinki salaka ti ba zenga Israël, yinti ya ntete? Samu ti bawu kumangaka Nsangu ya Paul ya Pentecote. Mpe beno ke kwikila ti yayi kele nsungi ya nsuka ya dibuundu? Biblia ke tuba yawu! Mpe ke tuba yinki ke salama na bawu? Ba ke zenga bawu samu na kumangaka Nsangu ya Pantekote, mpe kuna Nzambi ke vutuka dyaka na ba-Juif.

²⁷⁸ Mpe Israël nyonso kuna ke kuzwa mpulusu, samu ti Yandi ke baka bawu mutindu yinsi, ve mutindu muntu yandi mosi. Kasi samu na beno mpe munu ya kele muntu yandi mosi, samu ti Yandi kwizaka na ba-Juif...Actes, na Buku ya Actes, Yandi kwizaka na Bantu ya makanda samu na kubaka “bantu na Bantu ya makanda samu na Nkumbu ya Yandi,” Kento ya Yandi ya makwela. “Bantu,” mosi awa, mosi kuna, mosi na lweka awa, mpe Yandi ke salaka na beto na mutindu ya muntu yandi mosi, mpe kukondwa kutala bantu, ba-credo, to ntinta. Yandi ke salaka na beto na mutindu muntu yandi mosi, ya kele kisanga ya Yandi yina Yandi ke tula na autel ya Yandi. Kasi mutindu ba-Juif, Yandi ke salaka ntangu nyonso na Israël mutindu yinsi, bawu kele yinsi ya bantu, yinsi ya Yandi.

279 Mu ke na kyese na nkokila yayi ti beto kele na Nsangu yayi. Mpe mu kele na kyese mingi ti beno me vwanda, mpe kuvwanda ya beno me vwanda mingi ya kusepela na munu. Mu ke vutula matondo na Nzambi ya Ngolo nyonso samu na Yandi na kubikaka munu kumona yina mu me mona, mpe me vwanda na lenda ya kupesa yawu na dibuundu yayi, mpe ntangu yayi Yawu me katuka na ntima ya munu. Ya me vwanda mwa ntangu mosi Mpeve-Santu salaka na ntima ya munu, mu lendaka katula Yawu ve, mu zolaka tambula kaka na Yawu.

Ya kele na bima zole mu talaka mu vwandaka ya twadisa na kusala.

280 Kukwenda na Shreveport, na Louisiane, samu na lukutakanu na Mpangi Moore. Mpe kento ya munu yina kele ya kuvwanda kuna lenda tuba na beno. Samu ti pene ya basabala mu vwandaka dila, “Mu vwandaka zola kukwenda na Shreveport. *Samu na yinki?*” Mpe muntu nyonso vwandaka kuna na Shreveport zaba *samu na yinki* ntangu yayi. Bawu ata mbala mosi ve me monaka to me kuwaka kima ya mutindu yina. Milongi ke na kwiza bisika nyonso, ba-Baptiste mpe mutindu yankaka. Muntu mosi tubaka ti yandi bandaka na kukwenda, yandi tulaka diboko ya yandi na zulu ya frigo, mpe Mpeve-Santu kulumukaka na zulu ya yandi mpe tubaka, “Kwenda na Shreveport, na Louisiane, ya ke tubama na nge kuna yinki ya kusala.” Ba tubaka na yandi nkumbu ya munu mpe kisika ya kutala... Yandi tubaka, “Yandi ke tuba na nge yinki ya kusala.”

281 Mu tubaka, “Baptistère kele ya kuzibuka na yisi ya bimatinu. Nge kele na nsatu ya mbotika ya Mpeve-Santu.” Mpe kuna . . .

282 Na yawu bima ya mutindu yina, bantu ke na kuzonzila, mpe—mpe bapofesi mpe nyonso ya bima yango ke salama kaka kuna na kati-kati ya beto.

283 Na yina mu tubaka, “Mu fwana kwenda na Jeffersonville mpe kusonika buku yayi, samu ti mu zaba ve bantangu yikwa mu fwana vwanda awa. Kasi kana mu tuba Yayi mpe ti ba sonika Yawu, na manima mu me kwenda Bandinga ke landila na kuzinga.” Mu kele na disolo ya kusonika yina ke kota na buku. Mpe mu me kwiza awa samu na kunata yawu na ntwala ya dibuundu samu na kuzwa lutwadusu ya kimpeve ya Mpeve-Santu, samu ti mu zabaka ve bima yayi munu mosi. Ya kele kieleka. Ya kele na Nkumbu ya Mfumu, ti ya kele kieleka, “Mu zabaka yawu ve.”

284 Ntangu yayi mu me kukiwa mu me vuuka, mu ke tala ti ya kele Nzambi me nata samu na beto Nsangu. Mu ke kwikila ti beto me kuma na nsuka ya nzila, Mu ke kwikila ti ngunga kele awa samu ti kumonisama ya Nzambi kuvwanda ya kuzabana na kati-kati ya beto. Mpe mu zaba ve bantangu yikwa ya ke vwanda, kasi ngunga me belama.

285 Beto ke vingila kutala muntu ya nene yina kutelama. Yandi lendaka kwiza na kilumbu ya munu, yandi lendaka kwiza na kilumbu ya bana, mu zaba ve. Yandi lendaka vwanda kaka ntangu yayi na kati-kati ya beto, beto lenda tuba ve. Mpeve-Santu kele awa samu na kutwadisa beto tii ntangu yango, na yina ntangu ntwadisi yayi ke nata beto yandi ke vwanda dyaka ya kupakulma na Mpeve-Santu; Elie ya ke vwanda, kieleka, yina ke kwiza. Kasi yandi ke vwanda ntwadisi yina ke balula bantima ya bana, to, bantima ya bana na kuvutuka na Nsangu ya Tata, na kuvutuka na Nsangu ya Tata ya beto ya Mazulu ya Kilumbu ya Pantekote ntangu Yandi tiamunaka Mpeve ya Yandi.

286 Ya kele na mwa nzila yina, mu me nata kaka yawu pene mutindu mu lendaka na nzila ya disolo mpe Biblia, mpe me lakisa ti kima yango kulutilaka kaka na bansungi ya dibuundu, mpe ti ya kele yawu bubu yayi, na kulakisaka ti badénomination kele nsingulu na ntwala ya Nzambi. Mu banza ti yawu sungika mabanza ya beno, na nzila ya Biblia, na nzila ya bisalu ya bantumwa, na nzila ya disolo mpe nyonso. Ti . . .

287 Mpe ya kele na ata mbala mosi ve ti Nzambi bongisaka Dibuundu ya Yandi. Mama ya mabuundu ya kubongisa kele bukimfumu ya Katolika ya Rome. Dibuundu ya Katolika ya Rome, yandi kele mama ya ba-organisation. Mpe ntangu kaka réveil ke salama na mosi ya nkonga ya ba-Protestant, bawu ke vutuka kaka manima mpe ke sala kima mosi. Mpe Biblia ke tuba, “Yandi vwandaka kento ya kindumba. Mpe yandi, yandi vwandaka na bana ya bakento yina vwandaka mabuundu yina basikaka na yandi.” Bawu zolaka vwanda bakento, samu na kuvwanda bakento ya kindumba. Yandi yayi. Na yawu beto kele ya kuvwanda . . .

288 Kasi Yandi tubaka dyaka yayi, “Beni vwanda na boma ve, mameme ya fyoti, ya kele Tata ya beno me tala mbote na kupesa beno Kimfumu.” Na yawu ti beto nyonso, na kilumbu yina, beno ba-Méthodiste, ba-Baptiste, nyonso yina beno kele, “Muntu nyonso yina ke zibula kyelo, Mu ke kota mpe ke dya na yandi.”

289 Ti beto vwanda ya kutanga, bankundi ya munu, bampangi ya munu ya bakento, ti beto vwanda ya kutanga mameme yango ya fyoti na kilumbu yina. Ti beto vwanda na kati ya mameme ya fyoti yina ke vwanda na kuvingila ntangu Yandi ke kwiza, na yina Yandi ke kwiza samu na kubaka yandi na yinza ya muvimba. Samu ti Enlevement ke vwanda na yinza ya muvimba. “Ya ke vwanda na zole na mbeto, Mu ke baka mosi; zole na bilanga, mpe Mu ke baka mosi.” Ya ke lakisa ti ya ke vwanda na mpimpa na lweka mosi ya ntoto mpe nsemo ya kilumbu na lweka yankaka, beno me mona. Na yawu, ya kele, “Zole ke vwanda na mbeto, zole ke vwanda na bilanga,” beno me mona, “Mu ke baka mosi na kati.”

290 Mpe mutindu mu tubaka na suka yayi, beno ke vwanda ke na kunataka ditoma na nzila mosi ya bilumbu yayi, na kuzonzaka na mama, mpe beno ke baluka na kutala, yandi me kwenda. Beno ke vwanda ya kuvwanda na mesa, ke na kunwa kafe ya beno—ya beno to ke na kudya madia ya beno ya suka, to—to kima mosi, mpe kima ya ntete beno zaba, beno ke baluka na kutala mpe papa kele dyaka ve kuna. Ya kele kaka kieleka. Ya ke na kwiza, mpe beto zaba ve na wapi ntangu. Kasi dyambu ya yawu kele ti, ntangu yawu ke suka kuna yawu me suka, kuna ya kele dyaka ve na kima ya kusala samu na yawu. Beno ke tuba, “Mu me kuwaka yawu ntangu mingi.” Kasi beno ke kuwa yawu mbala mosi ya beno ya nsuka. Ya kele kieleka. Ya ke salama samu ti Yawu kele Ndinga ya Mfumu. Mpe, beno bambuka moyo, Yawu me kondwa mbala mosi na kati ya bankokila nana yina mu vwandaka me longa? Kasi yina—yina Yesu tubaka awa, me salama, me salama kaka kieleka na konso nsungi ya dibuundu.

291 Mpe beto ke mona nsungi ya dibuundu yayi kukota kaka na yawu, mpe na ngunga ya kieleka. Mpe na suka yayi, na kubakaka bifwanukusu ya bamwense, na ntangu kaka yina mwense ya kulala... Ntangu yayi, beno ke bambuka moyo, Biblia ke tuba ti mwense yina ya kulala... ntangu makelele kuwakanaka, “Beni tala, Bakala ya makwela ke na kukwiza,” nkwezulu ya Mfumu, kulonga ya Ndinga. Mpe na manima yinki salamaka? “Ntangu me belama, ba-bombe atomique mpe nyonso me kubama,” milongi ke kwenda mbangu na babala-bala mpe ke banda na kulonga Nsangu.

292 Mpe ntangu kaka bawu ke sala yawu, dibuundu ya nene kuna, mwense ya kulala, ke tuba, “Ah, mbote, beto vwandaka Presbytérien ya me kuma ntama mingi, mu banza ti beto ke tanga mpe ke tala. Yinga, beno zaba, mu banza ti beto kele na nsatu ya Mpeve-Santu.” Mpe bawu ke sonika mikanda mpe nyonso yina na zulu ya Yawu ntangu yayi, ke baka nzila. Mpe bawu ke tuba, “Nge zola kupesa beto ndambu ya Yawu?”

Mpe bawu ke tuba, “Ve, beto kele kaka na yina me lunga samu na beto mosi.”

293 Na yawu ntangu bawu kwendaka na kuzwa Mpeve-Santu, bawu kwendaka na kusambila, mutindu mabuundu, mabuundu ya nene ya kitoko ke na kusalaka bubu yayi, ba-organisation. Ntangu bawu kwendaka na kuzwa Mafuta, Bakala ya makwela kwizaka. Na yawu bawu ke na kumekaka na kuzwa Yawu ntangu kaka yayi, mabuundu ya nene, ba-organisation, balukutakanu ya nene ya yinza ya muvimba samu na Yawu na—na mabuundu ya kubongisa, na kutubaka, “Beto fwana vutuka na Lusakumunu ya Pantekote. Beto fwana kuzwa bantu ya kinzambi yina ke belusa na dibuundu. Beto fwana kuzwa bantu yina ke zonzaka na bandinga. Beto fwana kuzwa mitendudi ya bandinga. Beto fwana kuzwa makabu nyonso yayi ya kimpeve na kati ya dibuundu ya beto, mpe beto ke banda kaka na

kuzwa balukutakanu mpe kubanda na kusala yawu.” Bawu ke na kuzwa balukutakanu, ke banda na kusala yawu. Na yina bawu ke kwenda na kusala yawu, ya kele kaka na ntangu yina ti Bakala ya makwela ke kwiza mpe ke kuzwa bayina vwandaka na Mafuta na minda ya bawu, mpe ke kwenda.

²⁹⁴ Na manima bawu ke kwiza, mpe yinki ke salama? Ba losaka bawu na kati ya mudidi (na ntangu ya Nene ya Lukwamusu) kisika ya ke vwanda na kudila mpe manyongo mpe kukwetisa meno, na yina Kento ya makwela kele na Mazulu. Oh, la la!

²⁹⁵ Na yina na nsuka ya bamvula tatu yina mpe ndambu, Yandi ke kwiza mutindu Joseph salaka mpe salaka Yandi mosi kuzabana na bampangi ya Yandi. Ya ke sala kudila na bawu nyonso, mpe bawu ke tuba. . . Ba ke kabula mabuta ya bawu, mpe ke dila mpe—mpe ke tuba, “Wapi kisika Nge me kuzwa bidimbu yayi?” Mpe—mpe tobolaka. . . bayina tobolaka Yandi ke mona Yandi, mpe Yandi ke sala Yandi mosi kuzabana na bampangi ya Yandi.

²⁹⁶ Ntangu yayi Yandi ke na kumekaka na kusala Yandi mosi kuzabana na Dibuundu ya Yandi, mpe bawu me pusa Yandi na ngaanda. Mpe Yandi kele dyaka ya kutelama, ke na kukonkotaka, na kutubaka, “Ya kele dyaka na mosi na kati kuna? Mosi yina zola kuzibula mpe ti Mu kota mpe kuzonza na nge?”

²⁹⁷ Oh, mu kele na kyese, ke vutula matondo mingi samu. . . bamvula mingi me luta, pene ya bamvula makumi zole na nana me luta, mu kuwaka kukonkota yango na ntima ya munu. Mpe mu. . . Yandi me kota, mu me kudya na Yandi mpe Yandi na munu kubanda ntangu yina. Mpe mu kuzwaka Lusakumunu ya Pantekote, kuzwaka Mpeve-Santu.

²⁹⁸ Mu kuzwaka mbotika na Nkumbu ya Yesu Klisto samu na lemvo ya masumu ya munu, ya kele kaka mbala yina mu kuzwaka mbotika na luzingu ya munu, mbala mosi. Ntangu mu vwandaka kaka mwana ya bakala ya fyoti, muntu mosi ve zolaka tuba na munu ti ya vwandaka na Banzambi tatu. Ve, beno zolaka kotisa yawu ve na laka ya munu. Beno lenda ve kupesa yawu na muntu yina zaba. . . zaba yina Nzambi kele. Ya kele kieleka. Na yawu ntangu mu kuzwaka mbotika. . . mulongi ya Baptiste kubotikaka munu. Mu tubaka, “Mu zola kuzwa mbotika na Nkumbu ya Mfumu Yesu Klisto.” Docteur Roy E. Davis kubotikaka munu na Nkumbu ya Mfumu Yesu Klisto ntangu kaka mu vwandaka mwana ya bakala. Beno me mona? Ya kele kieleka. Na yawu mu—mu ke kwikila yawu, mu me vwanda na yawu, mpe mu me zaba ti ya kele Kieleka. Ya kele Ndinga ya Nzambi ya Kukonda nsuka. Ya kele kieleka. Ya kele kieleka.

Mu kele na kyese mingi ti mu lenda tuba ti mu
kele mosi ya bawu.

Mu kele mosi ya bawu, mosi ya bawu,
 Mu kele na kyese mingi ti mu lenda tuba mu
 kele mosi ya bawu;
 Mu kele mosi ya bawu, mosi ya bawu,
 Mu kele na kyese mingi ti mu lenda tuba ti mu
 kele mosi ya bawu.

Ata ti bantu yayi longokaka ve,
 To kuzabana ya yinza na lunangu,
 Bawu nyonso me kuzwa Pantekote ya bawu,
 Kubotamaka na Nkumbu ya Yesu;
 Mpe ke na tuba ntangu yayi, bisika mpe
 nyonso,
 Ngolo ya Yandi kele dyaka mosi,
 Mu kele na kyese ti mu lenda tuba mu kele mosi
 ya . . .

²⁹⁹ Beno kele na kyese? Kana beno kele, beno telemisa diboko
 ya beno.

Mosi ya bawu, mosi ya bawu,
 Mu kele na kyese mingi ti mu lenda tuba mu
 kele mosi ya bawu;

Ntangu beno ke kuma ya Yandi beno ke vwanda na zulu ya
 masumu nyonso, na Nkumbu ya Yesu Klisto.

Beno kwiza, mpangi ya munu, kusosa
 lusakumunu yayi
 Yina ke vedisa ntima ya nge na disumu,
 Yina ke sala ngunga ya kyese kubula
 Mpe ke bumba moyo ya beno na tiya;
 Oh, ya ke na kupela ntangu yayi na kati ya
 ntima ya munu,
 Oh, nkembo na Nkumbu ya Yandi,
 Mpe mu kele na kyese ti mu lenda tuba mu kele
 mosi ya bawu.

Oh, mosi ya bawu, mosi ya bawu,
 Mu kele na kyese ti mu lenda tuba mu kele mosi
 ya bawu; (Alleluia!)
 Mosi ya bawu, mosi ya bawu,
 Mu kele na kyese mingi ti mu lenda tuba ti mu
 kele mosi ya bawu.

Bawu vwandaka ya kuvukana na kivinga ya
 zulu,
 Bawu nyonso vwandaka sambila na Nkumbu
 ya Yandi,
 Bawu vwandaka ya kubotama na Mpeve-
 Santu,

Mpe ngolo ya kisalu kwizaka;
 Ntangu yayi yina Yandi salaka samu na bawu
 kilumbu yina
 Yandi ke sala samu na beno mutindu mosi,
 Mu kele na kyese ti mu lenda tuba . . .

³⁰⁰ Ntangu yayi beto pesana maboko, na ntwala, na manima, mpe na ziunga.

Mosi ya bawu, mosi ya bawu,
 Mu kele na kyese mingi ti mu lenda tuba mu
 kele mosi ya bawu;
 Mosi ya bawu, mosi ya bawu,
 Mu kele na kyese mingi ti mu lenda tuba ti mu
 kele mosi ya bawu.

Oh, mosi ya bawu, mosi ya bawu,
 Mu kele na kyese mingi ti mu lenda tuba mu
 kele mosi ya bawu;
 Mosi ya bawu, mosi ya bawu,
 Mu kele na kyese mingi ti mu lenda tuba ti mu
 kele mosi ya bawu.

Mosi ya bawu, mosi ya bawu,
 Mu kele na kyese mingi ti mu lenda tuba mu
 kele mosi ya bawu;
 Mosi ya bawu, mosi ya bawu,
 Mu kele na kyese mingi ti mu lenda tuba ti mu
 kele mosi ya bawu.

Beno kele ve na kyese ti beno kele mosi ya bawu? [Dibuundu me tuba, “Yinga! Amen! Alleluia!”—Mu.] Mu zola yawu. Nkonga ya makelele mingi!

Shh! Shh! [Mpangi mosi ya bakala ke na kuzonza na bandinga, mpangi mosi ya bakala ke na kutendula—Mu.]

³⁰¹ Mutindu beto ke tonda Nge, Tata, samu na bumbote mpe kyadi ya Nge samu na beto, bayina kele ya kulunga ve. Na kubanza ti Nge ke siamisa Nsangu ya Nge ntangu yayi, Mfumu, yina Nge me sila bantu. Mu ke sambila, Nzambi, ti kyadi ya Nge kuvwanda na zulu ya bawu.

³⁰² Kana ya kele na muntu awa yina zaba Yandi ve mutindu Mvulusi, beno zola kuzwa Yandi ntangu kaka yayi na kati ya bantima ya beno mutindu Mvulusi, beno ke zola kutelema ntangu fyoti na yina beto ke sambila samu na beno? Yandi tubaka ti Yandi ke . . . salaka Nsangu yayi kuna mpe Yandi me zola kusiamisa Ndinga ya Yandi na beno. Kana ya kele na bayankaka awa yina zaba Yandi ve mpe me kuzwa Mpeve ya Yandi ve, Yandi ke na kuzonzaka na beno.

³⁰³ Mbote mingi, muntu mosi kuna na manima. Nge ke zola kaka kutelama, mpangi ya bakala? [Mpangi mosi ya bakala na kati ya dibuundu ke na kuzonza—Mu.] Yandi zola kuzwa mbotika

ya Mpeve-Santu, ya kele yawu, mpangi ya bakala? Nzambi sakumuna nge. Telama kisika nge kele. Ya kele na yankaka yina ke zola kutelama mpe kutuba, “Mu ke zola kuzwa mbotika ya Mpeve-Santu”? Nzambi sakumuna nge, mpangi ya bakala. Nzambi sakumuna nge. Yina kele mbote. Beno telema kaka. Beno vwanda kaka ya kutelama. Ya lenda vwanda na muntu yankaka yina ke zola kuzwa Mpeve-Santu mpe kuzwa mbotika, yina ke zola kuvwanda ya kubambuka moyo na bisambu ya beto ntangu kaka yayi, samu na kuvwanda ya kubotama na Mpeve-Santu? Ya kele na yankaka, ntete mu tuba yina mu zola kutuba, ke zola kutelama mpe ti ba vukisa yandi?

Oh, nge ke zola ba tanga nge mutindu mosi
ya mameme ya Yandi? (Beno ke zola kusala
yawu?)

Vwanda ya kukondwa ditona na kati, kulala ve
mpe vingila kimpa ya kumona;
Yandi ke na kwiza dyaka.

³⁰⁴ Yandi ke kwiza dyaka. Beno zola vwanda mbeni ya Yandi to beno ke zola kuvwanda mwana ya Yandi? Nzambi ya nganzi na suka yina, kima yankaka ve kasi Menga ya Yesu Yandi ke zaba. Ata mbala mosi ve ti Yandi ke . . . kuvwanda ya dibuundu ya beno ke vwanda kima ve samu na Yandi. Kima mosi ve kasi Menga!

Oh, yinto ya kitoko
Yina ke sukula munu mpembe mutindu mvula
mpembe;

Malembe.

Mu zaba yinto yankaka ve,
Kaka Menga ya Yesu.
Yinki lenda sukula masumu ya munu?
Kaka Menga ya Yesu;
Yinki lenda sungika munu diaka?
Kaka Menga ya Yesu.

Oh, yinto ya kitoko
Yina ke sukula munu mpembe mutindu mvula
mpembe;

Mu zaba yinto yankaka ve,
Kaka Menga ya Yesu.

[Mpangi Branham ke na kuniunguta *Kaka Menga*—Mu.]

Kaka Menga ya Yesu;
Yayi kele nyonso ludedomo ya munu,
Kaka Menga ya Yesu.

Ya kele na yankaka?

Oh, ya ntalu kele. . .

Kima ve lenda telama, mpangi ya bakala, mpangi ya kento. Yinza ke na kudyama, yawu me manisa!

. . . mutindu mvula-mpembe;
 Mu zaba yinto yankaka ve,
 Kaka Menga ya Yesu.

305 Malembe, Teddy, kana nge zola, “Ya Kele Na Kiteko Ya Kufulukana Na Menga, yina Basikaka Na Misisa ya Emmanuel.”

306 Ntangu yayi, bankundi, beno bayina kele ya kutelama—kele na kumekaka na kundima lembami ya Mfumu Yesu. Biblia mosi yango ke tuba na beto ti bima yayi ke salama, me nata kaka yawu na kusalama tsyelika mutindu Yandi silaka yawu. “Ntangu yayi, nsilulu” tubaka Pierre “kele samu na beno mpe bana ya beno mpe bayina kele ntama, mpe mutindu mingi Mfumu Nzambi ya beto ke bokila.”

307 Beno telemaka samu beno ke zola lusakumunu ya Nzambi na zulu ya beno. Mpe mutindu kisadi ya Yandi, mu ke sambila samu na beno, mu ke sambila ti Nzambi kupesa beno mbotika ya Mpeve-Santu. Mpe mu ke kumiyufula kana beno lenda sala yayi na kati ya ntima ya beno, kana beno kele ya kusungama, kana beno ke zola kusala nsilulu yayi na Nzambi: “Nzambi, munu, na ntangu yayi, me telema, ke na sosaka mbotokolo yayi ya Mpeve-Santu, Mu ke sambila ntangu nyonso mpe ke vingila tii ntangu Nge ke fulusa munu na Mpeve-Santu.” Beno ke sala nsilulu yina na Nzambi na kutelemisaka maboko ya beno? “Mu ke sambila ntangu nyonso, ntangu nyonso, tii ntangu Nge ke fulusa munu na lembami mpe mambote ya Mpeve.”

Mu ke sala kisambu ya munu samu na beno ntangu yayi na yina beto ke yinika bayintu ya beto:

308 Tata ya beto ya Mazulu, bawu kele bakuupe ya Mvwandulu ya Nge. Bawu zaba ti Bandinga yayi kele kieleka samu ti bawu kele ya Nge. Bawu zaba ti bawu me pesama na Mpeve-Santu, samu ti bawu kele Ndinga ya Nzambi. Mpe bawu me ndima ti bawu kele na nsatu ya Nge, ti bawu kele na nsatu ya lembami ya Mpeve-Santu na luzingu ya bawu samu na kupesa bawu ngolo ya kununga. “Mpe bawu ke kuzwa ngolo ya Zulu,” kuzwa ngolo ya kuzinga luzingu ya Buklisto, samu na kuzwa ngolo ya kununga bampukumunu. Mutindu nkunga yina beto vwandaka me yimba, “Bawu vwandaka ya kuvukana na kivinga ya zulu mpe vwanda sambila na Nkumbu ya Yandi, bawu kubotamaka na Mpeve-Santu mpe ngolo ya kusalu kukwizaka.” Ya kele yina bawu zola, ngolo ya kusalu na kukwiza na zulu ya bawu.

309 Mu ke sambila Nge, Tata, mutindu kisadi ya Nge, na yina Nge me mona bawu kutelemisa maboko ya bawu, bawu me sala ndefi na Nge mpe nsilulu ti bawu ke bika ata mbala mosi ve, bawu ke bika yawu ve na lweka, kasi bawu ke sambila tii Nge ke fulusa bawu, Mfumu, na ndambu ya kufwana ya Mvwandulu ya Nge ya Santu na luzingu ya bawu. Mu ke sala kisambu ya munu samu na bawu, Mfumu, mutindu kisadi ya Nge, ti bawu ke vwanda ya kufulukana na Mpeve-Santu. Mfumu, mu ke sambila ti bawu

ke bika ve dibuundu yayi tii ntangu ya ke salama, ti bawu ke vwanda kaka awa tii ntangu moyo nyonso ke fuluka na Mpeve-Santu. Pesa yawu, Mfumu.

³¹⁰ Nge kele Nzambi, ya Ngolo nyonso, Nge kutalanaka na nsuni samu na kukatula masumu ya yinza. Nge vumbukaka na kilumbu ya tatu, kwendaka na Zulu. Mpe Nge kele awa na nkokila yayi, na kati-kati ya beto, mpe na nkumbu ya Mpeve-Santu. Mpe beto ke sambila, Tata, ti Nge, Mfumu ya beto ya ntalu, ke fulusa mosi na mosi ya bawu na Nge Mosi. Mpe ti bawu vwanda lusakumunu ya Kimfumu ya Nge mpe na yinza yina ke kwiza. Mpe kilumbu mosi ntangu Nge ke kuma na nsuka ya nzila, yina dyaka lendaka vwanda bubu yayi, beto zaba ve ntangu ya ke vwanda. Kasi ti mu vwanda na lenda, Mfumu; kuvwanda ya kutanga na kati ya bayina ke kwenda na Enlevement. Bika ti bayayi kuvwanda bayina ke kwenda na Enlevement. Ti muntu nyonso, Mvwandulu ya Nzambi mpe bayina nyonso me fuluka na Mpeve, bayina kele ya Nzambi, ti bawu kwenda na Enlevement.

³¹¹ Baka bayayi na nkokila yayi, Tata. Bawu kele ya Nge ntangu yayi, mu me pesa bawu na Nge. Na Nkumbu ya Yesu Klisto. Amen.

³¹² Ntangu yayi mu zola ti bayankaka ya beno yina kele na lweka ya bantu yayi, bayina kele na Mpeve-Santu, beno telama, beno tentika maboko ya beno na zulu ya bawu.

. . . Kiteko mosi ya kifuluka na Menga,
Yina basikaka na misisa ya Emmanuel,
Mpe kana bansumuki kukota na yinto yina,
Ya ke zimbisa mvindu nionso.
Ya ke zimbisa mvindu nionso,
Ya ke zimbisa mvindu nionso;
Mpe kana bansumuki kukota na yinto yina,
Ya ke zimbisa mvindu nionso.

Muyibi yina vwandaka na kiese na kumona
Kiteko yina na kilumbu ya yandi;
Mpe kuna ti munu, kuvwanda yimbi mutindu
yandi,
Mu me kwisa sukula masumu ya munu.
Mu me sukula masumu ya munu nionso,
Mu me sukula masumu ya munu nionso;
Mpe kana bansumuki kukota na yinto yina,
Mu ke zimbana masumu ya munu nionso.

³¹³ Ntangu yayi beno telemisa maboko ya beno na Nzambi mpe beno pesa Yandi lukumu. Beno tuba, “Matondo na Nge, Mfumu. Mu me telama, mu ke pesa Nge lukumu. Mu ke tonda Nge samu na balusakumunu ya Nge, samu na bumbote ya Nge, mpe samu na kupesaka munu mbotika ya Mpeve-Santu.” Matondo na Nge, Mfumu! Matondo na Nge, Mfumu! Mu ke na tonda Nge, Nzambi

ya luzolo, na kupesaka beto. . . Nge ke zitisaka nsilulu ya Nge, Nge me tuba mutindu yina. Beto ke kwikila Nge.

³¹⁴ Beno kele na kyese ve? Beno tuba, “Nkembo na Mfumu!” Teddy, bika munu. . . kaka mosi dyaka, “Beto ke mona bantu mingi yina ke bakula ve. . .” *Yayi Kele Mutindu Mazulu Samu Na Munu.*

Beto ke mona bantu mingi yina ke bakula ve
Samu na yinki beto kele na kiese mingi mpe na
kimpwanza;

Beto me zabuka Jourdain tii na Yinsi ya
Canaan,
Mpe yayi kele mutindu Mazulu na munu.

Oh, yayi kele mutindu Mazulu na munu,
Oh, yayi kele mutindu Mazulu na munu;
Oh, beto me zabuka Jourdain tii na Yinsi ya
Canaan,
Mpe yayi kele mutindu Mazulu na munu.

Oh, ntangu mu ke kuma na kiese, mu ke
yimbila mpe mu ke boka,
Diabulu ke kwikilaka Yawu ve, mu ke monaka;
Kasi mu me fuluka na Mpeve, ya kele ve na
ntembe,
Mpe yawu yina diambu na munu.

Oh, ya kele yina kele. . . Mazulu samu na munu,
(Lukumu na Nzambi!)
Oh, yayi kele mutindu Mazulu samu na munu;
Mu me zabuka Jourdain tii na yinsi ya Canaan,
Mpe yayi kele mutindu Mazulu samu na munu.

³¹⁵ Ya ke sala beno ve nsayi? Mbote. Beno pesana mbote na muntu yankaka, beno tuba, “Lukumu na Mfumu!” Yayi kele mutindu Zulu, Mfumu.

Baka Nkumbu ya Yesu na nge,
Nge mwana ya mawa mpe ya kiadi;
Yawu ke pesa nge kyese mpe ngolo,
Baka Yawu bisika nyonso nge ke kwenda.

Nkumbu ya ntalu, O Nkumbu ya mbote!
Kivuvu ya ntoto mpe kyese ya Mazulu;
Nkumbu ya ntalu, O Nkumbu ya kitoko!
Kivuvu ya ntoto mpe kyese ya Mazulu.

Beto ke fukimina Nkumbu ya Yesu,
Beto ke fukama na makulu ya Yandi,
Samu na kubyadisa Yandi ntinu ya bantinu na
Mazulu,
Ntangu nzietolo ya beto ke suka.

Nkumbu ya ntalu, O Nkumbu ya kitoko!
Kivuvu ya ntoto mpe kyese ya Mazulu;
Nkumbu ya ntalu, O Nkumbu kitoko!
(Nkumbu kitoko!)
Kivuvu ya ntoto mpe kyese ya Mazulu.

Ntangu yayi, na malembe, na bayintu ya beto ya kukulumusa:

. . . Nkumbu ya Yesu ntangu nyonso,
Mutindu Kinwaninu ya ngolo;
Ntangu bakumekama ke kwisila nge,
Beno niunguta kaka Nkumbu yina ya Santu na
kisambu.

Nkumbu ya ntalu, O Nkumbu ya kitoko!



NSUNGI YA DIBUUNDU YA LAODICEE KNG60-1211E
(The Laodicean Church Age)

BANDANDANI YA LUZAYIKISU YA YESU KLISTO

Nsangu yayi ya Mpangi William Marrion Branham, kulongamaka na Kingelesi, na Lumingu na nkokila, na kilumbu ya 11 na Ngonda ya kumi na zole, na mvula 1960, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2022 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kisdilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org